

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá sá quíxí Espíritú Yă Ndiöxí cundecu ndihí ñáyiu

¹ Te duha ní cáháⁿ té Lùcá ní xíi-dé té Tëofilú: Yúhú sa ní chídó tnùní-í núú libré ndéé díhṅa nchaa sá ní quide Jèsús, ndihí nchaa sá ní dácuáhá-gă ñáyiu. Te ní chídó tnùní-í nchaa sá ní quide-gá ndéé nduu nṅa quesaha-gă quidé chiuⁿ-gá,

² ndihí nchaa sá ní quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihí cue téé ní cáháⁿ-gá dacuàha ñaha xii ñáyiu tnúhu-gá, te mee Espíritú Yă Ndiöxí ní chindee ñàha-xi xii-gá ní xáhaⁿ-gă nàcuáa cada-güedé.

³ Te sáta nṅa xíhí-gá te ní ndoto-gá, te ní xíndecu-gá údico nduu. Te títñí xito ní sáháⁿ-gá núú nṅa xíndecu-güedé, te ducaⁿ nṅa quide-gá cuendá quini-güedé sá ndáá ní ndoto-gá, te ní xáhaⁿ-gă nàcuáa quide Yă Ndiöxí ndihu ndaha-gă ñáyiu.

⁴ Te ñⁿ nduu ndècu ndihí ñaha-gá xii-güedé, te ní xáhaⁿ-gă:

—Vá quée-ní-ndó ñùú Jerusàlén, chi cundetú-ndo quixi Espíritú Yă Ndiöxí cundecu ndihí-ndo, chi sa ní cachí tnúhu-í sá dúcáⁿ nṅa

cáháⁿ Tătá-ó Dütú Ndiöxí Yaá ndécú àndiu nacuáa cunduu.

⁵ Te ndáá sá ndi Juáá ní dácúándùte ñaha ndíi xii-ndo, dico vitna ñá túú-gă cuéhé nduu, te quexìo Espíritú Yă Ndiöxí cundecu ndihi-ndo –càchí-gá xáhaⁿ-gă xii-güedé.

Jèsús cuánda-gá andiu

⁶ Te òré ní xíndecu-güedé ndihi Jèsús, te ní xáhaⁿ-güedé xii-gá:

–Mèstrú, cuíní-ndí cachí tnúhu-n nùu sa ta cùyatni nduu chindee-n ñáyiu ñuú Isràél cuendá taxi tnùní tucú-yu ñuú-yu –càchí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

–Ñá túú xìni ñuhu-xi cunaha nchohó xíⁿ, chi Tătá-ó Dütú Ndiöxí náhá-gă ná nduu càda-gá nchaa sá ñí cáháⁿ-gá.

⁸ Te òré quexìo Espíritú Yă Ndiöxí cundecu ndihi-ndo, te cuyi-ndo ñè yuhu ñi iní-ndó quíhíⁿ-ndó cáháⁿ-ndó tnúhu-í núú ñáyiu ñuú Jerusàlén ndihi núú ñáyiu distritú Jùdeá ndihi núú ñáyiu distritú Sàmariá. Te ducaⁿ-ni cáháⁿ-ndó quíhíⁿ-ndó ñè caxico ñuyíú –càchí-gá xáhaⁿ-gă xii-güedé.

⁹ Te sátá dúcáⁿ ñí cáháⁿ-gá, te ndèhe-güedé ní ndanchita-gá cuánda-gá andiu cuändihu-gá xití vícò, te ñá túú-gă ní xìní ñáhá-güedé xii-gá.

¹⁰ Te ndèhe vihi-güedé andiu núu ndéé quini ñáhá-güedé xii-gá yòtnúhu, te ní quexìo cunu úú cue téè ñihnu dóó cuixíⁿ núú ndécú-güedé.

¹¹ Te xáhaⁿ-güedé:

—Nchòhó cue tée Galileá, ¿ná cuendá ndéhé-ndó àndiù? Te dàtná-ni càa Jesús cuándaa-gá andiù vitna, te ducaⁿ-ni cùnduu-gá quixi tucu-gá —càchí cue tée ñihnu dóó cuixíⁿ-áⁿ xǎhaⁿ-güedě.

*Cuendá sá ñà túú-gǎ ndíi Jùdás ñuu ní nan-
ducu-güedě té Màtiá ní nucúnutnǎi-dé núú ndíi*

¹² Te ní ndee-güedé yucu Òlívú cuánuhú-güedé ñuu Jerusálén, te ní xúhuⁿ-güedé cuèdicó cuádava òré ichi.

¹³ Te òré ní ndexìo-güedé ñuu-áⁿ, te cuándaa-güedé cuàrtú ndéé núú ñinu, chi vehe yòdo tnaħa ndecu-güedé. Te ní naníhí tnáhá-güedě nchaa-güedé té Pèlú, té Jàcobó, té Juáá, té Ndríxí, té Lìpé, té Mǎxí, té Bartolòmé, té Mâteú, té Jàcobó déhe té Àlfeú, ndíhi té Xímú tée ní cundíhi cue tée canànistá, ndíhi té Jùdás ñaní té Jàcobó.

¹⁴ Te ní naníhí tnáhá-güedě nchaa-güedé yàcáⁿ ndíhi tá Màriá nǎná Jèsús, ndíhi cue ñaní-gá ndíhi dava-gá cue ñáyiù dìhí. Te ñⁿ-ni ñ cuú-yu ní cáhán ndíhí-yu Yá Ndiǒxí.

¹⁵ Te ñⁿ nduu ní xíndecu dàtná ñⁿ cièndú ócò mee-ni ñáyiù sàndáá iní tnúhu Jèsús, te ní ngúnutnǎi té Pèlú núú-yu, te ní xáhaⁿ-dě xií-yu:

¹⁶⁻¹⁷ —Nchòhó cue ñáyiù ndècu ndíhi-í ichi Xítóhó Jesucristú, na càni-í cuèndú núú-ndó nàcuáa ní chídó tnùní ndíi Dàví tée ní xíndecu ndéé sanaha nàcuáa ní cáhán Espíritú Yǎ Ndiǒxí cuendá té Jùdás. Te dacuití dùcaⁿ ní cuu, chi tnáhá té Jùdás ní xíndecu ndíhi-o, te ní xinu cuechi-o ndíhi-dé núú-gǎ sá dǎhna, te ducaⁿ ñ quide-dé ní sáħa cuèndá-dé Jèsús núú cuè tée cùu úhú iní ñáhá xì-gá.

18 Te ní cháhu ñaha-güedě xii-dé cuendá sá ñí sáha cuendá ñáhá-dě xii-gá. Te ní sáháⁿ-dé ñí xichi ní sata caa-dé méé-dě, te ní ngava-dé, te ní cahndí duuⁿ xití-dé te xíaⁿ ñí xíhí-dé. Te ní naqueheⁿ-güedé díhúⁿ sá ñí cháhu-güedé ndíi, te ní nacuaaⁿ-güedé ñuhu núú ñí ngava ndíi-áⁿ.

19 Te nchaa ñáyiú Jerusalén ní níhí-yu tnúhu, te ní dánání-yu ñuhu-áⁿ Aceldamá. Te tnúhu mée-yu quèe-xi: Ñuhu núú ñí satí níñí.

20 Te duha ní cáháⁿ ndíi Dàvíí ní chídó tnùní ndíi núú librú Salmú ní dándóo ndíi: “Nà ndóo nahi vèhe-dé, vá yóo ñí quíhíⁿ cundecu”, duha ní cáháⁿ ndíi. Te ingá tucu tnúhu ní cachí ndíi: “Na nànducu-güedé ingá téé nucúnutnñí núú ndíi”, duha ní cáháⁿ ndíi Dàvíí —càchí té Pèlú xáhaⁿ-dě xii-yu.

21-22 Te ní xáhaⁿ tucu-dé:

—Te ducaⁿ ñí cáháⁿ ndíi Dàvíí, te vitna xini ñuhu-xi nanducu-o ñí téé nucúnutnñí-dé núú ndíi Jüdás, te xini ñuhu-xi diu-ni ñí téé ní xica cuu ndíi Xítohó Jesucrístú cútnàhá ní xica cuu-o ndíi-gá, ñí téé ní xini ndéé òré ní dácuándute ñaha ndíi Juàá xii-gá, te ndéé òré cuándaa-gá andíu. Te téé nanducu-o cundecu-dé cáháⁿ-dé nàcuáa ní cuu ní ndoto-gá —càchí té Pèlú xáhaⁿ-dě xii-yu.

23 Te ní cacunehe-güedé úú tnàhá-güedé nũu ndědacàa-güedé nduu táhú-güedé nucúnutnñí-güedé núú ndíi. Te ñí-dé nání-dě Chèè Barsàbás, àdi Justú chi úú diu-dé, te ingá-dé nání-dě Màtiá.

24 Te ní cáháⁿ ndíi-güedé Yá Ndiöxí, te xáhaⁿ-güedé xii-gá:

—Yòhó Dútú Ndiöxí xini-n ñí nchaa ñáyiú, te mee-n nàha-n núu nděda càa núú úú cue téé-a

tnàhá iní-n

²⁵ cǎháⁿ-güedé tnúhu-n nǔú ñǎyiu, te téé-áⁿ nucúnutnǎí-dé núú ndǎi Jùdás, chi cuáháⁿ ndíi núú ùhú núú ndàhú núú tàú-xi quíhíⁿ ndíi — cǎchí-güedé xǎhaⁿ-güedě xii-gá.

²⁶ Te ní xito ndéé-güedé, te ní cutnùní sá tǎe nàni Matíá quendóo-dé ndihí úxí ìⁿ cue téé ní táúchíúⁿ-gǎ dacuàha ñaha xii ñáyiu tnúhu-gá.

2

Ní quexìo Espíritú Yǎ Ndiǒxí cundecu ndihí ñáyiu

¹ Te ní sáá nduu còo vico Pentecostés te xǎndecu nchaa ñáyiu ìⁿ-ní xìchi.

² Te ní tecú dóho-yu uuⁿni ní ñihí andiu, dàtná quidé ìⁿ táchí ñihí vǎhi ní quide-xi, te ducaⁿ ñǎ cuu ndéé xití vehe núú ndécǔ-yu nchaá-yu.

³ Te ní xiní-yu dàtná cáá ìtá ñuhú cáá sǎ ndécú xití vehe, te ní xité nuu-xi ní ngoyo ndodo-xi díquǐ-yu nchaá-yu.

⁴ Te ducaⁿ ñǎ quide-xi òré ní quexìo Espíritú Yǎ Ndiǒxí ní ngúndecu ndihí-yu nchaá-yu. Te ní ngüíta-yu ní cáháⁿ-yu tnúhu cue ñáyiu ñá túú cùu ñáyiu isràél, te nchaa xǎⁿ ní quide Espíritú Yǎ Ndiǒxí.

⁵ Te vǎi ñáyiu isràél xǎndecu nchaa dava-gá ñuú ní tacá-yu ñuú Jerusalén, te ñáyiu-áⁿ ìo ndùcu ndéé-yu dàcuahá-yu nchaa ndudú sǎ dǎcuàha tnahí-yu.

⁶ Te òré ní tecú dóho-yu ñihí, te ní sáháⁿ-yu ní xíndedóho-yu tnúhu càháⁿ méě-yu ìⁿ ìⁿ ñuú-yu, chi ndi dííⁿ ndi dííⁿ tnúhu càháⁿ ñáyiu ndècu-áⁿ.

⁷ Te xíǎⁿ ío ní cuñúhu ñáyiu véxi dava-gá ñuú, te ní xítñàhá-yu:

—Ñáyiu ducaⁿ xícáháⁿ cúŭ-yu ñáyiu distritú Galileá.

⁸ ¿Te nása ní quidé-yu ní cutúha-yu nàcuáa càháⁿ-ó ìⁿ ìⁿ-o ndéé lǐhli-o?

⁹ Te iha véxi ñáyiu ðava nàcióⁿ, chi véxi ñáyiu Pàrtiá, véxi ñáyiu Mèdiá, véxi ñáyiu Èlám, véxi ñáyiu Mesopòtamiá, véxi ñáyiu Jùdeá, véxi ñáyiu Capàdociá, véxi ñáyiu Pòntó, véxi ñáyiu Àsiá,

¹⁰ véxi ñáyiu Frìgiá, véxi ñáyiu Pànfilíá, véxi ñáyiu Ègiptú, véxi ñáyiu Áfricá ñáyiu ndècu ndéé núú-gǎ-xi ñuú Cìrené. Te tñàhá ñáyiu ñuú Ròmá véxi, te ñáyiu-áⁿ chi ñá díú mèe-ni ñáyiu isràèl cúŭ-yu nchaá-yu, dico ìⁿ-ni cùu sá dácuhá-yu.

¹¹ Te véxi ñáyiu Crètá, véxi ñáyiu Àrabiá. Te nchaa-o sa ndèdóho-o càháⁿ-yu nàcuáa cuáháⁿ tnúhu mee-o ìⁿ ìⁿ-o. Te nchaa ñáyiu xícáháⁿ tnúhu-o càháⁿ-yu cuèndá nchaa sá vǎ yõo tñàhí ndàcu cada ní quide Yá Ndiõxí —càchí-yu xítñàhá-yu.

¹² Te ní cuñúhu vǐhí-yu, te ñá ná sàá iní-yu nása ní cuu, te xítñàhá-yu:

—¿Nása ní cuu duha càháⁿ-yu tnúhu-o? —
càchí-yu xítñàhá-yu.

¹³ Te davá-yu ní sácú ndeé yíchí ñáhǎ-yu, te xítñàhá-yu:

—Xíxíni ñáyiu-áⁿ núu ñá náhǎ-yu tnúhu càháⁿ-yu —
càchí-yu xítñàhá-yu.

Tnúhu ní xáhaⁿ tǎ Pèlú xii cue ñáyiu

14 Te ní ngúnutnîi té Pèlú ndîhi úxí ìⁿ cue téé ní táúchíúⁿ Jèsús dacuàha ñaha xii ñáyiu tnúhu-gá, te níhi ní cáháⁿ-dé, te xǎhaⁿ-dě xii-yu:

—Nchaa nchòhó ñáyiu distrítú Jùdeá ndîhi nchòhó ñáyiu ñúú Jerusalén, cundedóho váha-ndo tnúhu na cáháⁿ-í-a.

15 Ñá ndáá tnúhu cáháⁿ-ndó, chi ñá túú xîni-ndí te ducaⁿ cáháⁿ-ndó, chi davitna cùu-xi caá ìⁿ dátneé, vátá tnàhá-gá òré coho ñáyiu ndidí.

16 Te yúhú ná càchí tnúhu-í xii-ndo vitna nacuáa ní xáhaⁿ Yǎ Ndiǒxí xii ndí Jòél téé ní xóo cáháⁿ tnúhu-gá ndéé sanaha nàcuáa cada ñaha-gǎ xii ñáyiu, te ndí-áⁿ ñí chídó tnùní ndí nàcuáa ní cáháⁿ-gá.

17 Te duha ní xáhaⁿ-gǎ xii ndí:

Cùmání-gǎ sáá nduu nàa ñuyíú, te cuáñaha-í Espíritú-í cundecu ndîhi nchaa ñáyiu na quíndáá iní ñáhá xii-í.

Te cue déhe-yu cáháⁿ-yu tnúhu-í,
te cue téé cuechi dacòto núú ñáhá-xí xii-güedé,
te ducaⁿ-ni cuè téé ni sàhnu cáháⁿ saní-güedé,
te ñu-ni cuèndá nchaa sá quídè-í ducaⁿ dàcoto núú ñáhá-xí xii-güedé.

18 Te nchaa ñáyiu xînu cuechi núù-í cáháⁿ-yu tnúhu-í, te cuáñaha-í Espíritú-í cundecu ndîhi-yu.

19 Te ndéé andîu, yàcáⁿ vài sá cáda-í nàcuáa cuñúhu vîhí-yu,

te núú ñuyíú-a cada-í ìⁿ sá vátá quíní tnàhí-gá-yu,
te ngoyo níñí te ngoyo ñuhú te quene vîhi ñúhmá.

20 Te vá dáyèhé-gá nchícanhii,

cuu nee ñuyíú te cuu ticuèhé núú yóó dàtná ticuèhé níñí.

Te dàvá-áⁿ sáá nduu quìxi Yaá cúú Xìtohó-yu, te nduu-ǎⁿ cuu-xi ìⁿ nduu càhnu vihi, chi cada-gá nchaa sá ñà túú xìní-yu, te cuñúhu vîhí-yu.

²¹ Te òré xíaⁿ te nchaa ñáyiu càháⁿ ndihî ñaha xìi Yaá cúú Xìtohó-yu-áⁿ naníhí tàhú-yu.

Duha ní xáhaⁿ Yǎ Ndiǒxí xii ndíi Jòél ní chídó tnùní ndíi.

²² Te nchòhó ñáyiu isràél, cundedóho váha-ndo tnũhu na càháⁿ-í-a cuèndá Jèsús téé ñuú Nazàrét. Te Jèsús ní quide-gá chîuⁿ Yá Ndiǒxí, chi mee Yǎ Ndiǒxí ní chindee ñàha-gá ní quide Jèsús ná daha núú chîuⁿ, núú xíaⁿ ní ndacu-gá ní quide-gá nchaa sá vǎ yóo tnàhí ndàcu cada, te xíaⁿ ní cuñúhu vîhi-ndo. Te sa ñaha-ndo nacúáa ní quide-gá cùtnàhá ní xica cuu-gá ñuyíú.

²³ Te ndíi Jùdás ní taxi cuèndá ñáhá ndíi Jèsús xii nchòhó cue téé ní cuu úhú iní ñáhá xìi-gá, te ní ndúcú-ndó cuè téé úhú iní-xi ní tñî ñaha-güedě xii-gá te ní sata caa ñaha-güedě núú cùrúxí, te núú cùrúxí-áⁿ ñî xíhí-gá. Dico sa ní cutnùní iní Yǎ Ndiǒxí sá dúcáⁿ càda-ndo Jesús, te mee Yǎ Ndiǒxí ní cachí-gá sá dúcáⁿ ndòho Jesús.

²⁴ Te ñî-ni mee Yǎ Ndiǒxí ní dándótó-gǎ Jèsús, chi sa ní cáháⁿ-gá sá òré cuú-gá te vá cùú dúcáⁿ-gǎ.

²⁵ Te ndíi Dàvíí téé ní xíndaha ñàha xii cue ñaní tnáhá-ó ñî xíndecu ndéé sanaha ñî chídó tnùní ndíi nàcuáa ní cáháⁿ Jèsús, te duha ní cáháⁿ-gá:

Cùtnuní iní-í sá ncháá ndùu ndecu ndihî-í Yǎ Ndiǒxí, te ío chindee ñaha-gá xii-í,

te ñà túú tnàhí sá yùhú-í.

26 Te ío ndàcáⁿ táhù-í núú Yă Ndiöxí chi cùdíí ìní-í,
chi sa nàha-í sá cùú-í dico ndoto-í,

27 chi vá dáñá-gă quíhíⁿ dúcáⁿ àlmá-í núú ndécú
ñăyiu ní xíhí,

te vá dáñá-gă téhyú yiqui cùñú-í chi cùu-í Déhe-gă,
te yúhú sa nàha-í sá cúú ìní ñáhá-gă xii-í.

28 Te sa ní cachí tnúhu-gă nàcuáa cada-í cundecu-í
ichi váha, te cuendá sá ndécú ndíhi ñaha-gă
xii-í nŭu ío cùdíí ìní-í.

Duha ní cáháⁿ Jèsús, te ducaⁿ ñi chídó tnùní ndíi
Dàvíí.

29 Te nchòhó cue ñaní tnáhà-í, na càchí tnúhu
ndáá-í xii-ndo cuendá ndíi Dàvíí téé ní xíndecu
ndéé sanaha vîhi, chi ní xíhí-dé, te ní chindúxi
ñaha-güedě, te nàha-o tnavíí núú ñi chindúxi
ñaha-güedě.

30 Te ndíi Dàvíí ní xóo cáháⁿ ndíi tnúhu Yă Ndiöxí,
te sa nàha ndíi sá Yă Ndiöxí ní cáháⁿ ndáá cuiti-gă
sá díú-ní ñⁿ tnaha ndíi taxi tnùní-dé ñăyiu isràél
ndéé cuèé-gă dàtná ní xóo taxi tnùní méé ndíi
cútnàhá ní xíndecu ndíi, te téé taxi tnùní-án cúú
Crìstú chi cùu-gă ñⁿ tnàha ndíi.

31 Te sa ní cutnùní iní ndíi sá ndótó Crìstú, núu
xíáⁿ ní chídó tnùní ndíi sá vá dáñá Yă Ndiöxí sá
quíhíⁿ dúcáⁿ àlmá-gă cundecu-xi núú ndécú ñăyiu
ní xíhí, te vá dáñá-gă téhyú yiqui cùñú-gă.

32 Te ndáá chi Yă Ndiöxí ní dándótó-gă Jèsús, te
nchúhú ní xiní-ndí sá ñi ndoto-gă.

33 Te ní xáhaⁿ Yă Ndiöxí xii Jèsús sá cundecu ndíhi
ñaha-gă, te taxi tnùní Jèsús ñi caa ñi quíhíⁿ. Te
Yă Ndiöxí ní sáñaha-gă Espíritú-gă ní ngúndecu
ndíhi-gă nàcuáa ní xáhaⁿ-gă, te díu Jèsús ní

quide-gá nchaa sá nǐ xiní-ndó vitna ndìhi nchaa sá nǐ xíndedóho-ndo.

³⁴ Te ndíi Dàvíí ñá túú ní ndàa túú ndíi andíu ndìhi yiqui cuñú ndíi, te òré ndécú-gă ndíi ñuyíú-a ní cachí ndíi:

Dútú Ndiöxí ní xáhaⁿ-gă xii Yaá cúú Xĩtohó-í:

“Ngóo xio cùha-í,

³⁵ te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.”

Duha ní xáhaⁿ Dútú Ndiöxí xii Yaá cúú Xĩtohó-í cächí ndíi.

³⁶ Te nchòhó ñáyiu isràél cùu-ndo ndi mee-í, te cuiní-í cundedóho váha-ndo ìⁿ tnúhu na càháⁿ-í-a. Jèsús ní sata caa-ndo-gă núú cùrúxí, dico Yá Ndiöxí ní cachí-gá sá Jèsús dacăcu nihnu-gă ñáyiu, te vá cání ìⁿ caní úú iní-ndó, chi ðíu-gă cúnùu-gă núú nchàa ñáyiu —cächí té Pèlú xăhaⁿ-dě xii-yu.

³⁷ Te ñáyiu ní xíndedóho tnúhu ní cáháⁿ té Pèlú ní ndixi túu iní-yu năcuáa quidé-yu ndécú-yu, te ní xáhăⁿ-yu xii-dé ndìhi dava-gă cue téé ní táúchíúⁿ Jèsús dacuàha ñaha xii-yu tnúhu-gă:

—Nchaa nchòhó cue ñaní tnáhá-ndǐ, ¿nása cachí-ndó cùnduu, nása cada-ndí vitna? —cächí-yu xáhăⁿ-yu xii-güedé.

³⁸ Te ní xáhaⁿ tǎ Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yă Ndiöxí nchaa yíca cuèchi-ndo. Te cuandute-ndo cuendá quiní-yu sá nǐ natuha-ndo ìchi Jesús, te ducaⁿ te taxi Yá Ndiöxí Espíritú-gă cundecu ndìhi-ndo,

³⁹ chi cuiní-gă taxi-gă Espíritú-gă xii mee-ndo ndìhi déhe-ndo, te cuáñaha-gă Espíritú-gă xii nchaa ñáyiu nǐ càa xico ñuyíú, ñáyiu cáháⁿ-gă

cundecu ichi-gá ndéé ìdá-gá —càchí té Pèlú xǎhaⁿ-dě xií-yu.

⁴⁰ Te titní-gá tnúhu ní xáhaⁿ-dě nàcuáa cadá-yu, te xǎhaⁿ tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sǎ quidé dàva-gá-yu —càchí-dé xǎhaⁿ-dě.

⁴¹ Te nchaa ñáyiú ní sándáá iní-xi tnúhu ní cáháⁿ té Pèlú ní sanduté-yu, te ñiú-ni nduu-ǎⁿ ñí cuu dàtná úní mǐ ñáyiú ní sándáá iní-xi ní xíndecu ndihí ñáyiú xídácuáhá tnúhu Yá Ndiǒxí.

⁴² Te ío ní xíndedóho-yu tnúhu ní cáháⁿ cue téé ní táuchíúⁿ Jèsús dacuàha ñaha xií-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá náhǎ-yu sá dúcáⁿ ñí quide Jèsús cútnàhá vátá cáhni ñàha-gá-güedé xii-gá, te ní xóo cáháⁿ ndihí-yu Yá Ndiǒxí.

Nàcuáa ní quide nchaa ñáyiú ní sándáá iní tnúhu Jèsús ndéé díhna nuu

⁴³ Te nchaá-yu ní cuñúhu vǐhí-yu, chi cue téé ní táuchíúⁿ-gǎ dacuàha ñaha xií-yu tnúhu-gá ní quide-güedé titní núú sǎ vǎ yǒo tnàhí ndàcu cada, te xǐǎⁿ ní cutnùní iní-yu sá méé Yǎ Ndiǒxí chíndèè ñaha-gá xii-güedé.

⁴⁴ Te nchaa ñáyiú sándáá iní tnúhu Jèsús càháⁿ ndihí tnàha váha-yu, te cuèi-ni nchaa ndachìuⁿ nandíhi-yu ndècu cahnu.

⁴⁵ Te ní dícǒ-yu nchaa ndachìuⁿ sá ñà túú xìni ñuhú-yu, te ní níhǐ-yu díhúⁿ te ní sǎñàhá-yu xii nchaa ñáyiú ñǎ ñihí.

⁴⁶ Te ñiⁿ nduu ñiⁿ nduu ní xóo quíhíⁿ ndihí tnàhá-yu veñúhu càhnu sá ño cùnuu. Te ní xexi ndihí

tnàhá-yu vehé-yu. Te ío ní cudíí ìní-yu chi ìⁿ-ní ní cuú-yu nchaá-yu.

⁴⁷ Te ío ní ndacáⁿ táhũ-yu núú Yă Ndiöxí, te nchaa dava-gá ñáyu ní cáháⁿ váha-yu cuendá ñáyu-áⁿ. Te mee Yă Ndiöxí ní quide-gá ní sándáá iní vâi-gá ñáyu, te ní xíndecú-yu ndihî dava-gá ñáyu xîdácuáhá tnũhu-gá.

3

Quide tátna-güedé ìⁿ té yacua

¹ Te ìⁿ nduu òré caá úní sacuaa, òré xícáháⁿ-yu ndihî Yá Ndiöxí cuáháⁿ té Pèlú ndihî té Juàá veñúhu càhnu sá ìo cùnuu sácúú-xí ñáyu isrâél.

² Te ndècu ìⁿ té yacua, te ducaⁿ-ní càa-dé ní cacu-dé. Te sàháⁿ ndihî ñàhá-yu veñúhu càhnu sá ìo cùnuu, te sàcòo-dé ìⁿ xio yuyèhe veñúhu sá nání Yèhe Vii Caa, chi ducaⁿ nàni-xi, te xìcáⁿ ndàhú-dé núú nchàa ñáyu sàháⁿ veñúhu.

³ Te ní xiní-dé té Pèlú ndihî té Juàá cuánguihu-güedé veñúhu, te xìcáⁿ ndàhú-dé núú-güedě.

⁴ Te ní ndacoto-güedé núú-dě, te ní xáhaⁿ tẽ Pèlú xii té yacua-ăⁿ:

—Cundehe ñàha xii-ndí —càchí té Pèlú xáhaⁿ-dẽ xii-dé.

⁵ Te ní xíndéhé ñàha-dé xii-güedé, chi ní cáháⁿ-dẽ sá ío ìⁿ sá cuãñaha-güedě.

⁶ Te ní xáhaⁿ tẽ Pèlú:

—Ñá túú tnàhí díhúⁿ néhè-í dico chindee ñàha-í xii-n, te Xítóhó Jesucristú Yaá ní xíndecu ñúú Nazàrét, ndacu-gá cada tátna ñàha-gă xii-n, ndacuíñí te caca-n —càchí-dé xáhaⁿ-dẽ.

7 Te té Pèlú ní tñi-dé ndaha cùha tée yacua-áⁿ, te ní ngüíta-dé ndácàni ñaha-dé, te òré xíaⁿ ñí naníhí ndéé-dě, te ní ndúha sáhá-dě.

8 Te ní ndacuíñí cunu mee-dě te ní xica-dé, te ní cachí-dé sá ïo càhnu cuu Yá Ndiöxí cuendá sá ñí ndúha-dé, te ta sãndava-dé cuánguihu ndihí ñaha-güedě veñúhu.

9 Te nchaa ñáyiú xĩndecu-áⁿ ñí xiní-yu sá ñí nduu váha-dé, te ndèhé-yu ndàcáⁿ táhú-dě núú Yá Ndiöxí.

10 Te ní naquiní ñáhã-yu xii-dé sá díú tée xicáⁿ ndàhú tée ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vîhí-yu sá ñí ndúha-dé.

Té Pèlú ní cáháⁿ-dé corredór sá néhé ñiú ndí Salòmón

11 Te sátá veñúhu càa corredór sá néhé ñiú ndí Salòmón. Yácáⁿ ndécú tē Pèlú ndihí té Juàá ndihí tée ní ndúha sáhá-xi, te ñá cuìní tée ní ndúha sáhá-xi-áⁿ dañá-dě quíhíⁿ-güedé dandöo ñaha-güedě xii-dé. Te chítú-yu ní quexìo coyó-yu núú ndécú-güedě, te ní cuñúhu vîhí-yu sá ñí ndúha sáhá tée cùhú-áⁿ.

12 Te té Pèlú ní xiní-dé ní quexìo coyó-yu, te ní xáhaⁿ-dě xií-yu:

—Nchòhó ñáyiú isràél, ¿ná cuendá ndéé dúcáⁿ ndèhe ñaha-ndo xii-ndí te cùñúhu-ndo sã ñí ndúha tée yacua-áiⁿ? Nchòhó cáháⁿ-ndó sã méé-ndí ní quide tátna-ndí-dé sá ïo váha iní-ndí, dico ñáhá chi ñá díú mèe-ndí ní quide tátna-ndí-dé.

13 Chi Yá Ndiöxí ní ndadúha ñaha-gã xii-dé, chi ñiú-gá cúú Ndiöxí ndí Àbrahám ndihí ndí Isàác ndihí ndí Jàcób, te ñiú-ni cue tée-áⁿ cúú ñàní

tnáhá-ó nǐ xíndecu ndéé sanaha vǐhi. Te diu-ni Ndiöxí-áⁿ nǐ xáhaⁿ-gǎ xii Déhe-gá Jèsús sá táxí tnùnǐ-gá nchaa sá ío andiu ndǐhǐ nchaa ñáyiu ndècu ñuyíú-a, dico mee-ndo nǐ sáha cuèndá-ndó Jèsús núú tée cùchiuⁿ. Te té Pilatú ní cuiní-dé dacăcu-dé Jèsús ní cùu, te mee-ndo ñǎ ní cuiní-ndó.

¹⁴ Te Yá Ndiöxí ní cachí-gá sá ïo váha iní Jèsús te ñá túú tnáhǐ cuéchi-gá. Te mee-ndo ñà túú ní cuiní-ndó căcu-gá nǔu ní xáhaⁿ-ndo xii té Pilatú sá vǎha-gá dacăcu-dé ìⁿ tée ndècu vihi cuéchi-xi, te vá dacăcu-dé Jèsús.

¹⁵ Te ní xáhaⁿ-ndo sǎ cáhni-güedě Jèsús Yaá quidé nchìto-o ndecu-o, dico Yá Ndiöxí ní dándótó ñàha-gá, te ní xiní-ndǐ sá ndàá ní ndoto-gá.

¹⁶ Te nchúhú sa nàha-ndǐ sá díú Xǐtohó Jesucrístú ní ndadúha-gá tée yacua, te náí-dé nútñǐ-a. Te ducaⁿ nǐ quide-gá chi ní sándáá iní ñáhá-dě xii-gá, te vitna ní xiní-ndó sǎ ndàá ní ndúha-dé.

¹⁷ Te nchòhó ndǐhǐ cue tée cùnūu ní sahani-ndo Xǐtohó Jesucrístú, chi ñá ní cùtnuní iní-ndó sǎ nǐ quide-ndo.

¹⁸ Te cue tée ní xóo cáháⁿ tnúhu Yá Ndiöxí ndéé sanaha nǐ chídó tnùnǐ-güedé nàcuáa ní xáhaⁿ Yǎ Ndiöxí xii-güedé sá Crístú quixi-gá ñuyíú-a, te ndoho vǐhi-gá, te xǐǎⁿ nǔu ducaⁿ nǐ cuu ío ní ndoho-gá.

¹⁹ Te vitna te dañ-a-ndo nchàa sá cuèhé sá dúhá quide-ndo. Te quíndáá iní-ndó Yǎ Ndiöxí, te ducaⁿ te cada càhnu iní-gá nchaa sá ñà túú vǎha ní quide-ndo ñùyíú-a, te canu ichi ñaha-gǎ xii-ndo ìⁿ ichi váha.

²⁰ Te ní tendaha-gǎ Crístú ní quixi-gá ñuyíú-a, chi mee Yǎ Ndiöxí ní cachí-gá sá díú Crístú tauni-

hnu ñaha-gă xii-ndo.

²¹ Te dacuití cùndecu-gá andiu ndéé ná sàá nduu nàtaxi ndecu-gá nchaa sá ndécú ñùyíú nàcuáa sàni iní méé-gă. Te diu ducaⁿ ñí cáháⁿ Yă Ndiöxí ñuu ducaⁿ ñí chídó tnùní cue téé ní xóo cáháⁿ tnúhu-gá ndéé sanaha.

²² Te ndí Moisés ní xáhaⁿ ndíi xii cue ñaní tnáhá-ó ñí xíndecu ndéé sanaha: “Yă Ndiöxí tendaha-gă ñⁿ téé quixi-dé cáháⁿ-dé tnúhu-gá dàtná cuìní-ndó ñí quide ñaha-gă xii yúhú, te téé-áⁿ cuu-dé ñⁿ ñaní tnáhá-ndó. Te cundedóho váha-ndo nchàa tnúhu cáháⁿ-dé.

²³ Te nchaa ñáyiu vá quíndáá iní tnúhu cáháⁿ-dé, te cuíta nihnú-yu chi vá quíhíⁿ-yu núú quíhíⁿ ñáyiu sàndáá iní tnúhu Yă Ndiöxí”, duha ní xáhaⁿ ndíi Moisés xií-yu —càchí té Pèlú xăhaⁿ-dë xií-yu.

²⁴ Te ní xáhaⁿ tùcu té Pèlú xií-yu:

—Ndíi Sàmuél ndíhi nchaa cue téé nchìcúⁿ-gá ní xóo cáháⁿ tnúhu Yă Ndiöxí ndéé sanaha ñí cáháⁿ-güedé nàcuáa cada-xi vitna.

²⁵ Te Yă Ndiöxí ní cáháⁿ-gá ndíhi cue téé ní cáháⁿ tnúhu-gá ndéé sanaha. Te ní quide ndáá-gá ndíhi nchaa ñaní tnáhá-ó ñí xíndecu ndéé sanaha nàcuáa cada-gá naníhí tàhú-ó. Te duha ní xáhaⁿ-gă xii ndíi Àbrahám: “Íó nduu cacu ñⁿ tnàha-n, te téé-áⁿ cada-dé te naníhí tàhú ñáyiu ñuyíú-a”, duha ní xáhaⁿ-gă xii ndíi Àbrahám.

²⁶ Núu xíaⁿ ní tendaha-gă Déhe-gá ní quixi-gá núú ndécú-ndó cuèndá dañà-ndo nchàa sá cuèhé sá dúhá quide-ndo, te naníhí tàhú-ndó —càchí té Pèlú xăhaⁿ-dë xií-yu.

Té Pèlú ndihí té Juàá ndécú-güedě ndaha té cùchiuⁿ

¹ Te té Pèlú ndihí té Juàá càháⁿ dúcáⁿ-ni-güedě ndihí ñáyiú, ní quexìo cue dútú ndihí té tàxi tnuní ñáhá xìi cue té quide cuendá veñúhu càhnu sá ïo cùnnuu, ndihí cue té cùu saducéú.

² Te ní cudééⁿ-güedě nchaa-güedé núú tě Pèlú ndihí té Juàá sá xáhaⁿ-güedě xii ñáyiú sá ndótó ñáyiú ní xíhí dàtná ní ndoto Jèsús.

³ Te ní tñii ñaha-güedě ní chihí ñaha-güedě ve-caá xii-güedé, te ñá ní quide ndáá té cùchiuⁿ cuéchi-güedé nduu-ãⁿ chi sa ní cuaa.

⁴ Te ío vài ñáyiú ní sándáá iní-yu tnúhu ní cáháⁿ-güedé, te ñáyiú-áⁿ ndihí ñáyiú sa ní sándáá iní-xi ndéé cãni-gá ní xínu dàtná úhúⁿ mĩl mee-ni cuè té, te ðiⁿ ñáyiú ðihí ndihí landú.

⁵ Te nduu tněé-áⁿ ðiu-ni ñuú Jerusálén-áⁿ ñĩ tacá cue té yĩndaha veñúhu, ndihí cue té cùu sacuéhé nũú ñáyiú isràél ndihí cue té dàcuaha ñaha xii-yu nchaa tnúhu ní chídó tnùnĩ ndíi Moisés.

⁶ Te tnàhá dútú cùnù-gá té nàni Anás ndécú ndihí té Caifás, ndihí té Juàá, ndihí té Ljandrú ndihí dava-gá ñaní tnàhá dütú cùnù-gá-áⁿ ndécú.

⁷ Te ní xáhaⁿ-güedě xii cue té xínu cuechi núú-güedě:

—Chí cuàháⁿ queñuhu-ndo tě Pèlú ndihí té Juàá vecaá, te na quixi-güedé iha —càchí-güedé xáhaⁿ-güedě.

Te ní quexìo té Pèlú ndihí té Juàá núú cuè té cùnnuu, te cue té cùnnuu-áⁿ ñĩ xícáⁿ tnúhú-güedě núú-güedě, te xáhaⁿ-güedě:

—¿Nása ní quide-ndo cuendá tée yacua-ǎn?
¿Yoo ní táuchíúⁿ dùcaⁿ cada-ndo? —cachí-güedé
xǎhaⁿ-güedé.

⁸ Te ndècu ndihí té Pèlú Espíritú Yǎ Ndiǒxí, núu
xíǎⁿ ní xǎhaⁿ-dě xii-güedé:

—Nchòhó cue tée cùchiuⁿ ndihí nchòhó cue tée
cùu sacuéhé núú ñǎyiu isráél,

⁹ te núu cuení-ndó quení-ndó nǎsa ní quide-ndí ní
ndúha tée yacua-ǎn,

¹⁰ te cundedóho-ndo ìⁿ tnúhu na càháⁿ-í-a. Xìni
ñuhu-xi cundedóho nchaa ñǎyiu isráél cuendá
quení-yu nàcuáa ní cuu ní ndúha tée-ǎn. Xítohó
Jesucrístú Yaá ní xíndecu ñuu Nazàrét ní quide
tátna-gá sáhá tée yacua ní ndúha, te diu-ni-gá
ní sata caa-ndo núú cùrúxí te núú cùrúxí-áⁿ ní
xíhí-gá, te ní dándótó ñaha Yǎ Ndiǒxí xii-gá.

¹¹ Te núú tütú Yǎ Ndiǒxí càchí-xi: “Cristú
cúu-gǎ dàtná ìⁿ yúú ndécú xíquí ìⁿ vehe. Te
yúú càchí-yu sá ñà túú nàndíhi, te diu xíǎⁿ ní
nàndíhi-xi ní ngúnutnìⁿ-xi xíquí véhé”, duha
càchí-xi núú tütú-gá. Te ducaⁿ sǎtnahá-xi cùu
Jesús, chi càchí-ndó sǎ ñà túú nàndíhi-gá,

¹² dico Yǎ Ndiǒxí ñá túú ndéé ní tàxi ndecu-gá
ingá tée dàcácu nihnu ñaha xì-o núú ùhú núú
ndàhú, chi ìⁿdìi díi-ni Déhe-gá Xítohó Jesucrístú
dacácu nihnu ñaha-gǎ xii-o —càchí té Pèlú xǎhaⁿ-dě
xii-güedé.

¹³ Te té Pèlú ndihí té Juáa ñá túú tǔha-güedé, te
cùñúhu cue tée cùchiuⁿ sá ìo ñí xíndáa-güedé. Te
ní cutnùnì iní cue tée cùchiuⁿ-áⁿ sǎ Jèsús ní xica
cuu ndihí-güedé, núu xíǎⁿ ñá túú tnàhí yùhú-güedé
càháⁿ-güedé.

14 Te cuendá ndécú ndìhi té Pèlú ndìhi té Juàá téé ní ndúha sáhá-xi, núu xiǎⁿ ñá ní ñíhí cue téé cùchiuⁿ tnúhu cáháⁿ-güedé.

15 Te ní xáhaⁿ-güedě xii té Pèlú ndìhi té Juàá sá quéé-güedě quehé cuendá ndóo mee-güedě ndatnúhu-güedé.

16 Te ní xítñaha-güedé:

—¿Nása cada-o úú cue téé-ǎⁿ?, chi nchaa ñáyiu ñuú Jerusálén náhă-yu sá ñí quide tátña-güedé ñⁿ téé yacua, te xiǎⁿ xícuñúhu vìhi ñáyiu. Te vá cúú càchí-ó sǎ ñá ndàá, chi vâi ñáyiu ní xiní nàcuáa ní cuu.

17 Te dayùhú-ó-güedě te cúñaha-o sǎ vǎ càháⁿ-gá-güedé tnúhu Jèsús, chi núu ñáhá te quindáá-gá iní-yu —càchí-güedé xítñaha-güedé.

18 Te ní cana tucu-güedé té Pèlú ndìhi té Juàá, te xǎhaⁿ-güedě sá vǎ dâcuàha-gá-güedé ñáyiu tnúhu Jèsús.

19 Te té Pèlú ndìhi té Juàá ní xáhaⁿ-güedě:

—Chí cuǎha cuendá, te núu sá càchí nchòhó cada-ndí àdi sá càháⁿ Yǎ Ndiǒxí cada-ndí. Te cada càhnu iní-ndó chi vá cúú càda-ndí sá càchí-ndó, chi cada nahi-ni-ndí sá càchí Yǎ Ndiǒxí.

20 Chi dacuítí cǎháⁿ-ndí nàcuáa ní cáháⁿ Jèsús, te cáháⁿ-ndí nchaa sá ñí xiní-ndí ní quide-gá —càchí-güedé xǎhaⁿ-güedě.

21 Te cue téé cùchiuⁿ níhi-gá ní cáháⁿ-güedé xǎhaⁿ-güedě sá cádá cástiú ñáhá-güedě núu vá dáñá-güedě sá dâcuàha-güedé ñáyiu. Te ducaⁿ te ní dáñá ñaha-güedé cuánuhú-güedé, chi ñá ní ñíhí-güedě nása cada-güedé cada castiú ñáhá-güedě, chi nchaá-yu ndàcáⁿ táhŭ-yu núu Yǎ Ndiǒxí sá ñí ndúha téé yacua.

22 Te tée ní quide tátna-güedé-áⁿ ndécú-dě vîhi-gá údico cuíá-dě, te ío ní cuñúhu-yu sá nǐ ndúha-dé.

Ñáyiú sándáá iní tnúhu Jèsús xicáⁿ táhǔ-yu núú-gǎ sá vǎ yùhú-yu cáháⁿ-yu tnúhu-gá

23 Te ní ndee té Pèlú ndihí té Juáa cuánuhú-güedé núú ndécú cuè tée cündihí-güedé, te ní nacani tnúhu-güedé nàcuáa ní xáhaⁿ cuè dútú cúnùu ndihí cue tée cùu sacuéhé nǔú ñáyiú isràél.

24 Te sátá nǐ xíndedóho-yu tnúhu ní cáháⁿ-güedé, te ìⁿ-ni tnúhu ní cáháⁿ-yu nchaá-yu ndihí Yá Ndiöxí, te ní xáhǎⁿ-yu xii-gá:

—Yòhó Dútú Ndiöxí, ní cadúha-n àndiú, ní cadúha-n ñùyíú, ní cadúha-n làmár, ní cadúha-n nchàandi túhú sá ío ñuyíú.

25 Te ndíi Dàvíí ní sándáá iní ndíi tnúhu ní cáháⁿ-n, te ní chídó tnùní ndíi nàcuáa ní xáhaⁿ-n cǎháⁿ ndíi, te ñiú-ni Espíritú-n nǐ chindee ñàha-xi xii ndíi ní chídó tnùní ndíi, te duha ní chídó tnùní ndíi:

Ñáyiú ñá túú cùu ñáyiú isràél ío cùdéděⁿ-yu núú Yǎ Ndiöxí,
te cuíní-yu nǎá-yu ndihí-gá, dico vá ndácǔ-yu chi mee-gǎ cúnùu-gá.

26 Te cue tée yìndaha nacióⁿ ndihí cue tée cùchiuⁿ tacá-güedé nǎá-güedé ndihí Dútú Ndiöxí ndihí Crìstú Yáa ní quixi ñuyíú-a.

Duha ní chídó tnùní ndíi Dàvíí nàcuáa ndùu tnúhu ní cáháⁿ-n —càchí-yu xáhǎⁿ-yu xii Yá Ndiöxí.

27 Te xǎhaⁿ tùcú-yu xii-gá:

—Ndáá ní cáháⁿ ndíi Dàvíí chi ñiú-ni ñuú iha ní tacá té Hèrodés ndihí té Pònciú Pilatú ndihí ñáyiú ñá túú cùu ñáyiú isràél ndihí ñáyiú isràél ní cáháⁿ cuèhé-yu cuendá Jèsús. Te Yòhó Dútú Ndiöxí,

Déhe-n cùu Jesús nũu ío váha iní-gá, te ní sáha chiuⁿ-n-gá, te ío úhú ní cuu iní ñáhá ñãyiu xii-gá.

28 Te ní quidé-yu nàcuáa ní sani iní-n càdá-yu ndéé sanaha, ndéé cútnáhá ní ngáva ñuyíú.

29 Te Yòhó Dútú Ndiõxí sa nàha-n nása càháⁿ cue tée cuení cada úhú ñáhá xii-ndí. Te quide-ndí chiuⁿ tahu-n, te vitna chindee ñàha-n xii-ndí cuèndá sá vã yùhú-ndí cáháⁿ-ndí tnúhu-n.

30 Te cada tátna-n ñãyiu cùhú, te chindee ñàha-n xii-ndí, te cada-ndí nchaa sá vã yõo tnàhí ndàcu cada nacuáa cuñúhu vîhí-yu. Te xini-ndí sá méé Jèsús chindee ñàha-gá xii-ndí, chi quide-gá chiuⁿ tahu-n —cachí-yu xãhãⁿ-yu xii Yá Ndiõxí.

31 Te sátá ñí yáha ní cáháⁿ-yu ndihí Yá Ndiõxí, te ní quidi-xi vehe núú xíndecú-yu, te òré-áⁿ ñí cutáhú tucú-yu nchaá-yu Espiritú-gá. Te ní cáháⁿ-yu tnúhu Yá Ndiõxí, te ñá túú tnàhí ni yùhú-yu.

Cuèndá nchaa ndachiuⁿ cánehe chiúⁿ-yu

32 Te nchaa ñãyiu ní sándáa iní tnúhu Yá Ndiõxí ñⁿ-ni tnúhu ní cáháⁿ-yu nchaá-yu. Hⁿ-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhã-yu nchaa sá xini ñùhú-yu, te ni ñⁿ-yu ñá túú ní cãháⁿ-yu sá ndàchiúⁿ-yu ñⁿdìi-ní-yu cùu nchaa sá ndécú ndihí-yu.

33 Te cue tée ní táuchíúⁿ Jèsús dacuàha ñaha xií-yu tnúhu-gá ío váha ní cáháⁿ-güedé nàcuáa ní cuu ní ndoho Xitohó Jesucristú. Te ío ní chindee ñàha Yá Ndiõxí ní cáháⁿ-yu tnúhu-gá, te ñá túú ní cãháⁿ cuèhé dava-gá-yu cuèndá ñãyiu dàcuaha tnúhu-gá.

34 Te ñá túú tnàhí ni cùndahú-yu díhúⁿ, chi nchaa ñãyiu ndècu ndihí ñuhu-xi, ndihí nchaa ñãyiu càa

vehe-xi ní nadìcò-yu, te da ìⁿ da ìⁿ ndachìùⁿ-yu ní nadìcò-yu òrè xínì ñùhú-yu dǐhúⁿ.

³⁵ Te ní sǎñàhá-yu xii cue téé ní táúchíúⁿ Jèsús dacuàha ñaha xií-yu tnúhu-gá, te cue téé-áⁿ ñí dácǎhñu-güedé nchaa ñáyiú xìnì ñuhu.

³⁶ Te distritú Chìpré ndécú ìⁿ téé nàni-dé Chèé ñaní tnáhá ndíí Lèví, te ní xóo cunu cuechi-dě veñúhu ñáyiú isràél. Te cuendá sá sǎñaha-dě tnúhu ndee ìní xií-yu, xiǎⁿ nùu ní dánání ñàha-güedé Vèé xii-dé.

³⁷ Te téé-áⁿ ñí nadico-dě luha ñuhu-dé, te nèhe-dé dǐhúⁿ cuáháⁿ núú cuè téé ní táúchíúⁿ-gǎ dacuàha ñaha xií-yu tnúhu-gá.

5

Té Anàniás ndihì tá Sàfirá ñá túú ní quide ndáá-yu

¹ Te ndècu ìⁿ téé nàni Ananiás, te ñadìhí-dé nání-áⁿ Sàfirá, te ñáyiú-áⁿ ñí nadìcò-yu luha ñuhú-yu.

² Te ní taxúha-dé sacú dǐhúⁿ, te sacú-gá néhé-dě cuáháⁿ ní sǎñaha-dě xii cue téé ní táúchíúⁿ Jèsús dacuàha ñaha xii ñáyiú tnúhu-gá, te ní dándàhú ñáhá-dě xii-güedé, chi ní xáhaⁿ-dě sá ñihíí ní sǎñaha-dě, te nàha ñadìhí-dé sá dúcáⁿ ñí quide-dé.

³ Te ní xáhaⁿ tǎ Pèlú xii-dé:

—Anàniás, ¿ná cuendá ducaⁿ ñí quide-n ñí dáñá-n ñí quíhu sácúhñá ìní-n? Te ní dácúándèhnde-n núú Espiritú Yǎ Ndiǒxí, te ní taxúha-n sàcú dǐhúⁿ ñí níhí-n cuendá ñuhu-n.

⁴ ¿Te ñuhu-áⁿ cuendá sá ñúhú mèe-n, àdi dǐhúⁿ-ǎⁿ cuendá sá dǐhúⁿ méé-n cùu-xi, te cuu-ni cada-n nàcuáa càchí ìní-n càhaⁿ-n ñǎ? ¿Ná cuendá

ducaⁿ nǐ quide-n? ¿Ná ní quide-xi iní-n nǔu ní dácuándèhnde-n núú Yă Ndiǒxí? Chi ñá díú-ní mée-ni ñáyiú ní dándahú-n —càchí té Pèlú xăhaⁿ-dě xii-dé.

⁵ Te òré ní ndihí tnúhu ní xăhaⁿ tĕ Pèlú, te uuⁿni ní nduá-dé te ní xíhí-ni-dé. Te nchaa ñáyiú ní níhí tnǔhu sá nǐ xíhí-dé, te ní yùhú víhǐ-yu.

⁶ Te ní quixi ìⁿ úú cue tée cuechi, te ní ndanehe ñaha-güedĕ ní sacáⁿ ñáhá-güedĕ núú yuu, te ní ducuⁿ nuu ñaha-güedĕ yuu-áⁿ, te ní xido ñaha-güedĕ néhé ñaha-güedé cuáháⁿ chindúxi ñaha-güedĕ xii-dé.

⁷ Te ní cuu úú uní òré, te ní quexìo ñadihí tée ní xíhí-áⁿ, te vátá quíní-gá-aⁿ sá nǐ xíhí yìi-aⁿ.

⁸ Te ní xăhaⁿ tĕ Pèlú xii-aⁿ:

—Cuìní-í cachí tnúhu ndáá-n. ¿Ndĕdau ní dícó-ndó ñùhu, ní dícó-ndó nàcuáa ní cachí yìi-n ăⁿ? —càchí té Pèlú xăhaⁿ-dě xii-aⁿ.

Te ní xăhaⁿ-aⁿ:

—Ndáá sá díú-ní dùcaⁿ —cachí-aⁿ xăhaⁿ-aⁿ.

⁹ Te ní xăhaⁿ tĕ Pèlú:

—¿Ná cuëndá ducaⁿ nǐ chitnàha tnúhu-ndo dùcaⁿ ní quide-ndo nǐ cuíní-ndó dándahú-ndó Espiritú Yă Ndiǒxí? Quíní-n, chi sa cuándixi cue tée ní sáháⁿ ní chindúxi yìi-n, te yòhó tnàhá-n càndeca ñaha tucu-güedé xii-n quǐhíⁿ vitna —càchí-dé xăhaⁿ-dě xii-aⁿ.

¹⁰ Te òré-áⁿ nǐ nduá-aⁿ núú tĕ Pèlú, te ní xíhí-ni-aⁿ. Te cuándihu cue tée cuechi-ăⁿ xití vehe, te ní xiní-güedé sá sà ní xíhí-aⁿ, núú ní xido ñaha tucu-güedé cuáháⁿ chindúxi-güedé-aⁿ dǐñi yìi-aⁿ.

11 Te ní yùhú víhí ñǎyiu ní sándáá iní tnúhu Yá Ndiǒxí, ndihí dava-gá ñǎyiu ní níhí tnúhu nàcuáa ní cuu.

Ní quide-güedé titní núú sǎ vǎ yǒo tnàhí ndàcu cada te ío ní cuñúhu ñáyiu

12 Te cue téé ní táuchíúⁿ Jèsús dacuàha ñaha xíi-yu tnúhu-gá titní víhí sǎ vǎ yǒo tnàhí ndàcu cada ní quide-güedé, te ní cuñúhu víhí-yu. Te nchaa ñáyiu ní sándáá iní-xi tnúhu Jèsús ní xóo tacá-yu corrèdór néhé òu ndíi Salòmón.

13 Te nchaa ñáyiu ñá túú dàcuaha tnúhu-gá ñá ní cùyíi-yu chitnahá-yu ñáyiu ní sándáá iní-xi tnúhu-gá, dico nchaá-yu ní cáháⁿ váha-yu cuendá ñáyiu ní sándáá iní-xi tnúhu-gá.

14 Te vǎi téé, vǎi ñadihí ní sándáá iní-yu tnúhu-gá.

15 Te cuendá sá ñí níhí-yu tnúhu sá quidé tǎtna cue téé ní xica cuu ndihí Jèsús, núu xǎⁿ ní queñuhú-yu nchaa ñáyiu cùhú ichi, te davá-yu ní quide túha-yu càmá te davá-yu ní quide túha-yu yuu, núu núú nchàa xǎⁿ tá sàcáⁿ-yu cue ñáyiu cùhú-áⁿ cuáháⁿ, te xíaⁿ cáǎ-yu ndètú-yu, chi ní sani iní-yu sá òré yáha té Pèlú te cuèdìcò cuándáhú-dě yáha ndodo ñaha-xi xii-yu te ndúha-yu.

16 Te ní quixi ñáyiu ñuú yatni Jerusàlén ndécǎ-yu ñáyiu cùhú, ndihí ñáyiu yìhí ñaha espíritú cùndihí yucu ñávǎha ní quixi, te nchaá-yu ní ndúha.

Ío ní quide úhú-güedé té Pèlú ndihí té Juàá

17-18 Te dútú cùnù-gá ndihí cue téé cùu saducéú cue téé cùndihí-dé ní cudééⁿ-güedé sá ío chítú-yu dàcuaha tnúhu Jèsús, núu xǎⁿ ní tñi-güedé cue téé

ní táuchíúⁿ Jèsús dacuàha ñaha xií-yu tnúhu-gá ní chihi ñaha-güedě vecaá.

19 Te xití niú-áⁿ ñi quexìo ìⁿ espíritú xínú cuèchi núú Yă Ndiǒxí ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

20 —Quíhíⁿ-ndó veñúhu càhnu sá ìo cùnunu te cúñaha-ndo xii ñáyiu nàcuáa cadá-yu naníhí tǎhú-yu —càchí espíritú-áⁿ xǎhaⁿ-xi xii-güedé.

21 Te sá dúcáⁿ ñi xáhaⁿ-xi nūu sátá ñi túndaá, te ní sáháⁿ-güedé veñúhu càhnu sá ìo cùnunu sá cúú-xí ñáyiu isràel ní dácuahá ñàha-güedé xií-yu.

Te dútú cúnùu-gá ndìhi cue tée cùndìhi-dé ní nadatàcá tnáhá-güedě ndìhi nchaa cue tée cùu sacuéhé nūu ñáyiu isràel ndìhi cue tée cùchiuⁿ, te ní tendaha-güedě sandàdú cuáháⁿ queñuhu-güedé cue tée yìhi vecaá ní cùu.

22 Te ní quexìo-güedé yèhe vecaá, te ní xiní-güedé sá ñi ìⁿ-gá cue tée dàcuaha ñaha xii ñáyiu tnúhu Jèsús ñá túú-gǎ-güedé yíhí. Te cuánuhú-güedé

23 ní xítñúhu-güedé cue tée cùchiuⁿ, te xǎhaⁿ-güedé:

—Ní sáháⁿ-ndí ní sándéhé-ndí vecaá, te ndèé chóó-ni, te xǐndecu-ni sandàdú cue tée xǐndéé yèhe vecaá. Te ní nacaáⁿ-ndí vecaá, te vá yǒo ìⁿ-gá yíhí —càchí-güedé xǎhaⁿ-güedé.

24 Te sá dúcáⁿ ñi xáhaⁿ-güedé, te cuáháⁿ iní cue dútú cúnùu ndìhi tée tàxi tnuní cue tée xǐndéé veñúhu càhnu sá ìo cùnunu, te ní xítñàha-güedé:

—¿Nása cada-xi vitna duha càa ní cuu ní xinu cue tée yìhi vecaá-i? —càchí-güedé xítñàha-güedé.

25 Te ní quexìo ìⁿ tée ní xáhaⁿ-dě:

—Cundedóho-ndo na càchí tnúhu-í ìⁿ tnúhu. Cue téé ní chihi-ndo vècaá ndécú-güedě veñúhu càhnu sá ìo cùnuu dacuaha-güedé ñáyi —càchí-dé xáhaⁿ-dě.

26 Te cue téé ndèé veñúhu ndihí téé tàxi tnuní ñáhá xii-güedé cuánguaca ñaha-güedě, te ñá túú ní quide úhú ñáhá-güedě, chi ní yùhú-güedé cuáha yúú ñáhá ñáyi dii ñùú-xi-áⁿ.

27 Te ní ndexìo ndihí ñaha-güedé núú cuè téé cùu sacuéhé ndihí núú cuè téé cùchiuⁿ. Te dútú cùnùu-gá ní ngüíta-dé ténàá ñáhá-dé xii-güedé, te xáhaⁿ-dě:

28 —Te náa ñá díú ní cachí-ndí sá vǎ dacuàha-gá-ndó ñáyi tnúhu Jèsús te dàcuaha-ni-ndó-yu, te vitna nchaa ñáyi ñuú Jerusálén ní nihí-yu tnúhu nàcuáa càháⁿ-ndó. ¿Te ná cuendá ducaⁿ quide-ndo, te cǎchí-ndó sǎ nchǔhú ndècuéchi-ndí ní sahni-ndí Jèsús-i? —cǎchí dútú cùnùu-gá xáhaⁿ-dě xii-güedé.

29 Te té Pèlú ndihí dava-gá cue téé ní táuchíúⁿ Jèsús dacuàha ñaha xií-yu ní xáhaⁿ-güedě xii cue téé cùchiuⁿ:

—Nchúhú, Yá Ndiǒxí cùnùu-gá sàndáá iní-ndí tnúhu càháⁿ-gá dàcúxí tnǔhu càháⁿ ñáyi.

30 Te nchòhó ní sata caa-ndo Jèsús núú cùrúxí te núú cùrúxí-áⁿ nì xihí-gá, dico ní dándótó ñàha Yá Ndiǒxí xii-gá. Te Yá Ndiǒxí ní sàndáá iní cue ñaní tnáhá-ndí ní xíndecu ndéé sanaha.

31 Te Yá Ndiǒxí ní xáhaⁿ-gǎ sá cùndècu Jesús xio cùha-gá cuendá taxi tnùní-gá te dacǎcu nihnu-gá ñáyi isràél núú ùhú núú ndàhú. Te ducaⁿ-ni dacǎcu nihnu-gá nchaa ñáyi na dàña nchaa sá

cuèhé sá dúhá, te cada càhnu iní-gá nchaa yíca cuèchi-yu.

³² Te ní xiní-ndí nàcuáa ní quide-gá, núu xǎn cání-ndǎ cuèndú núú nchàa ñáyiú, te Espíritú Yǎ Ndiǒxí chíndèe ñaha-xi xii-ndí càháⁿ-ndí tnúhu-gá. Te diu-ni Espíritú-gá ní sáñaha-gǎ xii nchaa ñáyiú ní sándáá iní-xi tnúhu-gá —càchí té Pèlú ndihí dava-gá-güedé xǎhaⁿ-güedě xii cue tée cùchiuⁿ.

³³ Te sátá dúcáⁿ ñǎ xáhaⁿ-güedě xii cue tée cùchiuⁿ, te ní cudééⁿ-güedě, te ní ndatnúhu-güedé sá cáhni ñaha-güedé.

³⁴ Te ñⁿ tée cùu fariséú tnàha-dé cúú-dě chiúⁿ, te nàni-dé Gamàliél, te cùu-dé mèstrú dácuàha-dé ñáyiú nàcuáa ní chídó tnùní ndí Moisés, te ío yiñúhu caháⁿ ndihí ñahá-yu xii-dé. Te ní ngúnutní-dé, te ní xáhaⁿ-dě sá ná quèe tnaa té Pèlú ndihí dava-gá-güedé quehé.

³⁵ Te ní xáhaⁿ-dě xii cue tée cùchiuⁿ:

—Nchòhó cue tée isràél, xìni ñuhu-xi sá cání vǎha iní-ndó ñasa cada-ndo ndihí cue tée-ǎⁿ.

³⁶ Chi ní cunaha ñǎ xíndecu ñⁿ tée ní xínani Tèudás, te ní cachí-dé sá cúnùu-dé, te ní cundihí-dé dàtná cúmí cièndú cue tée, te ñá ní cuini-güedé cuu ñⁿnuu-güedě ndihí cue tée cùchiuⁿ. Te ní sahani ñaha cuè tée cùchiuⁿ-áⁿ xii tée Tèudás, te ní ndihí cue tée ní xica cuu ndihí-dé ní xité nuu-güedé, te ñá túú-gǎ ní quide-güedé nàcuáa ní sani iní-güedé cada-güedé.

³⁷ Te sátá ñǎ xihí tée-áⁿ, te ní tnahá nduu nùcódó tnùní ñáyiú. Te dàvá-áⁿ ñǎ xíndecu ñⁿ tée distritú Galileá ní xínani-dě Jùdás. Te titní-güedé ní chitnahá ñahá-güedě xii-dé. Te tnàhá-dé ní sahani ñaha

tùcu cue tée cùchìuⁿ, te nchaa cue tée ní xica cuu ndìhi-dé ní xíté nuu-güedé.

³⁸ Te na càchí tnúhu-í sá dáñá-ndó cuè tée-áⁿ, te ni ñà túú nǎgá tnúhu cúñaha-ndo xì-güedé, chi núu chiuⁿ mee-güedé quidé-güedě te cuíta-güedé,

³⁹ dico núu chiuⁿ Yá Ndiöxí quidé-güedě, te vǎ ndìnìhnu chiuⁿ quide-güedé. Te núu quide-güedé chiuⁿ Yá Ndiöxí, te vǎ nàá-ndó ndìhi-güedé, chi Yá Ndiöxí nàá ndìhi-ndo sǎ dúcáⁿ xǐquide-ndo —càchí té Gamàliél xǎhaⁿ-dě xii cue tée cùchìuⁿ.

⁴⁰ Te nchaa-güedé ní cáháⁿ sá tnúhu ndáá càháⁿ-dé. Te dǎtnùní ní nacana tucu-güedé té Pèlú ndìhi dava-gá-güedé te ní caniha-güedě, te ní cáháⁿ níhi-güedé, te xǎhaⁿ-güedě sá vǎ càháⁿ-gá-güedé tnúhu Jèsús, te dǎtnùní ní dáñá ñaha-güedé cuánuhú-güedé.

⁴¹ Te ío ní cudíí ìní-güedé, chi mee Yǎ Ndiöxí ní cachí-gá sá dúcáⁿ ndòho-güedé dacuàha-güedé ñáyiú tnúhu Jèsús.

⁴² Te ìⁿ nduu ìⁿ nduu ní dácuáhá-güedě ñáyiú xítí veñúhu càhnu sá ío cùnuu ndìhi nchaa vehé-yu. Te ní xáhaⁿ-güedě xií-yu sá Jèsús cúu-gǎ Cristú Yaa ní quixi ñuyíú-a.

6

Ní ndúcú-güedě úsá cue tée cundecu dacǎhñu sá cáxí ñáyiú

¹ Te ði-u-ni dàvá-áⁿ nǐ sándáá ìní vǎi ñáyiú tnúhu Jèsús. Te cue ñáyiú grìégú ní cáháⁿ cuèhé-yu cuendá ñáyiú isràél, sá ñáyiú ðìhí ñáyiú quèè ñáyiú càháⁿ tnúhu grìégú ñá túú tnàhá sá cáxí-yu, chi ñá túú sǎñaha ìⁿnuu-güedé.

² Te cue téé úxúú ní táúchíúⁿ Jèsús dacuàha ñaha xií-yu tnúhu-gá, cue téé-ǎⁿ ñǎ cana-güedé nchaa ñáyiú sàndáá iní tnúhu Jèsús. Te ní xáhaⁿ-güedé xií-yu:

—Nchúhú chi vá cúú dácáhñu-ndí sá cáxǐ-yu, chi mee-ni tnúhu Yá Ndiöxí càháⁿ-ndí.

³ Te nchòhó cue téé ndècu ndihí-ndí ichi Xítóhó Jesucristú cáháⁿ ndihí-ndo úsá cue téé xíndecu iha, cue téé càháⁿ ndihí ñàhá-yu mee-ni tnúhu yiññuhu, cue téé ndècu ndihí Espíritú Yá Ndiöxí, mee-ni cuè téé cùtnuní váha iní-xi. Te cue téé-áⁿ cuàha-ndí-güedé chiuⁿ cada-güedé dácáhñu-güedé sá cáxǐ-yu.

⁴ Te nchúhú mee-ni Yá Ndiöxí cáháⁿ ndihí-ndí, te mee-ni tnúhu-gá dacuàha-ndí-yu —càchí-güedé xáhaⁿ-güedé xií-yu.

⁵ Te nchaá-yu ní tñí-yu tnúhu ní cáháⁿ-güedé, núu ní ndúcü-yu cue téé cada chiuⁿ-áⁿ. Te ñⁿ-dé nání-dě Těvá, te ío váha sàndáá iní-dé Yá Ndiöxí, te ndècu ndihí-dé Espíritú-gá. Te duha ní xínani dàva-gá-güedé: té Lìpé, té Pröcoró, té Nicànor, té Tìmón, té Pàrmenás, té Lǎxí téé ñuú Antiòquia téé ní sàndáá iní-xi sá dacuàha ñáyiú isràél te vitna ní sàndáá iní-dé tnúhu Jèsús.

⁶ Te úsá cue téé-áⁿ ñǎ sáháⁿ-güedé núu cuè téé úxúú ní táúchíúⁿ Jèsús dacuàha ñaha xií-yu tnúhu-gá, te cue téé úxúú-áⁿ ñǎ cáháⁿ ndihí-güedé Yá Ndiöxí, te ní sacáⁿ ndodo-güedé ndaha-güedé díquí cuè téé úsá-áⁿ.

⁷ Te ñáyiú ní sàndáá iní tnúhu Jèsús cuáháⁿ-yu tñí xichi càháⁿ-yu tnúhu-gá. Te vài-gá ñáyiú ta sàndáá iní-yu tnúhu-gá cuáháⁿ, te ní xíndecú-yu

ndihi dava-gá ñáyu dàcuaha tnúhu-gá ñuú Jerusálén. Te titní dútú ñí sándáá iní-güedé tnúhu-gá.

Ní tñi-güedé té Těvá

⁸ Te té Těvá ní quide-dé titní núú sǎ vǎ yǒo tnàhí ndàcu cada, te ní cuñúhu vǐhí-yu sá dúcáⁿ ñí quide-dé, te ducaⁿ ñí quide-dé chi ndècu ndihi-dé Yǎ Ndiǒxí chǐndèe ñaha-gá.

⁹ Te ní xǐndecu cue tée ní xóo cunu cuechi núú ñⁿ tée tàxi tnuní, te tée tàxi tnuní-áⁿ ñǎ ní xǒo dañá tnàhí-dé quee-güedé núú chíúⁿ-dě, te ní xinu-ná-güedé. Te sátá xǐǎⁿ, te ní dácáá-güedě veñúhu-güedé, te veñúhu-áⁿ sàháⁿ ñáyu ñuú Ćirené, ñáyu ñuú Alejǎndriá, ñáyu ñuú Ciliciá, ndihi ñáyu distritú Àsiá. Te nchaa ñáyu-áⁿ ñí nàá ndihí-yu té Těvá.

¹⁰ Te ñá ní ñihí-yu tnúhu cáháⁿ-yu, chi ío váha ní sáá díquí-dě nàcuáa ní xáhaⁿ-dě xií-yu, chi Espíritú Yǎ Ndiǒxí ní chindee ñàha-xi xii-dé.

¹¹ Te ní cháhu-yu cue tée ní dácúándèhnde tnúhu ní cáháⁿ té Těvá núǔ-yu. Te ní xáhaⁿ-güedě sá càháⁿ cuèhé-dé cuèndá ndíi Moisés ndihi cuèndá Yǎ Ndiǒxí.

¹² Te cuèndá sá dúcáⁿ ñí dácúándèhnde-güedé ñuú ní sándáá iní-yu, te ní cudééⁿ-yu núú tě Těvá. Te ní cudééⁿ cue tée cùu sacuéhé, te tnàhá cue tée dàcuaha ñaha xií-yu nchaa tnúhu ní chídó tnuní ndíi Moisés ní cudééⁿ-güedě. Te ní sáháⁿ-güedé ní tñi-güedé té Těvá ndécá ñàha-güedé cuáháⁿ núú quidé cuè tée cùchiuⁿ jundá, ndihi cue tée cùu sacuéhé.

¹³ Te ndècá-yu cue tée dàcuandehnde cuáháⁿ núú quidé-güedě jùndá, te ní quesaha-ni tùcu-güedé càháⁿ cuèhé-güedé, te xăhaⁿ-güedě:

—Tée-a mee-ni càháⁿ cuèhé-dé cuendá veñúhu sá ïo cùnuu, veñúhu ní cuu íí, te càháⁿ cuèhé-dé cuendá nchaa sá nĩ chídó tnùnĩ ndíi Moisés.

¹⁴ Te ní tecú dóho-ndí cächí-dé sá Jèsús tée ñúú Nazàrét dangòyo-dé veñúhu càhnu sá ïo cùnuu te vá dáñá-gă-dé cada-ndí nàcuáa ní cachí ndíi Moisés cada-ndí —cächí-güedé xăhaⁿ-güedě.

¹⁵ Te nchaa cue tée ndècu jundá ní ndacoto váha-güedé núú tě Těvá. Te ní dáyèhé-xi núú-dě dàtná quidé-xí nùú espíritú xínú cuèchi núú Yă Ndiöxí.

7

Té Těvá xăhaⁿ-dě sá ñà túú cuèchi-dé

¹ Te ní xăhaⁿ dùtú cùnùu-gá xii-dé:

—¿Ndáá tnúhu càháⁿ-güedé cuendá-n-ăⁿ? — cächí-dé xăhaⁿ-dě.

² Te té Těvá ní xăhaⁿ-dě xii-güedé:

—Nchòhó cue ñanĩ tnáhà-í ndihĩ nchòhó cue tée cùu sacuéhé, cundedóho-ndo ìⁿ tnúhu na càháⁿ-í-a. Yă Ndiöxí ío cùnuu-gá, te ní càháⁿ ndihĩ-gá ndíi Àbrahám nàcióⁿ Mesopòtamiá cùtnáhá vátá quìhĩⁿ-gá ndíi cundecu ndíi ñúú Hàrán.

³ Te ní xăhaⁿ-gă xii ndíi: “Daña-n nchàa ñanĩ tnáhà-n, te daña-n ñùhu-n, te quìhĩⁿ-n ìⁿ xichi núú dánèhé ñáhà-í cundecu-n”, duha ní xăhaⁿ Yă Ndiöxí xii ndíi Àbrahám.

⁴ Te sátá dúcáⁿ nĩ xăhaⁿ Yă Ndiöxí xii ndíi Àbrahám, te ní ndee ndíi ñúú Càldeá, te cuáháⁿ ndíi cundecu ndíi ñúú Hàrán. Te sátá nĩ xíhí tătá ndíi,

te ní xáhaⁿ Yă Ndiöxí quixi ndíi cundecu ndíi núú ndécú-ó vîtna.

⁵ Te Yă Ndiöxí ñá túú ní sãñaha-gă ni lùha ñuhu cuu cuendá ndíi núú ñí xíndecu ndíi. Te ní xáhaⁿ ndáá Yă Ndiöxí xii ndíi sá cuãñaha-gă ñuhu cuu cuendá ndíi, te na cùú ndíi, te ndóo ndihî nchaa ñaní tnáhá ndíi cacu túu ndéé cuèé-gá. Te ducaⁿ ñí xáhaⁿ-gă cuëi vátá cundècu-gá ni ñíⁿ déhe ndíi.

⁶ Te ní xáhaⁿ tùcu Yă Ndiöxí xii ndíi Àbrahám sá díú-ní ñàní tnáhá ndíi quihîⁿ-yu núú xíca cundecu-yu cúmí ciendú cuíá, te vá dáñă-yu queé-yu núú chíũⁿ-yu, te ío dandòho ñaha-güedé núú cundècú-yu. Duha ní xáhaⁿ Yă Ndiöxí xii ndíi, te ndáá ducaⁿ ñí cuu.

⁷ Te ní xáhaⁿ tùcu Yă Ndiöxí xii ndíi Àbrahám: “Yúhú dandòho-í nchaa ñayiu na dandòho ñaha xii cue ñaní tnáhá-n. Te dàvâ-áⁿ te ndee cue ñaní tnáhá-n núú cundècú-yu, te quixí-yu chiñuhu ñáhá-yu xii-í iha”, duha ní xáhaⁿ Yă Ndiöxí xii ndíi Àbrahám, te ndáá ducaⁿ ñí cuu.

⁸ Te Yă Ndiöxí ní quide ndáá-gá ndihî ndíi Àbrahám, te ní xáhaⁿ-gă xii ndíi sá cuãha-güedé sèñá ñíⁿ nchaa landú té cuendá cunáhá-yu nàcuáa ndùu sá ñí quide ndáá-gá ndihî ndíi Àbrahám. Núu xíáⁿ núú ùná nduu sá ñí cacu té Isàác déhe ndíi Àbrahám, te ní sáha ndíi sèñá ñíⁿ-dé. Te ñiu-ni ducaⁿ ñí quide tucu té Isàác déhe-dé té Jàcób, te ñiu-ni ducaⁿ ñí quide té Jàcób, chi úxúú déhe-dé ní xíndecu, te nchaa-güedé ducaⁿ ñí quide-dé. Te ndíi úxúú cue téé-áⁿ ñí cuu-güedé ñaní tnáhá-ó.

⁹ Te ñíⁿ déhe té Jàcób ní xínani-dě Chèé. Te ñá ní cùu váha ínî cue ñaní-dé núú-dě, núu ní dícò ñàha-güedé ní queheⁿ ñaha cuè téé cuáháⁿ nàcióⁿ

Ègiptú, te Yá Ndiõxí ñá ní dàña ñaha-gá xii-dé cuíta nihnu-dé.

¹⁰ Te ní chindee ñaha-gá xii-dé ní cácu-dé cútnàhá ní ndoho vìhi-dé. Te tée yìndaha Egiptú ío ní cudíí ìní-dé té Chèé, te ní cutnùní ìní-dé sá ïo váha túha té Chèé, te ducaⁿ ñí cutnùní ìní-dé, chi Yá Ndiõxí ní chindee ñaha-gá xii té Chèé. Te ní xáhaⁿ tõe yìndaha Egiptú xii té Chèé sá díú tẽ Chèé coo-dé gobièrnú Ègiptú, te taxi tnùní-dé nchaa ñáyiú xìnu cuechi núú tõe yìndaha Egiptú-án.

¹¹ Te ní quíhu tnamá nihí nàcióⁿ Ègiptú ndihí nàcióⁿ Cànáá, te ío ní ndohó-yu. Te nchaa ñaní tnáhá-ó ñí xíndecu ndéé sanaha ñá ní xõo ñhí-gá-yu sá cáxí-yu.

¹² Te ní níhí tẽ Jàcób tnúhu sá ìo triú Ègiptú, núu ní tendaha-dě cue déhe-dé ní sáháⁿ-güedé ní sânguaaⁿ-güedé triú-án, te dāvá-án ñí sáháⁿ cue ñaní tnáhá-ó xito díhna nuu nàcióⁿ Ègiptú.

¹³ Te xito cùu uú cuáháⁿ-güedé, te ní xáhaⁿ tẽ Chèé sá ñaní-dé cúu-güedě. Te tée yìndaha Egiptú ní cutnùní ìní-dé sá díú-ní ñaní té Chèé cúu-güedě.

¹⁴⁻¹⁵ Te ní cana té Chèé tātá-dě té Jàcób ndihí nchaa ñaní tnáhá-dě. Te cùu-xi datná únídico sáhúⁿ-yu ndèca té Jàcób cuáháⁿ nàcióⁿ Ègiptú núú ndécú tẽ Chèé, te xíaⁿ ñí quexió-yu ní ngóo-yu. Te yàcáⁿ ní xihí té Jàcób ndihí nchaa déhe-dé cue ñaní tnáhá-ó.

¹⁶ Te sátá ñí cuu titní cuíá, te ní natava-güedé yiqui ndíi Jàcób ndihí nchaa déhe ndíi nchìdo-güedé cuáháⁿ ñuú Sìquém. Te ndíi Àbrahám sa ní cuu titní-gá cuíá sã ñí nacuaaⁿ ndíi ñuhu núú cuè déhe

ndíi Hà mòr. Te xíaⁿ nchìi yaú ní nachindúxi-güedé yiqui-áⁿ.

17 Te cútnàhá vátá nátàva-gá-güedé yiqui cue ndíi, te sa ta tnàhá yatni cada Yá Ndiöxí nàcuáa ní xáhaⁿ-gã xii ndíi Àbrahám cada-gá sá cúú-xí ñăyiu isràél ndécú Ègiptú, te ta cãyá víhĩ-yu cuáháⁿ.

18 Te dàvã-áⁿ chi ingá téé yìndaha nacióⁿ Ègiptú, te ñá túú-gã ní xìní-dé nása ní xóo cada ndíi Chèé.

19 Te téé yìndaha Egiptú ñá ní quide ndáá-dé, chi ío ní dándóhó-dě ñaní tnáhã-ó ní xìndecu dàvã-áⁿ. Te ní táúchíúⁿ-dě sá xócuíñĩ-yu dândóo-yu déhe yiquiⁿ cuendá ndihĩ-güexi cuú.

20 Te dàvã-áⁿ ñĩ cacu té Moisés, te ío ní cudíi ñĩ ñáhã Yã Ndiöxí xii-dé. Te ní xìndecu ndihĩ ñaha ñánã-dě ndihĩ tãtã-dě únĩ-ni yóo.

21 Te ndèca ñáhã-yu cuáhãⁿ ingá xichi, te yàcãⁿ ní dándóo ñáhã-yu xii-dé, te ní naníhĩ ñáhã déhe yoco téé yìndaha Egiptú, te ní xito-xi-dé dàtnã xító-xí ñⁿ déhe mee-xi ñĩ xito-xi-dé ndéé ní sahnu-dé.

22 Te ní cutúha-dé nchaa sá xìní cue téé ègiptú, te ío váha ní sáá díquí-dě tnúhu cáháⁿ-dè ndihĩ nchaa sá cádá-dě.

23 Te cútnàhá ndécú-dě údico cuíã-dě, te ní cachí-dé sá quihĩⁿ-dè cáháⁿ ndihĩ-dé cue ñaní tnáhã-dě ñăyiu isràél.

24 Te ní xìní-dé ní caniha ñⁿ téé ègiptú xii ñⁿ téé isràél, te ñá ní cùndee iní-dé cundehe-dě nõu ní sáhãⁿ-dè ní chindee-dě téé isràél, te ní sahni-dé téé ègiptú,

25 chi ní cachí Yã Ndiöxí sá díú-dě dacãcu-dé ñaní tnáhã-dě ñăyiu isràél núú cuè téé ègiptú. Te ní sani

iní-dé sá cùtnùnì iní-yu nàcuáa ní xáhaⁿ Yă Ndiöxí xii-dé, dico ñá túú ní cùtnuní iní-yu.

26 Te nduu tněé ní xiní-dé nàá úú cue téé isràél, te ñá túú ní tnàhá iní-dé nàá-güedé nūu ní xáhaⁿ-dē xii-güedé: “¿Ná cuendá ducaⁿ xǐnàá-ndó? ¿Náa ñá díú ndimee-ndo núu ducaⁿ xǐnàá-ndó?” Duha ní xáhaⁿ tē Moisés xii-güedé.

27 Te téé ndècuéchi ní sáháⁿ-dé ní chindaha nìhnu-dé té Moisés ìⁿ xio, te ní xáhaⁿ-dē: “¿Ná cúú yòhó nūu véxi-n tàxi tnuní ñáhá-n?”

28 Te tnàhá-ni tucu yúhú cahni-n dàtná ní sahani-n tēe ègiptú icu càhaⁿ-n á”, duha ní xáhaⁿ-dē xii té Moisés.

29 Te sá dúcáⁿ ñǐ cáháⁿ téé isràél nūu ní yùhú té Moisés ní xinu-dé cuáháⁿ-dé ní sáá-dé nàcióⁿ Mèdián. Yàcáⁿ ní ngóo-dé, te yàcáⁿ ní tnándaha-dé, te ní cacu úú déhe téé-dé.

30 Te sá táⁿ ñǐ xínu údico cuíá, te ní sáháⁿ té Moisés ìⁿ xio yucu Sinài. Te yàcáⁿ ní xiní-dé ìⁿ tnutáú nchìcúⁿ ñuhú, te xití itá ñuhú-áⁿ ñǐ xiní-dé yíhí ìⁿ espíritú xínú cuèchi núú Yă Ndiöxí.

31 Te òré ní xiní-dé sá yíhí-xí xití itá ñuhú-áⁿ, te ní cuñúhu vîhi-dé sá ñǐ xiní-dé espíritú-áⁿ xití itá ñuhú-áⁿ, te ní sàndehe-gá-dé, te ní xíndéhé vâha-dé. Te ní tecú dóho-dé ní cáháⁿ Yă Ndiöxí, te xáhaⁿ-gă xii-dé:

32 “Yúhú cúù-í Ndiöxí ní cáháⁿ ndihí cue ñaní tnàhá-n nděé sanaha, ndíi Àbrahám ndihí ndíi Isàác ndihí ndíi Jàcób, ndihí dava-gá cue ñaní tnàhá-n. Nchaa cue ndíi-áⁿ ñǐ xóo cáháⁿ ndihí-í.” Duha ní xáhaⁿ-gă xii té Moisés. Te ní quidi ñaha-xi xii té Moisés sá ñǐ yùhú-dé, te ñá ní cùyi-gá-dé cundehe-dē tnutáú nchìcúⁿ ñuhú-áⁿ.

33 Te Yá Ndiöxí ní xáhaⁿ-gă xii-dé: “Queñuhu chàú-n, chi núú ñúhú nǐ cuu íí nútñí-n.

34 Te yúhú ndéhè-í sá ïo ndòho nchaa ñáyiu cùu cuendá-í, ñáyiu ndècu nacióⁿ Ègiptú. Te ní tecú dóho-í sá ïo ndàhú xícáháⁿ-yu, núu xíáⁿ véxi-í càchí tnúhu-í sá nùhú-n nàcióⁿ Ègiptú cuendá ndeñùhú-n-yu yàcáⁿ.” Duha ní xáhaⁿ Yá Ndiöxí xii té Moisés.

35 Te ñá ní sàndáá iní-yu té Moisés ndéé díhna, chi ní xáhăⁿ-yu: “¿Ná cuendá véxi-n tàxi tnuní ñáhá-n xii-ndí?” Duha ní xáhăⁿ-yu xii té Moisés. Te ñu-ni té Moisés ní tendaha ñàha Yá Ndiöxí ní sáháⁿ-dé dacăcu-dé ñáyiu isràél nàcióⁿ Ègiptú cuèi ñá ní sàndáá iní ñáhăⁿ-yu xii-dé. Dico ní taxi tnùnì-dé-yu, chi ducaⁿ nǐ xáhaⁿ-gă òré ní xiní-dé espíritú xínú cuèchi núú-gă xití tnutàú nchìcúⁿ ñuhú.

36 Te té Moisés ní ngüíta-dé ní quide-dé sá vǎ yǒo tnàhí ndàcu cada, te ní cuñúhu vǐhí-yu sá dúcáⁿ nǐ quide-dé, te ducaⁿ nǐ quide-dé Ègiptú ndihí Lámár Tícuèhé. Te ní ngódó núú-dě núú-yu ní queé-yu Ègiptú cuáháⁿ-yu ìⁿ ichi xití yucu núú vǎ yǒo tnàhí ndècu, te ní xíhi-yu údico cuíá xití yucu-áⁿ, te xíáⁿ nǐ xóo cada-dé sá vǎ yǒo tnàhí ndàcu cada.

37 Te ñu-ni té Moisés ní xáhaⁿ-dě xii cue ñaní tnáhá-dě dàvá-áⁿ: “Yá Ndiöxí cada-gá te coo ìⁿ ñaní tnáhá-ndó ndéé cuèé-gá, te tée-áⁿ cǎháⁿ-dé tnúhu-gá núú-ndó dàtná cuìní-ndó nǐ cachí-gá quidé yúhú, te ío xìni ñuhu-xi cundedóho-ndo tnúhu cáháⁿ-dé”, duha ní xáhaⁿ tǎ Moisés xii-yu dàvá-áⁿ.

38 Te ñu-ni té Moisés ní xíndecu ndihí-dé ñáyiu

israèl xití yucu, te ní sáa-dé yucu Sinài, te xíaⁿ ñĩ quixi ìⁿ espíritú xínú cuèchi núú Yá Ndiöxí ní cáháⁿ ndihì ñaha-xi xii-dé, te yàcáⁿ ní dácuahá ñaha-xi tnúhu-gá, te ñiu-ni tnúhu-áⁿ ñĩ ndóo dàcuaha-o.

³⁹ Te cue ñaní tnáhá-ó ñĩ xíndecu ndéé sanaha ñã ní sàndáá iní-yu té Moisés, te ñá ní ndée iní ñáhã-yu xii-dé, chi ní cuiní-yu nuhú tucú-yu ñuú Ègiptú cundecú-yu.

⁴⁰ Te òré ndécú tẽ Moisés yucu ní xáhãⁿ-yu xii ñaní-dé té Àrón: “Cadúha-n ìⁿ úú ndiöxí díhúⁿ cuááⁿ codonùu núú-ó cùhuⁿ-o ichi, chi ñá túú cùtnuní iní-ó ndéé ichi cuáháⁿ té Moisés, té yòdo nuu núú-ó ndùu ní quee-o Ègiptú”, duha ní xí-yu té Àrón.

⁴¹ Te dàvá-áⁿ ñĩ cadúha-güedé ìⁿ chěhlu mee-ni díhúⁿ cuááⁿ, te ní sahani-güedé ìⁿ úú quiti nchìto ní quide càhnu-güedé chěhlu-áⁿ. Te ío ní cudí^í iní-yu quiti-áⁿ, chi ní cachí-yu sá díú-ni ndiöxí cúú-dí.

⁴² Te sá dúcáⁿ ñĩ quidé-yu, xíãⁿ ní dáñá ñaha Yá Ndiöxí xii-yu. Te ní dáñá-gã ní xóo cada càhnú-yu nchícanchii, ndihì yóó, ndihì nchaa chódíní. Te duha ní chídó tnùní ìⁿ téé ní xóo cáháⁿ tnúhu Yá Ndiöxí ndéé sanaha nàcuáa ní xáhaⁿ-gã xii ñáyiú dàvá-áⁿ:

Nchòhó ñáyiú israèl, ní cuu údico cuía yíhí-ndó yùcu,

te ní sahani-ndo quiti-ndo ní quide càhnu ñaha-ndo xii-í cáháⁿ-ndó, dico ñáhá chi ní sahani-ndo-güèdì ní quide càhnu-ndo sá ñĩ cadúha mee-ndo.

⁴³ Te ní cadúha-ndo ìⁿ veñúhu líhli,

te ní sanutní-ndo Mòlóc sá càchí-ndó cùu
 ndiòxí-ndó xìca nchido-ndo xití yucu,
 te ní cadúha-ndo ìⁿ chódíní, te quití-ãⁿ càchí-ndó sã
 cúú-dí ndiòxí Rènfan,
 te ndi ndùú sá ñí cadúha-ndo-ãⁿ ñí quide
 càhnu-ndo.
 Te cuèndá sá dúcáⁿ ñí quide-ndo te yúhú queñuhu
 ñaha-ĩ xii-ndo quíhíⁿ-ndó cùndecu-ndo ingá
 xio nàcióⁿ Babiloniá.
 Duha ní xáhaⁿ Yã Ndiòxí xií-yu, te ducaⁿ ñí chídó
 tnùní téé ní xóo cáháⁿ tnúhu-gá.

44 Te xití yucu-áⁿ ñí dácáá-güedě ìⁿ veñúhu
 vehe dóó. Te vehe-áⁿ ñí cuu-xi ìⁿ sá cútnùní
 iní-yu sá Yã Ndiòxí ndécú ndíhi ñaha-gá xií-yu. Te
 vehe-áⁿ ñí dácáá-güedě nàcuáa ní xáhaⁿ Yã Ndiòxí
 xii té Moisés, chi ní dánèhé ñáhá-gã xii-dé nàcuáa
 dacàa-güedé.

45 Te sátá ñí xíhí nchaa cue téé-áⁿ, te ní ndóo
 ndíhi nchaa déhe-güedé veñúhu-áⁿ. Te ní xido
 tucu-güedé veñúhu-güedé cuáháⁿ-güedé, te cuáháⁿ
 ndíhi-güedé té Jòsué núú cùndécú-yu. Te sátá ñí
 quexiò-yu, te ní dácúnũ-yu ñáyíu dii ñùú-xi-áⁿ chi
 mee Yã Ndiòxí ní chindee ñàha-gá xií-yu. Te sátá
 ñí ndíhi nchaa ñáyíu ní xica nchido veñúhu dóó-ãⁿ
 ñí xíhí, te ní ndóo ndíhi dava-gá-yu. Te ducaⁿ-ni
 ndècu-xi ní cacu té Dàvíí, téé ní xíndaha ñàha
 xií-yu.

46 Te Yá Ndiòxí ní cudíí víhí iní-gá té Dàvíí. Te ní
 xícáⁿ tnúhú-dě núú-gã ñùu cuu dacàa-dé veñúhu
 cuu cuèndá-gá, chi ìⁿ-ni Yá Ndiòxí ní xóo cada
 càhnu té Dàvíí ndíhi té Jàcób, ñaní tnáhá-ó ñí xíndecu
 ndéé sanaha vìhi-gá.

47 Te Yá Ndiõxí ñá ní dàña-gá dacàa té Dàvíí veñúhu-gá dico déhe-dé té Salòmón, chi ní dáñá-gã ní dácáá-dě veñúhu cuu cuèndá-gá

48 cuëi ñá túú sàcúndecu-gá veñúhu dàcaa cue tée ñuyíú-a, chi nděni xíaⁿ ndécú-gã chi espíritú cúú-gã. Te duha ní chídó tnùní tée ní xóo cáháⁿ tnúhu Yá Ndiõxí ndée sanaha nàcuáa ní cáháⁿ-gá:

49 Yúhú táxí tnùní-í andiũ ndìhi ñuyíú, te xíaⁿ nũu nchòhó vá ndácú-ndó chìhi ñaha-ndo xití veñúhu dàtná quídě-yu sá càchí-yu cùu ndiõxí-yu ní cadúha-yu.

Te ñá túú xìni ñuhu-í núú ndétátú-í,

50 chi yúhú ní cadúha-í nchaa sá ió ñuyíú-a.

Duha ní cáháⁿ Yá Ndiõxí, te diu-ni ducaⁿ ñi chídó tnùní tée ní xóo cáháⁿ tnúhu-gá –duha ndũu nchaa tnúhu ní xáhaⁿ tẽ Těvá xii-güedé.

51 Te ní xáhaⁿ tùcu-dé:

–Nchòhó, ío sàá iní-ndó chi quide-ndo datná quídé ñáyiũ ñá túú cùu ñáyiũ isràèl chi ñá túú tédóho-ndo tnúhu càháⁿ Yá Ndiõxí, chi ñá cuíní-ndó quìndáá iní-ndó tnúhu-gá, mee-ni cùu úhú iní-ndó Espíritú-gá dàtná ní xóo cada cue ñaní tnáhá-ndó ñi xíndecu ndée sanaha.

52 Chi cue tée-áⁿ ìo ní xóo dandòho-güedé nchaa cue tée ní xóo cáháⁿ tnúhu Yá Ndiõxí ndée sanaha. Te ní sahani-güedé nchaa cue tée ní cáháⁿ sá quixí Crístú ñuyíú-a, te Yaá-áⁿ ñà túú cuëchi-gá. Te diu-ni ducaⁿ ñi quide-ndo Crístú cútnáhá ní quixi-gá ñuyíú-a, chi ní sáha cuèndá-ndó-gã núú cuè tée ní cuu úhú iní ñáhá xii-gá ní sahani ñaha-güedě.

53 Te ndècu ndìhi-ndo tnúhu ní chídó tnùní ndíi Moisés nàcuáa ní xáhaⁿ espíritú xínú cuëchi núú Yá Ndiõxí xii ndíi, te ni dùcaⁿ ñá túú sàndáá

iní-ndó tnũhu-áⁿ nõu ní sahani-ndo Jèsús. Te ðiu-ni tnũhu-áⁿ ndécú ndĩhi-ndo ndéé vitna –càchí té Těvá xãhaⁿ-dě xii-güedé.

Ní sahani-güedé té Těvá

⁵⁴ Te sá dúcáⁿ ñĩ xãhaⁿ tě Těvá xii-güedé, te ní cudééⁿ víhí-güedě núú-dě, núu ní quide rúhñú-güedě núhu-güedé sá sätú iní-güedé.

⁵⁵ Te té Těvá ndécú ndĩhi-dé Espíritú Yã Ndiõxí, te ní ndacoto váha-dé andiu, te ní xiní-dé súúní ðátásaⁿ-xi núú ndécú Yã Ndiõxí, te ní xiní-dé Xítóhó Jesucristú nútñĩ-gá xio cùha Yá Ndiõxí.

⁵⁶ Te ní xãhaⁿ tě Těvá xii-güedé:

–Chí cündèhe andiu chí yúhú ndéhè-í Xítóhó Jesucristú nútñĩ-gá xio cùha Yá Ndiõxí, te ðiu-gá cúú-gã ñani tnáhá-ndó nchàa-ndo –cachí-dé xãhaⁿ-dě.

⁵⁷ Te ní sadí-güedé dóho-güedé cuendá sá ñã ní tnáhá iní-güedé cundedóho-güedé tnũhu càháⁿ-dé, te uuⁿi ní cuáá-güedé, te ní taxi ndaha ñaha-güedé xii-dé

⁵⁸ ndécá ñaha-güedé cuáháⁿ ndéé ñⁿ xio yuhu ñúú, te yàcáⁿ ní sãñaha-güedě yúú xii-dé. Te ndècu ñⁿ tée cuechi nàni-dé Sàulú, te tée-áⁿ ñĩ quide cuendá-dé dóó-güedě cuendá ní nune ndaha-güedé ní sãñaha-güedě yúú xii té Těvá.

⁵⁹ Te òré sãñaha-güedě yúú, te ní cáháⁿ ndĩhi-dé Xítóhó Jesucristú te xãhaⁿ-dě:

–Yòhó Xítóhó Jesucristú, naqueheⁿ-n iní-í –càchí-dé xãhaⁿ-dě xii-gá.

⁶⁰ Te ní ngüñĩ xítí-dě, te níhi ní cáháⁿ-dé, te xãhaⁿ-dě:

—Yòhó Xítóhó Jesucrìstú, vá técuěchi-n cuè téa-sá dúhá quide ñaha-güedé xii-í —càchí-dé xǎhaⁿ-dě xii-gá.

Te xǎⁿ-nǎ ní cáháⁿ-dé, te ní xíhí-dé.

8

Té Sàulú chíhí-dě ñáyiú sàndáá iní-xi tnúhu Jèsús vecaá

¹ Te té Sàulú ní nduu vétú iní-dé sá ñǎ sahni-güedé té Těvá.

Te ñu-ni nduu-ǎⁿ ñǎ cuu níhi cuendá nchaa ñáyiú sàndáá iní-xi tnúhu Jèsús ñuú Jerusàlén. Te ní ndihí-yu ní xité nuu cuáháⁿ-yu distritú Júdeá ndihí distritú Sàmariá. Te cue téa ní táuchíúⁿ Jèsús dácuàha ñaha xii-yu tnúhu-gá ní ndóo-güedé ñuú Jerusàlén.

² Te nchaa cue téa càháⁿ ndihí Yá Ndiöxí ní chindúxi-güedé ndíi Těvá. Te ío ní ndáhyú ñáyiú ní sàndáá iní tnúhu Jèsús sá ñǎ xíhí ndíi.

³ Te té Sàulú ío dándoho-dé-yu, chi ndi vehe ndi vehe cuáháⁿ-dé cuátni-dé cuèi téa cuèi ñadìhí ndécá-dě cuáháⁿ vecaá.

Càháⁿ-yu tnúhu Yá Ndiöxí distritú Sàmariá

⁴ Te nchaa ñáyiú ní xité nuu cuáháⁿ-yu càháⁿ-yu tnúhu Jèsús nchaa núú quexió-yu.

⁵ Te té Lìpé cuáháⁿ-dé distritú Sàmariá càháⁿ-dé tnúhu Xítóhó Jesucrìstú Yaa ní tendaha Yá Ndiöxí ní quixi ñuyú-a.

⁶ Te ío vài núú sǎ vǎ yõo tnàhí ndàcu cada ní quide-dé, te ní cuñúhu vèhí-yu, te ní xíndedóho váha-yu nchaa tnúhu ní cáháⁿ-dé.

7 Te vâi ñáyiu yîhi ñaha espíritú cúndîhi yucu ñávâha ní queñuhu-dé nchaa espíritú-áⁿ yiqui cùñú-yu, te ní cana saa-xi òré ní ndee-xi yiqui cùñú-yu cuáháⁿ-xi, te ní ndúha-yu. Te vâi ñáyiu cùhú ñá cúú-gă candá nihnú-yu ndîhi ñáyiu yacua ní quide tátna-dé, te ní ndúha-yu.

8 Te sá dúcáⁿ ñî cáháⁿ-dé tnúhu Jèsús te ní quide tátna-dé-yu, xîăⁿ ío ní cudîî iní ñáyiu ñuú-áⁿ.

9 Te diu-ni ñuú-áⁿ ndécú îⁿ téé nàni Xímú, te téé-áⁿ xîní-dé cada ndùu-dé, te ní cuu naha dùcaⁿ quide-dé, te ní xóo cuñúhu ñáyiu distritú Sàmariá sá dúcáⁿ quide-dé, te ní cachí-dé sá díú-ní-dě cúnùu.

10 Te nchaa ñáyiu cuêi ñáyiu cuica te cuêi ñáyiu ndàhú ío nèhé-yu sá yîñùhu núú-dě, te xîtnàhá-yu:

—Tée-ăⁿ ío chîndee ñaha Yá Ndiôxí xii-dé nùu vâi núú să quidé-dě —càchí-yu xîtnàhá-yu.

11 Te ní sándáá iní-yu nàcuáa ní xóo cada ndùu-dé, te ní xóo cuñúhu vîhí-yu, te ní cuu naha dùcaⁿ-ni dandahú ñáhá-dě xîí-yu.

12 Te té Lìpé ní cáháⁿ-dé tnúhu Xítóhó Jesucristú, te ní xáhaⁿ-dě xîí-yu sá Yă Ndiôxí cuíní-gá ndîhu ndaha ñàha-gá xîí-yu. Te cuêi téé cuêi ñadîhí ní sándáá iní-yu tnúhu-gá, te ní sanduté-yu.

13 Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndîhi té Lìpé, te ní cuñúhu-dé chi tîtní núú să vă yôo tnàhí ndàcu cada ní quide té Lìpé, te ní cuñúhu vîhi nchaa ñáyiu.

14 Te dava-gá cue téé ní táúchíúⁿ Jèsús dacuàha ñaha xii ñáyiu tnúhu-gá ní níhí-güedě tnúhu sá ñáyiu distritú Sàmariá ní sándáá iní-yu tnúhu Yá

Ndiöxí. Te ní tendaha-güedě té Pèlú ndihí té Juàá cuáháⁿ-güedé distrítú Sámariá.

15 Te ní quexìo-güedé, te ní cáháⁿ ndihí-güedé Yă Ndiöxí ní xícáⁿ-güedé Espíritú-gá quixi cundecu ndihí-yu.

16 Chi ni ĩⁿ-yu vátá sàá-gá Espíritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé.

17 Te òré ní sacáⁿ ndodo-güedé ndaha-güedé díquǐ-yu, te ní quexìo Espíritú-gá ní ngúndecu ndihí-yu.

18 Te ní xiní té Xímú nàcuáa ní quide-güedé ní quexìo Espíritú-gá ní ngúndecu ndihí-yu, te cuíní-dé cuáñaha-dě díhúⁿ xii té Pèlú ndihí té Juàá ní cùu.

19 Te ní xáhaⁿ-dě:

—Chindee ñàha-ndo cuendá nděda-ni càá-yu cacáⁿ ndodo-í ndaha-í díquǐ-yu, te níhí-yu Espíritú Yă Ndiöxí cundecu ndihí-yu —càchí-dé xăhaⁿ-dě xii-güedé.

20 Te té Pèlú ní xáhaⁿ-dě xii-dé:

—Yòhó cuíta nihnu-n ndihí díhúⁿ-n, chi cuíní-n cuàaⁿ-n sá văha quide Yá Ndiöxí.

21 Yòhó vá cúú càda-n chiuⁿ quide-ndí, chi ñá túú ndècu váha iní-n nǔú Yă Ndiöxí.

22 Te vá dúcáⁿ căháⁿ-n, chi ïo nèhé căháⁿ-n să dúcáⁿ căháⁿ-n. Te căháⁿ ndàhú-n nǔú Yă Ndiöxí sá ná cádá căhnu iní-gá tnúhu ní căháⁿ-n.

23 Te yúhú sa xìní-í sá ïo úhú iní-n, chi mee-ni să cuèhé sá dúhá chido nuu-n quide-n —cachí té Pèlú xăhaⁿ-dě xii té Xímú.

24 Te ní xáhaⁿ tě Xímú xii-güedé:

—Cáháⁿ ndàhú-ndó nǔú Yă Ndiöxí sá ñà túú ñă tnahá-í sá dúcáⁿ ñí cáháⁿ-í —càchí-dé xăhaⁿ-dě.

²⁵ Te té Pèlú ndihí té Juàá ní cáháⁿ-güedé tnúhu Yá Ndiöxí núú ñăyiu ñuú-áⁿ. Te ní xáhaⁿ-güedé nchaa nàcuáa ní quide Jèsús ní xiní-güedé òré ní xica cuu-gá ñuyíú-a. Te ní tñi-güedé ichi cuánuhú-güedé ñuú Jerusàlén, te ní yáha-güedé tñí ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndihí ìⁿ téé ñuú Etiòpiá

²⁶ Te ìⁿ espíritú xínú cuèchi núú Yă Ndiöxí ní quexìo-xi ñuú Jerusàlén ní xáhaⁿ-xi xì té Lìpé:

—Cada túha-n chí quée nuu-n ñuú Gázá, dico mee-ni xítí yucu cuáháⁿ ichi —càchí-xi xăhaⁿ-xi xì-dé.

²⁷ Te ní xica-dé cuáháⁿ-dé, te ní natnahá-dé ìⁿ téé nacióⁿ Etiòpiá ñúhú-dě ichi. Te cùu-dé tesorèrú xínú cuèchi-dé núú ìⁿ ñadìhí ñaha yíndaha nacióⁿ Etiòpiá, te ñaha-áⁿ nání-áⁿ Cándacé.

²⁸ Te téé etiòpiá-áⁿ ñí sáháⁿ-dé ñuú Jerusàlén ní cáháⁿ ndihí-dé Yă Ndiöxí, te ñuhu-dé ichi cuánuhú-dé ñuú-dé ñúhú-dě carrètá, te dàcuaha-dé tnúhu ní chídó tñí ndí Chàíá téé ní xóo cáháⁿ tnúhu Yá Ndiöxí ndéé sanaha.

²⁹ Te ní xáhaⁿ Espíritú Yă Ndiöxí xii té Lìpé:

—Quíhíⁿ tuha-n càrretá-ăⁿ —càchí Espíritú-gá xăhaⁿ-xi xì-dé.

³⁰ Te té Lìpé ní sátuha-dé carrètá-áⁿ, te ní tecú dóho-dé nàcuáa càháⁿ téé etiòpiá-áⁿ, téé ñuhu carrètá-áⁿ dácuaha-dé nàcuáa ní chídó tñí ndí Chàíá. Te ní xáhaⁿ té Lìpé xii téé etiòpiá-áⁿ:

—¿Técú tñí-n nchàa tnúhu dàcuaha-n-áⁿ? —càchí té Lìpé xăhaⁿ-dě xii-dé.

31 Te ní xáhaⁿ t̃ee etiòpiá:

—¿Nása tecú tnùn-í te vá yõo dànèhé ñáhá xì-í? Ta quène iha coo-n chi danèhé ñáhá-n —càchí-dé x̃ahaⁿ-d̃e xii té Lìpé.

Te cuásaá té Lìpé núú carretà ní ngóo-dé.

32 Te ndèdóho-dé nàcuáa dàcuaha tée etiòpiá-áⁿ nàcuáa ní chídó tnùn-í ndí Chàíá núú tutú Yã Ndiõxí núú c̃achí-xi:

Dàtná quidé ìⁿ mbéé cada-dé òré candeca ñaha-güed̃e xii-dé quíhíⁿ cahni ñaha-güed̃e chi ñá túú nã cada-dé,

dàtná cuñí-ndó quide mbéé òré dèté-di ñá túú ndàhí-di ducaⁿ càda-dé òré cahni ñaha-güed̃e chi ni vã càháⁿ-dé.

33 Te mee-ni cùdiquí ndeé ñáhá-güed̃e xii-dé, te ni vã ndúcú tñhu-güed̃e núú-d̃e ñu ndáá ndècuéchi-dé.

Te ío cuu nduu cuihna ìní cue ñaní tnáhá-d̃e, chi cahni ñaha-güed̃e xii-dé ñuyíú-a.

Duha càháⁿ tutú ní dácuáhá t̃ee etiòpiá ní xíndedóho té Lìpé.

34 Te ní xáhaⁿ tùcu tée Etiòpiá xii té Lìpé:

—Cundee ìní-n c̃achí tñhu-n yòo cacunehe tée ní cáháⁿ tñhu Yá Ndiõxí ndeé sanaha, núú càháⁿ-dé cuendá méé-d̃e àdi cáháⁿ-dé cuendá ingá ñáyiu —càchí tée etiòpiá-áⁿ x̃ahaⁿ-d̃e xii té Lìpé.

35 Te té Lìpé ní cani-dé cuendú núú t̃ee etiòpiá nàcuáa ní cáháⁿ ndí Chàíá nàcuáa cada Jèsús òré quixi-gá ñuyíú-a. Te ní xáhaⁿ-d̃e nàcuáa nduu tñhu Jèsús ndíhi nàcuáa ní quide-gá.

36 Te ñ̃hu-güed̃e ichi cuáháⁿ-güed̃e ní naníhí-güed̃e ìⁿ xichi núú ñúhú ndùte, te ní xáhaⁿ t̃ee etiòpiá:

—Iha ñùhu ndute, ¿te vá cúú cuàndute-í iha-ǎⁿ? —
càchí-dé xǎhaⁿ-dě xii té Lìpé.

³⁷ Te xǎhaⁿ tē Lìpé:

—Te núu sàndáá ndisa iní-n Jèsús, te cuu cuan-
dute-n —càchí-dé xǎhaⁿ-dě.

Te ní xáhaⁿ tēe etiòpiá:

—Sàndáá ndisa iní-í sá Dēhe Yá Ndiǒxí cúú Xítóhó
Jesucrìstú —càchí-dé xǎhaⁿ-dě.

³⁸ Te ní ngani-dé carretà, te ní nuu-güedé ndi
ndùú-güedé, te cuánguee-güedé xití ndute, te ní
dácuándüte ñaha té Lìpé xii-dé.

³⁹ Te òré ní nene-güedé xití ndute, te ndèca ñaha
Espíritú Yá Ndiǒxí xii té Lìpé cuáháⁿ. Te ñá túú ní
xìní tēe ní sandute-áⁿ ndéé ichi cuáháⁿ té Lìpé. Te
ío ní cudíí iní-dé sá ñi natuha-dé ichi Yá Ndiǒxí, te
cuándaa-dé núú carretà-dé cuánuhú-dé.

⁴⁰ Te ní quexìo té Lìpé ñuú Àzotó, te ndi tnahá
ñuú ndi tnahá ñuú cuáháⁿ-dé càháⁿ-dé tnúhu Yá
Ndiǒxí, te ní yáha-dé cuáháⁿ-dé ní quexìo-dé ndéé
ñuú Cèsareá.

9

Té Sàulú ní tuha-dé ichi Xítóhó Jesucrìstú (Hch. 22:6-16; 26:12-18)

¹ Te té Sàulú mee-ni càháⁿ cuèhé-dé cuèndá ñáyiú
ní sàndáá iní tnúhu Jèsús, te cuìní-dé cahni ñaha-dě
xii-yu. Te ní sáháⁿ-dé núú dütú cúnù-gá,

² te ní xáhaⁿ-dě sá cádüha dütú-ǎⁿ ñⁿ tutú
canehe-dé quíhíⁿ cuáha-dé cue tēe xíndeé nchito
veñúhu ñuú Dámascú, chi cuìní-dé tnü-dé nchaa
ñáyiú dàcuaha tnúhu Xítóhó Jesucrìstú candeca
ñaha-dě quíhíⁿ ñuú Jerusalén.

3 Te ní xica-dé cuáháⁿ-dé tá cùyatni-dé ñuú Dàmascú, te uuⁿni ní quee ñuhú andiu, te ní dáyèhé-xi ndéé núú nútníⁿ-dé.

4 Te ní nduá-dé ndéé ñuhu, te ní tecú dóho-dé càháⁿ ñⁿ sá càháⁿ núú ññu, te xǎhaⁿ-xi xii-dé:

—Yòhó Sàulú, ¿ná cuendá cúú ùhú iní ñáhá-n xii-í te dándoho ñaha-n? —cachí sá càháⁿ-áⁿ xǎhaⁿ-xi xii-dé.

5 Te ni xáhaⁿ-dě:

—¿Ná cúú yòhó sá càháⁿ-áⁿ-i? —càchí-dé xǎhaⁿ-dě.

Te ní xáhaⁿ sǎ càháⁿ xii-dé:

—Yúhú cúú-í Jèsús tée cùu úhú iní-n. Te ío dándoho-n mee-n, chi dàtná quidé ndìcutu quide-n, chi quiⁿ-áⁿ ññu na cǔxi-güedé-di pùyá te sǎha-di patadá núú-xi, te quide úhú-di mee-di. Te ducaⁿ sǎtnhá-xi cùu yohó chi ñá túú sàndáá iní ñáhá-n xii-í —càchí sá càháⁿ-áⁿ xǎhaⁿ-xi xii-dé.

6 Te té Sàulú ní quidi ñaha-xi xii-dé sá ñi yùhú-dé, te ní xáhaⁿ-dě:

—Xítóhó Jesucrístú, ¿te ná cuíní-n càda-í-i? —càchí-dé xǎhaⁿ-dě.

Te Jèsús ní xáhaⁿ-gǎ xii-dé:

—Ndacóo, te quiⁿ-áⁿ ññu-ǎⁿ, te yàcáⁿ tecú tnúhu-n ñǎ cúú sǎ cáda-n —càchí-gǎ xáhaⁿ-gǎ xii-dé.

7 Te cue tée cuáháⁿ ndihí té Sàulú ní tecú dóho-güedé càháⁿ ñⁿ sá càháⁿ, dico vá yòo tnàhí ni xini-güedé, te ní yùhú víhí-güedé, te ñá túú tnàhí ni cǎháⁿ-güedé.

8 Te ní ndacóo té Sàulú, te ñá ní cùu-gǎ cundehe-dě, chi ní cuaa-dé, te ní tniⁿ-güedé ndaha-dé ndécá ñaha-güedé cuáháⁿ ñuú Dàmascú.

9 Te yàcáⁿ ní xíndecu-dé úní nduu, te ñá ní cùu tnahí cundehe-dě, te ñá túú nă ní xèxi-dé, te ñá túú ní xìhi-dé ndute.

10 Te ndècu tée sàndáá iní tnúhu Jèsús ñúú Dàmascú, nání-dě Anàniás, te ní sáháⁿ Jèsús núú sàní-dé, te ní xáhaⁿ-gă xii-dé:

—¡Anàniás! —càchí-gă xáhaⁿ-gă.

Te ní xáhaⁿ-dě:

—¿Yúhú càháⁿ ndìhi-n-ăⁿ? —càchí-dé xăhaⁿ-dě.

11 Te ní xáhaⁿ-gă:

—Ndacuíñí, te quíhíⁿ-n ìⁿ chiuⁿ ichi núú dánani-güedé Ichi Ndáá, te yàcáⁿ nanducu-n vèhe té Jùdás, chi vehe té-áⁿ ndécú ìⁿ té-áⁿ ñúú Tàrsú nání-dě Sàulú, te té-áⁿ sa càháⁿ ndìhi ñaha-dě xii-í.

12 Te té-áⁿ ñí dácótó ñàha-xi sá ñí xini ñáhá-dě xii-n ñí quexìo-n núú ndécú-dě, te ní sacáⁿ ndodo-n ndàha-n díquí-dě, te ducaⁿ te ní nacaáⁿ núú-dě ní dácótó ñàha-xi xii-dé —càchí-gă xáhaⁿ-gă.

13 Te té Anàniás ní xáhaⁿ-dě:

—Yòhó Xítóhó Jesucristú, càchí tnúhu-í xii-n să ñí níhì-í tnúhu nàcuáa quide-dé sá ìo quide úhú-dé ñáyíu càháⁿ ndìhi-n ñúú Jerusalén.

14 Chi nèhe-dé tutú ní sáñaha cuè dútú cúnúu cuendá níhí-dě nàcuáa cada-dé tñi-dé nchaa ñáyíu sàndáá iní ñáhá xii-n —cachí-dé xăhaⁿ-dě xii-gă.

15 Te Jèsús ní xáhaⁿ-gă xii-dé:

—Quíhíⁿ-n ndàtnúhu-n ndìhi-dé, chi cuíní-í cada-dé chiuⁿ-í, quíhíⁿ-dé càháⁿ-dé tnúhu-í núú cuè ñáyíu isràél, ndìhi núú cuè ñáyíu ñá túú cùu ñáyíu isràél, ndìhi núú cuè té-áⁿ yìndaha ñaha xii-yu.

16 Te yúhú cúñaha-í xii-dé sá ndóhó vîhi-dé cuendá-í —càchí-gă xáhaⁿ-gă xii té Anàniás.

17 Te cuáháⁿ té Anàniás vehe núú ndécú tē Sàulú te ní sacáⁿ ndodo-dé ndaha-dé díquí tē Sàulú, te ní xáhaⁿ-dě:

—Yòhó té Sàulú tée ndècu ndìhi-í ichi Xítohó Jesu-crìstú, ñu-ni Xítohó Jesucrìstú Yaá ní cáháⁿ ndìhi ñaha xì-n ichi ní tendaha ñàha-gá véxi-í cuendá cacáⁿ táhù-í núú-gã cuendá-n te ndúha núú-n, te dàtnùní quixi Espíritú-gá cundecu ndìhi-n — càchí-dé xáhaⁿ-dě.

18 Te dàtná sá ñí xócání-ó ìⁿ sá ndèdí núú-dě ní quide ñaha-xì xì-dé, te ní nacaáⁿ núú-dě, te ní sandute-dé.

19 Te ní xexi-dé, te ní naníhí ndéé-dě, te tìtní nduu ní xíndecu ndìhi-dé ñáyiu ní sándáá iní tnúhu-gá ñuú Dàmascú.

Té Sàulú dácuàha-dé ñáyiu tnúhu Yá Ndiõxí ñuú Dàmascú

20 Te sátá ñí ndúha núú-dě, te ní sáháⁿ-dé veñúhu cue ñáyiu isràél ní xáhaⁿ-dě sá Jèsús cúú-gã Déhe Yá Ndiõxí.

21 Te nchaa ñáyiu ní xíndedóho tnúhu ní cáháⁿ-dé, te ní cuñúhu vîhí-yu, te ní xítñàhá-yu:

—Ñu tée-ãⁿ ní sahani-dé ñáyiu ní xóo chiñuhu ñaha xìi Jèsús ñuú Jerusalén. Te ní quixi-dé iha ní cuiní-dé tñi ñaha-dě xíi-yu candeca ñaha-dě quíhíⁿ núú cuè dútú cúnùu ni cuu —cachí-yu xítñàhá-yu.

22 Te ió iní-gá té Sàulú xáhaⁿ-dě xii-yu sá díú Jèsús cúú-gã Crìstú Yaá ní tendaha Yá Ndiõxí ní quixi ñuyíú-a, te xíãⁿ ñá ní ñíhí ñáyiu isràél ndécú ñuú Dàmascú tnúhu cáháⁿ-yu, te ní cuñúhu vîhí-yu.

Té Sàulú ní dáxíó-dě núú ñáyiu isràél

23 Te sáta nĩ cuu titnĩ nduu, te ní ndatnúhu cue tée isràél sá cáhni-güedě té Sàulú.

24 Te té Sàulú ní níhí-dě tnúhu nàcuáa càháⁿ-güedé cada ñaha-güedě xii-dé, te cuěi nduu cuěi niú néhé cuendá-güedé yuyèhe núú ñúdòco ndóho yuhu ñuú cuendá cuini-güedé tñi ñaha-güedě xii-dé te cahni ñaha-güedě.

25 Te ñⁿ niú ndécá ñaha cue tée ní sándáa iní-xi tnúhu Jèsús cuáháⁿ ndée núú ñúdòco ndóho yuhu ñuú. Te ní sáa-güedé núú ndòho, te ní chihi ñaha-güedě xii-dé xití tídihi te ní dándèe ñaha-güedě núú ñúhú, te ní quene-dé cuáháⁿ-dé.

Te Sàulú ndécú-dě ñuú Jerusàlén

26 Te té Sàulú ní nasáa-dé ñuú Jerusàlén, te cuini-dé chitnahá-dé ñáyu sándáa iní tnúhu Jèsús, te ní yuhú-yu chi ní cáhãⁿ-yu sá dándàhú ñáhá-dě sá sándáa iní-dé Jèsús.

27 Te té Bèe ndécá-dě té Sàulú cuáháⁿ núú ndécú cuè tée ní táuchíúⁿ Jèsús dacuàha ñaha xii-yu tnúhu-gá. Te ní cani té Bèe cuendú núú-güedě nàcuáa ní cuu ní naníhí tnáhá tẽ Sàulú ndihí Jèsús ichi, te ní cáháⁿ ndihí ñaha-gã xii-dé. Te ní xáhaⁿ tùcu té Bèe nàcuáa ní cáháⁿ té Sàulú tnúhu Jèsús núú ñáyu Dàmascú, te ñá túú tnàhí ni yuhú-dé ní cáháⁿ-dé, càchí té Bèe xãhaⁿ-dě xii-güedé.

28 Te ní xíndecu té Sàulú ndihí ñáyu xídacuáhá tnúhu-gá ñuú Jerusàlén. Te ní ndicuu ndicuu-dé ní cáháⁿ-dé tnúhu Jèsús, te ñá túú tnàhí ni yuhú-dé

29 ní cáháⁿ ndihí-dé ñáyu isràél ñáyu càháⁿ tnúhu gríégú. Te ñáyu-áⁿ nĩ ngúita-yu ndàtnúhu-yu sá cáhni ñáhá-yu xii-dé.

³⁰ Te ñáyiú sàndáá iní tnúhu-gá ní níhĩ-yu tnúhu nàcuáa cuení ñáyiú càháⁿ tnúhu griégú cada ñàhá-yu xii té Sàulú, núu ní sàndeca ñàhá-yu xii-dé ñuú Cèsareá, te yàcáⁿ ní tendaha ñàhá-yu cuánuhú-dé ñuú Tàrsú.

³¹ Te sáta xíaⁿ te ní sanaá-yu ñá túú-gă ní xõo cada úhú-yu nchaa ñáyiú sàndáá iní tnúhu Jèsús nihíi distritú Jùdeá, ndihí distritú Galileá, ndihí distritú Sàmariá. Te ní níhí ndě-yu ní quidé-yu nàcuáa ní xáhaⁿ Yă Ndiõxí cadá-yu, te ío ní xíndecu yĩñùhú-yu núú-gă, te Espíritú-gá ní chindee ñàha-xi xií-yu, te vâi-gá ñáyiú ní sàndáá iní-yu tnúhu-gá.

Té Pèlú ní quide tátna-dé té Èneás

³² Tít ní xichi ní sáháⁿ té Pèlú ní cáháⁿ-dé tnúhu Yá Ndiõxí. Te ñⁿ nduu ní sáháⁿ-dé ñuú Lìdá ní cáháⁿ ndihí-dé ñáyiú sàndáá iní ñàhá xii Jèsús.

³³ Te yàcáⁿ ní naníhí-dě ñⁿ té nàni Eneás, te ní cuu úná cuía cùhú-dé, te ni lùha ñá cúú-gă candá nihnu-dé.

³⁴ Te ní xáhaⁿ tẽ Pèlú xii-dé:

—Èneás, Xítóhó Jesucrìstú cada tátna ñàha-gă xii-n tnàvíí. Ndacóo te ndocani-n yùu-n —cachí-dé xàhaⁿ-dě.

Te òré-ni ní ndacóo-dé.

³⁵ Te nchaa ñáyiú ñuú Lìdá ndihí ñáyiú ñuú Sàrón ní xiní-yu sá ñí ndúha-dé, te ní sàndáá víhí iní-yu Xítóhó Jesucrìstú.

Ní ndoto tá Dòrcás

³⁶ Te ñuú Jòpé ndécú ñⁿ ñadihí sàndáá iní-aⁿ tnúhu Jèsús, te nàni-aⁿ Tabitá, te tnúhu griégú xăhăⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndàhú.

37 Te váha-ni ndècu-aⁿ ni cuu, te ní tñi ñaha cuěhé nĩ xihí-aⁿ, te ní nadacùchi ñahá-yu, te ní chihi ñahá-yu ñⁿ cuàrtú ndécú nděé núú nĩnu.

38 Te ñáyiú ní sándáá iní tnúhu Jèsús ñuú Jòpé ní níhí-yu tnúhu sá ndécú tẽ Pèlú ñuú Lidá. Te yatni-ni càa ñuú-áⁿ, te ní tendàhá-yu úú cue tée cuáháⁿ-güedé núú ndécú-dě cuendá cúñaha-güedě candeca ñaha-güedě xii-dé quíhíⁿ núú ndécũ-yu. Te ní xáhaⁿ-güedě xii té Pèlú:

—Yáchí ná quíhíⁿ-ó ñuú-ndí, chi yàcáⁿ cáná ñahá-yu quíhíⁿ-n tnávíí —càchí-güedé xáhaⁿ-güedě xii té Pèlú.

39 Te té Pèlú ní xica-dé cuáháⁿ-dé ndihí cue tée-áⁿ ñuú Jòpé, te òré ní quexio-güedé ndihí-dé, te cuásaá ndihí ñaha-güedě cuàrtú ndéé núú nĩnu. Te nchaa ñáyiú dìhí ñáyiú quèé ní tacá ndèè ñáhá xii ndíyi-áⁿ xĩndáhyú-yu, te ní dánèhé ñáhã-yu nchaa dóó nĩ cadúha ñaha ní xihí-áⁿ. Chi ní xóo cadúha-aⁿ dícúⁿ, te ní xóo cadúha-aⁿ díó òré ní xĩndecu-aⁿ ñuyíú-a, te nchaa xíãⁿ ní dánèhé ñáhã-yu xii té Pèlú.

40 Te té Pèlú ní xáhaⁿ-dě sá quèè-yu nchaá-yu quehé, te ní queé-yu. Te ní ngüíñí xítí-dě te ní cáháⁿ ndihí-dé Yã Ndiõxí, te dãtnùní ní ndacoto-dé núú cándòdo ndíyi-áⁿ, te ní xáhaⁿ-dě:

—Tàbitá, ndacóo —càchí-dé xáhaⁿ-dě.

Te ní ndacoto-aⁿ núú tẽ Pèlú te ní ndacóo-aⁿ.

41 Te ní tñi-dé ndaha-aⁿ ní nacanutñi ñaha-dě. Te ní cana-dé nchaa ñáyiú dìhí ñáyiú quèé ndihí nchaa ñáyiú sándáá iní tnúhu Jèsús cuendá quiní-yu sá nĩ ndoto-aⁿ.

42 Te nchaa ñáyiú ñuú Jòpé ní níhí-yu tnúhu nàcuáa ní quide té Pèlú ní ndoto ñaha ní xihí-áⁿ, te

vài-yu ní sándáá iní-yu Xítóhó Jesucrístú.

⁴³ Te títñí nduu ní xíndecu té Pèlú vehe té Xímú té dâcuitá ñii.

10

Té Pèlú ndihi té Còrneliú

¹ Te ndècu ñⁿ téé nàni-dé Còrneliú ñuú Cèsareá te cùu-dé capitáⁿ, te ndècu ndihi-dé ñⁿ cièndú sandàdú. Te cue téé-áⁿ nání-güedě Sandàdú Itàlianú.

² Te téé cùu capitáⁿ ío váha iní-dé, te mee-dě ndihi ñadìhí-dé ndihi nchaa landú-dé ío nèhé-yu sá yíñùhu núú Yă Ndiöxí, te sáha-dé ñáyiu ndàhú ñáyiu isràèl díhúⁿ, te ío càháⁿ ndihi-dé Yă Ndiöxí.

³ Te ñⁿ nduu dàtná òré caá úní sacuaa ní dácótó nǔú ñáhá-xí xii-dé sá ní sáháⁿ ñⁿ espíritú xínú cuèchi núú Yă Ndiöxí núú-dě, te ní xáhaⁿ-xi:

—Còrneliú —càchí-xi xăhaⁿ-xi xii-dé.

⁴ Te ní xiní-dé ndi ndùú xio núú-dě espíritú-áⁿ. Te ío ní yùhú-dé. Te ní xáhaⁿ-dě:

—¿Ná chíúⁿ vëxi-n? —càchí-dé xăhaⁿ-dě.

Te xăhaⁿ-xi:

—Ío càháⁿ ndihi-n Yă Ndiöxí, te ñáyiu ndàhú sãñaha-n díhúⁿ-n, te nchaa xíăⁿ sa nàha-gá.

⁵ Te vitna tendaha-n cuè téé na quíhíⁿ-güedé ñuú Jòpé quíngana-güedé ñⁿ téé nàni Xímú, àdi Pelú chí úú dǔu-dé, te candeca ñaha-güedě quixi.

⁶ Te òré quexìo-dé te cachí tnúhu-dé nchaa dava-gá sá cuíní Yă Ndiöxí cada-n. Te ndècu-dé vehe ingá tucu téé nàni Xímú téé dâcuitá ñii, te vehe téé-áⁿ cáá ñⁿ xio yuhu lamár —càchí-xi xáhaⁿ-xi xii-dé.

7 Te sáta cuáháⁿ espíritú-áⁿ, te té Còrneliú ní cana-dé úú tnháá cue téé xínu cuechi núú-dě ndihí ìⁿ sandàdú xínú cuèchi tucu núú-dě, te tnháá sandàdú-áⁿ ò cáháⁿ ndihí-dé Yă Ndiöxí.

8 Te té Còrneliú ní cani-dé cuèndú núú-güedě nàcuáa ní cáháⁿ espíritú xínú cuèchi núú Yă Ndiöxí. Te ní tendaha ñàha-dé xii-güedé cuáháⁿ-güedé ñuú Jòpé.

9 Te nduu tněé-áⁿ ñúhú-ní-güedě ichi cuáháⁿ-güedé, te cùu-xi datná òré cauxúú nduu ta cùyatni-güedé ñuú-áⁿ, te òré-áⁿ ñí sáá té Pèlú díquí véhé cáháⁿ ndihí-dé Yă Ndiöxí.

10 Te òré-áⁿ sa xihí-dé docó cuiní-dé caxi-dé, te ñini càdúha-yu sá cáxí-dě ní dácótó núú ñáhá-xí

11 sã ñí xini-dé ìⁿ sá ndécú àndiú, te càa datná cáá ìⁿ dóó cáhnú nchìcúⁿ yoho ndi cùmí xíquí-xi véxi cuuⁿ núú ñúhú.

12 Te núú dǒó-ǎⁿ yódó cǒó ndihí quiti ndàva ndihí nchaa núú quiti ndéé cùmí sáhá-xí.

13 Te ní tecú dóho-dé cáháⁿ ìⁿ sá cáháⁿ, te xăhaⁿ sã cáháⁿ-áⁿ xii-dé:

—Pèlú, ndacuíñí cahni-n nděda-ni càa quiti-a caxi-n-di —cachí sá cáháⁿ-áⁿ xăhaⁿ-xi xii-dé.

14 Te té Pèlú ní xăhaⁿ-dě:

—Vá cáhni-í-di chi càhí tnúhu sá sánú ichi ñaha xii nchúhú ñáyiu israhél sá vă cúú càxi-ndí nchaa quiti-a chi cuu cuéchi, te vátá cáxí-gă-í-di ni ìⁿ xito —cachí-dé xăhaⁿ-dě.

15 Te ní cáháⁿ tucu sá ñí cáháⁿ-áⁿ, te xăhaⁿ-xi:

—Vá cúú càhí-n sã vă cúú càxi-n-di, chi mee Yă Ndiöxí ní cachí-gá sá díú nchàa quiti-a cuu caxi-o vitna —cachí sá ñí cáháⁿ-áⁿ xăhaⁿ-xi xii-dé.

16 Te ducaⁿ ñí cáháⁿ sá ñí cáháⁿ-áⁿ ùní xito, te dătnùní cuándaa tucu dóó-ǎⁿ andiú.

17 Te té Pèlú ñá ní cùtnuní iní-dé ná cuèndá ducaⁿ ñí dácótó nùú ñáhá-xí xii-dé, núu xíáⁿ ío cuéhé ñí sani iní-dé. Te òré-áⁿ ñí quexìo cue téé ní tendaha té Còrneliú ndéé yuyèhe, chi ndi vehe ndi vehe cuáháⁿ-güedé ndúcú tnùhu-güedé ndèè cáá vèhe té Xímú téé dii vèhe-xi ndecu té Pèlú.

18 Te ní cáháⁿ níhi-güedé, te xáhaⁿ-güedě:

—Ñá túú cùdana iha ndecu ìⁿ téé nànducu-ndí nání-dě Xímú, àdi Pelú chi úú diu-dé —càchí-güedé xáhaⁿ-güedě.

19 Te té Pèlú vài sani iní-dé sá ñí dácótó nùú ñáhá-xí xii-dé. Te òré-áⁿ ñí xáhaⁿ Espíritú Yá Ndiòxí xii-dé:

—Cundedóho-n ìⁿ tnúhu na càháⁿ-í-a. Ní quexìo úní cue téé nànducu ñaha xii-n.

20 Yáchí, cuandèe chi quíhíⁿ-n ndìhi-güedé, te vá yùhú-n chi yùhú ní xáhaⁿ-í véxi cuaca ñaha-güedě xii-n —càchí Espíritú-gá xáhaⁿ-xi xii té Pèlú.

21 Te ní xica-dé cuándeé-dé núú ndécú cuè téé xica nanducu ñaha xii-dé, te xáhaⁿ-dě xii-güedé:

—Yùhú cúú tēe nànducu-ndo-áⁿ. Náu-í-a núú ná chíúⁿ cuìní ñáhá-ndó —càchí-dé xáhaⁿ-dě xii-güedé.

22 Te xáhaⁿ-güedě:

—Tée cùu capitáⁿ téé nàni Corneliú ní tendaha ñaha-dé véxi-ndí, te téé-áⁿ ío váha iní-dé, chi ío sàndáá iní-dé Yá Ndiòxí, te nchaa ñáyiú isráél ío váha càháⁿ-yu cuèndá-dé. Te ìⁿ espíritú xínú cuèchi núú Yá Ndiòxí ní xáhaⁿ-xi xii-dé sá cáná ñaha-dé xii-n quíhíⁿ-n vèhe-dé dacuàha-n-dé tnúhu Yá Ndiòxí —càchí cue téé ní tendaha té Còrneliú xáhaⁿ-güedě xii té Pèlú.

23 Te ní xáhaⁿ tē Pèlú sá quíhu-güedé vehe-dé, te candeca tnàha-güedé ndìhi-dé quíhíⁿ ndéé nduu

tněé. Te nduu tněé-áⁿ nǐ xica-güedé ndécá tñaha-güedé ndihi té Pèlú cuáháⁿ, te tñahá ìⁿ úú cue tée sàndáá iní tnúhu Jèsús ñuú Jòpé cuáháⁿ ndihi ñaha-güedě xii-dé.

24 Te ndée ingá nduu ní quexìo-güedé ñuú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndihi ñadihí-dé ndihi nchaa landú-dé ndihi cue tée ío váha tñahá tnúhu ndihi-dé, chi ní cana ñaha-dé ní nítñahá-yu ndihi-dé cundetú-yu té Pèlú.

25 Te sátá nǐ quèxio té Pèlú vehe té Còrneliú, te ní quee-dé quehé, te ní ngüíñí xítí-dě núú tě Pèlú chíñùhu ñaha-dé ní cùu.

26 Te té Pèlú ní xáhaⁿ-dě:

—Ndacuíñí vá ngüíñí xítí-n nǔù-í chi ñá díú Ndiöxí cùu-í, dìcò ìⁿ tée ñuyíu-a cùu-í —càchí té Pèlú xáhaⁿ-dě xii-dé.

27 Te ta cǎháⁿ té Pèlú ndihi té Còrneliú cuánguihu-güedé xítí vehe, te chitu ñáyiú xixíhi xítí vehe.

28 Te ní xáhaⁿ tě Pèlú xií-yu:

—Sa nàha-ndo sá càchí tnúhu sá sánú ìchi ñaha xii nchúhú ñáyiú isràél sá vǎ cúú quixi-ndí vehe ni ìⁿ nchohó ñáyiú ñá túú cùu ñáyiú isràél te ni vǎ cúú tñahá tnúhu ndihi ñaha-ndí xii-ndo. Dico Yá Ndiöxí ní cachí-gá sá vǎ cúú cǎháⁿ-í sá vǎ cúú cǎháⁿ ndihi-í ñáyiú ñá túú cùu ñáyiú isràél, chi cuu cuéchi.

29 Núu xíǎⁿ ndíhi-ni véxi-í òré ní quexìo tnúhu sá cáná ñaha-ndo. Te cachí tnúhu-ndo nǎ cuendá cáná ñaha-ndo —cachí té Pèlú xáhaⁿ-dě xií-yu.

30 Te té Còrneliú ní xáhaⁿ-dě:

—Ní cuu cúmí nduu, te diu-ni dàtná òré iha cùu-xi, te yúhú ndècu-í diu-ni vehe-í, te ñá túú

tnàhí ná xéxì-í cáháⁿ ndìhì-í Yă Ndiöxí, te òré-áⁿ nǐ quexìo ìⁿ espíritú xínú cuèchi núú-gă níhnú-xí dǒó cuìxíⁿ dóó chàhnchí.

³¹ Te cǎchí-xi: “Còrneliú, ní xíndedóho Yá Ndiöxí tnúhu ní cáháⁿ-n ndìhì-gá, te xíní-gá sá sǎñaha-n dǐhúⁿ xii ñáyiu ndàhú.

³² Te ñuú Jòpé ndécú ìⁿ téé nàni Xímú, àdi Pelú chi úú dǐu-dé, te ndècu-dé vehe ìⁿ téé nàni tucu Xímú téé dàcuitá ñì, te cǎa vehe-dé ìⁿ xio yuhu làmár, te cana-n-dě ná quìxi-dé ndatnúhu-n ndìhì-dé”, duha ní cáháⁿ espíritú xínú cuèchi núú Yă Ndiöxí.

³³ Núu xiǎⁿ ndìhì-ni ní cana ñaha-ǐ xii-n. Te táxǎhu xii-n sǎ vǎxi-n chi iha ndècu-ndí nchaa-ndí ndétú ñàha-ndí xii-n cùndedóho-ndí tnúhu Yá Ndiöxí, te cuìní-ndí cachí tnúhu-n nchàa tnúhu ní cachí Yă Ndiöxí cáháⁿ-n —cǎchí té Còrneliú xǎhaⁿ-dě.

Té Pèlú ní ndatnúhu-dé ndìhì ñáyiu ní tacá vehe té Còrneliú

³⁴ Te té Pèlú xǎhaⁿ-dě xií-yu:

—Vitna ní xíní-í sá Yă Ndiöxí cǎháⁿ ndìhì-gá ñáyiu cuèi nděda-ni cǎa ñuú, te ìⁿ-ni quide-gá ndìhì nchaaⁿ-yu.

³⁵ Te nchaa ñáyiu nèhe sá yíñùhu núú Yă Ndiöxí, te xǐquide váha-yu, te nchaaⁿ-yu cùu váha iní ñáhá-gă xií-yu. Te ñá túú quide cuendá-gá cuèi ná ñáyiu ñuú cúǔ-yu.

³⁶ Te Yá Ndiöxí ní tendaha-gă Xítóhó Jesucristú ní sáháⁿ-gá ní xíndecu-gá nacióⁿ Isràél, te ní xáhaⁿ-gă xií-yu ìⁿ tnúhu váha nàcuáa cuu váha iní-yu. Te dǐu-ni mee Jèsús cúnù-gá núú ñáyiu nì cǎa xico ñuyíú.

37 Te nàha-ndo sá dǐhna-gá ndí Juàá ní cáháⁿ ndí tnúhu Yá Ndiǒxí núú ñǎyiu, te ní dácúándùte ñaha ndí xii-yu. Te dǎtnùní ní ngúíta Jèsús ní cáháⁿ-gá tnúhu-gá distritú Galileá, te dǎtnùní ní sáháⁿ-gá ñihí nàcióⁿ Isràél ní cáháⁿ-gá tnúhu-gá núú ñǎyiu.

38 Te sa nàha-ndo sá Yǎ Ndiǒxí ní sǎñaha-gǎ Espíritú-gá xii Jèsús téé ñúú Nazàrét ndécú ndíhi-dé chíndèe ñaha-xi xii-dé. Te nàha-ndo sá ñí xica cuu Jèsús ní quide tátna-gá nchaa ñáyiu yíhi ñaha espíritú cúndíhi yucu ñávǎha. Te ío vǎi-gá sá vǎha ní quide ñaha-gǎ xii-yu, te ducaⁿ ñí quide-gá, chi Yá Ndiǒxí ní chindee ñàha-gá.

39 Te mee-ndí ní xiní-ndí nàcuáa ní quide Jèsús ñúú Jerusàlén ndíhi ñihí nàcióⁿ Isràél. Te ní sata caa ñaha-güedě xii-gá núú cùrúxí te yàcáⁿ ní xíhí-gá.

40 Te núú ùní nduu ní dándótó ñàha Yá Ndiǒxí xii-gá. Te ní cuiní-gá sá cúndècu Xítóhó Jesucristú titní nduu sátá ñí ndoto-gá cuendá cáháⁿ ndíhi ñaha-gǎ xii-ndí nchaa-ndí nàcuáa ní xica cuu-ndí ndíhi-gá.

41 Te ñá ncháá ñǎyiu ní xíní ñáhá xii-gá, chi mee-ni nchǔhú cue téé ní cachí-gá sá càháⁿ ndáá-ndí sá ñí ndoto-gá, chi ní xíndecu ndíhi-ndí-gá, te ní xihí ní xexi-ndí ndíhi-gá, núu càháⁿ ndáá-ndí sá ñí ndoto-gá.

42 Te ní cachí-gá sá nchǔhú quíhíⁿ-ndí cúñaha-ndí xii ñáyiu sá méé Yá Ndiǒxí ní táúchíúⁿ-gǎ sá Jèsús cada ndáá-gá cuéchi nchaa ñáyiu ndècu vívú ndíhi cuéchi nchaa ñáyiu ní xíhí. Te ducaⁿ ñí xáhaⁿ Yá Ndiǒxí xii Jèsús, te dǐu-ni ducaⁿ ñí cachí Jèsús

cáháⁿ-ndí.

⁴³ Te cue téé ní cáháⁿ tnúhu Yá Ndiöxí ndéé sanaha nĩ cáháⁿ-güedé sá quíxí Jèsús, te ní cachí-güedé sá ncháá ñáyiú na quíndáá iní ñáhá xìi Jèsús, te cada càhnu iní-gá nchaa cuéchi-yu —càchí té Pèlú xáhaⁿ-dě xií-yu.

Ní quexìo Espíritú Yă Ndiöxí ní ngúndecu ndihì cue ñáyiú ñá túú cùu ñáyiú isràél

⁴⁴ Te mei òré càháⁿ-dé ndèdóho-yu ní quexìo Espíritú Yă Ndiöxí ní ngúndecu ndihì nchaa ñáyiú-áⁿ.

⁴⁵ Te cue téé isràél cuáháⁿ ndihì té Pèlú, cue téé ní sándáá iní tnúhu Jèsús ní cuñúhu vìhi-güedé sá nĩ quexìo Espíritú Yă Ndiöxí ní ngúndecu ndihì-yu, chi cuèndá sá ñà díú ñáyiú isràél cúŷ-yu núu xíáⁿ ní cuñúhu-güedé.

⁴⁶ Te ní cutnùní sá nĩ quexìo Espíritú Yă Ndiöxí ní ngúndecu ndihì-yu, chi ní ngüíta-yu càháⁿ-yu tnúhu sá dácàhu iní ñáhá Espíritú-gá, tnúhu sá ñà túú xìní-yu cáháⁿ-yu. Te ní ndacáⁿ táhŷ-yu núú Yă Ndiöxí cuèndá nchaa sá nĩ quide-gá.

⁴⁷ Te dătnùní ní xáhaⁿ tĕ Pèlú:

—Vitna te cuandute ñáyiú ní natuha ichi Xítohó Jesucrìstú chi sa ndècu ndihì-yu Espíritú Yă Ndiöxí dătná cuíní-ndó ndècu ndihì nchoo, núu xíáⁿ vá cúú càchí dava-gá ñáyiú sá vă cúú cuànduté-yu —càchí-dé xáhaⁿ-dě xií-yu.

⁴⁸ Te dătnùní ní xáhaⁿ-dě xii ñáyiú:

—Vitna te cuandute-ndo, te òré-áⁿ te cacunehe-ndo Xítohó Jesucrìstú —càchí-dé xáhaⁿ-dě xií-yu.

Te dàtnùní ní cáháⁿ ndàhú-yu núú tē Pèlú cun-
decu ndihì ñaha-dě xí-yu ìⁿ úú nduu.

11

*Té Pèlú ní cani-dé cuèndú núú ñàyiú sàndáá iní
tnúhu Jèsús ñuú Jerusàlén*

¹ Te cue tée ní táuchíúⁿ Jèsús dacuàha ñaha
xii ñàyiú tnúhu-gá, ndihì cue ñàyiú ní sàndáá iní
tnúhu-gá, ñàyiú ndècu distritú Jùdeá ní níhì-yu
tnúhu sá ñàyiú ñá túú cùu ñàyiú isràèl ní sàndáá
iní-yu tnúhu Yá Ndiöxí.

² Te òré ní ndexìo té Pèlú ñuú Jerusàlén, te ñàyiú
isràèl ñàyiú ní cachí sá cádá nchàa nacuáa ní cáháⁿ
ndíi Moisés ní satnuhu ñàhá-yu xii-dé.

³ Te ní xáhãⁿ-yu xii té Pèlú:

—¿Ná cuèndá ní sáháⁿ-n ndéé ndíácãⁿ ní cáháⁿ
ndihì-n ñàyiú-ãⁿ, te ñá túú quidé-yu dàtná quidé
nchò-i? Te ní sáháⁿ-n yàcáⁿ ní xexi-n ndihí-yu —
càchí-yu xáhãⁿ-yu xii-dé.

⁴ Te té Pèlú ní cani-dé cuèndú nàcuáa ní cuu núú
ñí sáháⁿ-dé, te xàhaⁿ-dè:

⁵ —Ní xíndecu-í ñuú Jòpé. Te òré càháⁿ ndihì-í Yá
Ndiöxí, te ní dácótó ñàha-xi xii-í sá vèxi cuuⁿ ìⁿ
dóó cáhnú àndiú, te ndùtu ndi cumí xíquí-xi, te ní
ngava-xi núú ndécù-í.

⁶ Te ní xíndéhé vãha-í, te ní xiní-í nchaa quiti yòdo
núú-xi. Te ìⁿ xichi yòdo quiti cúmí sáhá-xi, te ìⁿ
xichi yòdo quiti dééⁿ, te ìⁿ xichi yòdo cóó, te ìⁿ xichi
yòdo quiti ndava.

⁷ Te ní tecú dóho-í càháⁿ ìⁿ sá càháⁿ, te càchí-xi:
“Pèlú, ndacuíñí cahni-n nděda-ni càa quiti-a
caxi-n-di”, cachí sá ñí cáháⁿ-áⁿ.

8 Te ní xáhaⁿ-ĩ: “Vá cáhni-í-di chi càchí tnúhu sá sánú ìchi ñaha xii nchúhú ñáyiú isràél sá vǎ cúú càxi-ndí nchaa quiti-a”, xáhaⁿ-ĩ.

9 Te ní tecú dóho-í càháⁿ-ni tucu núú ñnu, te càchí sá càháⁿ-án: “Vá cúú càchí-n sǎ vǎ cúú càxi-n-di, chi mee Yǎ Ndiǒxí ní cachí-gá sá díú nchàa quiti-ánⁿ cuu caxi-o”, càchí sá càháⁿ-án.

10 Te ducaⁿ ñí cáháⁿ sá ñí cáháⁿ-án ùní xito, te dǎtnùní cuándaa dóó-ǎⁿ ndihí nchaa quiti-ánⁿ andiu.

11 Te òré-ni ní quexìó úní cue téé vehe núú ndécù-í. Te cue téé-ánⁿ ñí tendaha ñaha ìⁿ téé ñuú Cèsareá nánducu ñaha-güedé xii-í.

12 Te mee Espiritú Yǎ Ndiǒxí ní cachí-xi sá quihíⁿ-í ndihí-güedé, te ní cachí-xi sá ñà túú ñǎ cani iní-í. Te tnàhá ìñú cue téé ndècu iha ní sáháⁿ ndihí ñaha-güedě xii-í, te nchaa-ndí ní sáháⁿ-ndí vehe té Còrneliú ñuú Cèsareá.

13 Te ní cani-dé cuèndú nàcuáa ní cuu ní sáháⁿ ìⁿ espíritú xínú cuèchi núú Yǎ Ndiǒxí vehe-dé, te ní quihu-xi ndéé xití vehe-dé, te ní xáhaⁿ-xi xii-dé: “Tendaha-n cuè téé na quihíⁿ-güedé ñuú Jòpé quíngana-güedé ìⁿ téé nàni Xímú, àdi Pelú chi úú diu-dé. Te candeca ñaha-güedě quixi.

14 Te téé-ánⁿ cachí tnúhu-dé nása cada-n nàníhí tàhú-n ndihí ñadihí-n, ndihí landú-n, ndihí nchaa ñáyiú xínu cuechi vehe-n”, duha ní xáhaⁿ espíritú-ánⁿ xii té Còrneliú.

15 Te òré ní ngüíta-í càháⁿ ndihí-í-yu ní quexìó Espiritú Yǎ Ndiǒxí ní ngúndecu ndihí-yu dǎtná ní quide-xi cútnàhá ní taxi Yǎ Ndiǒxí Espiritú-gá ndéé díhna ní ngúndecu ndihí nchoo.

16 Te ní ndacu iní-í nàcuáa ní cáháⁿ Xítóhó Je-

sucristú, te duha ní cachí-gá: “Té Juàá ní xóo dacuàndute-dé ñáyi, dico yúhú sãñaha-ĩ Espíritú Yã Ndiõxí cundecu ndihí-yu”, duha ní cachí-gá.

17 Te Yá Ndiõxí ní sãñaha-gã Espíritú-gá cundecu ndihí ñáyi ñá túú cù ñáyi isràél dàtná ní quide-gá cútnàhá ní sándáá iní-ó tnúhu Jèsús, núu xiáⁿ vá càchí-í sá vã cúú càda-í ìⁿ sá cuiní Yã Ndiõxí cada-í —càchí té Pèlú xãhaⁿ-dé xii-yu.

18 Te sátá dúcáⁿ ñí xãhaⁿ tẽ Pèlú, te ñá túú-gã ná tnúhu ni cãháⁿ-yu, te ío ní cudí^í iní-yu nchaa nãcuáa ní quide Yá Ndiõxí, te ní xítnàhá-yu:

—Tnàhá nchaa ñáyi ñá túú cù ñáyi isràél naníhí tàhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuiní Yã Ndiõxí cunduu —càchí-yu xítnàhá-yu.

Ñáyi sándáá iní tnúhu Jèsús ñuú Antiòquiá

19 Te sátá ñí sahani-güedé té Těvá, te ní cuiní-güedé cada úhú-güedé nchaa ñáyi ní sándáá iní-xi tnúhu Jèsús, te ní xité nuú-yu ndi tnahá ìⁿ ìⁿ ñuú. Te davá-yu cuáháⁿ-yu ndéé distritú Fèniciá ndihí distritú Chìpré ndihí ñuú Antiòquiá. Te ní cãháⁿ-yu tnúhu Jèsús núu mee-ni ñáyi isràél, te ñá ní xítnúhu-yu dava-gá-yu.

20 Te dava-gá ñáyi distritú Chìpré ndihí ñáyi ñuú Cìrené ní sáháⁿ-yu ñuú Antiòquiá. Te ñá díú mèe-ni ñáyi isràél ní cãháⁿ ndihí-yu, chi tnàhá ñáyi ñá túú cù ñáyi isràél ní xãhãⁿ-yu tnúhu Jèsús.

21 Te ní chindee ñàha-gá xii ñáyi càháⁿ tnúhu-gá, te vãi-gá-yu ní sándáá iní-yu-gá chi ní tuhá-yu ichi-gá.

22 Te ñáyi ndècu ñuú Jerusàlén ñáyi ní sándáá iní tnúhu Jèsús ní níhí-yu tnúhu nàcuáa ní cuu, núu xíáⁿ ní tendàhá-yu té Bèé cuáháⁿ-dé ñuú Antiòquiá.

23 Te òré ní quexìo té Bèé, te ní xiní-dé nàcuáa ní quide ñaha-gã xií-yu sá ñí naníhí tàhú-yu, núu xíáⁿ ío ní cudíí iní-dé. Te ní dácáhú iní ñáhá-dě, te ní xáhaⁿ-dě:

—Ío nducu ndèe-ndo cada-ndo nchaa sá cächí Yă Ndiõxí cada-ndo —cächí-dé xáhaⁿ-dé xií-yu.

24 Te té Bèé cúú-dě ìⁿ téé váha iní-xi, te ndècu ndihí-dé Espíritú Yă Ndiõxí, te ío sándáá iní-dé tnúhu Jèsús. Te vâi vihi ñáyi ní tuhá-yu ichi-gá.

25 Te dătnùní cuáháⁿ té Bèé ñuú Tàrsú cuánúndúcú-dě té Sàulú.

26 Te òré ní naníhí ñáhá-dě, te ndèca ñaha-dé cuáháⁿ ñuú Antiòquiá, te yàcáⁿ ní xíndecu-güedé ìⁿ cuíá ndihí ñáyi ní sándáá iní tnúhu Jèsús, te vâi-yu ní dácuhá ñàha-güedé tnúhu-gá. Te dïu-ni ñuú Antiòquiá ní dánání ñáhá-yu Cristiànú xii nchaa ñáyi sándáá iní tnúhu Jèsús.

27 Te ndéé dâvâ-áⁿ ñí quee ìⁿ ũú cue téé cãháⁿ tnúhu Yă Ndiõxí ñuú Jerusàlén cuáháⁿ-güedé ñuú Antiòquiá.

28 Te ìⁿ-dé nání-dě Àgabú, te ní chindee ñaha Espíritú Yă Ndiõxí xii-dé, te ní sáháⁿ-dé núú nchaa ñáyi sándáá iní tnúhu-gá, te ní xáhaⁿ-dě xií-yu sá quíxí ìⁿ tnamá ñihí ñuyíú. Te ducaⁿ ñí cuu sátá ñí ngúnutñí té Claudiú téé yìndaha cuéhé nacióⁿ.

29 Núu xíáⁿ nchaa ñáyi sándáá iní tnúhu Jèsús ñuú Antiòquiá ní ndatnúhu-yu sá chíndèé-yu nchaa ñáyi sándáá iní tnúhu-gá ndécú dîstrítú Jùdeá cuendá vá ndóhó vîhí-yu docó. Te nàcuáa ní níhí-yu, te ducaⁿ ñí sacáⁿ tnáhă-yu.

³⁰ Te ní tacá díhúⁿ-ǎⁿ, te nèhe té Bèè ndìhì té Sàulú cuáháⁿ, cuáha-güedé cue téé yìndaha ñáyiú sàndáá iní tnúhu-gá.

12

Sátá nǐ xǐhí té Jàcobó, te ní ngava té Pèlú vecaá

¹ Te ndéé dàvǎ-áⁿ nǐ ngúíta té Hèrodés téé yìndaha ñaha xii ñáyiú isràél ní quide úhú-dé ìⁿ úú ñáyiú sàndáá iní tnúhu Yá Ndiǒxí.

² Te ní táuchíúⁿ-dě ní tñì-güedé té Jàcobó ñaní té Juàá, te ní sahnì ñaha-güedě ndìhì machìtí.

³ Te ío ní cudíí iní dava ñáyiú isràél cuendá sá nǐ sahnì ñaha-güedě xii té Jàcobó, núu xǐǎⁿ ní tendaha tucu té Hèrodés sandàdú-dé ní sáháⁿ tñì tucu-güedé té Pèlú. Te ducaⁿ nǐ quide-dé cútnàhá ní xóo vico ní xexí-yu pàá sá ñà túú yìhì levadurá.

⁴ Te ní naníhí-güedě té Pèlú, te ní tñì ñaha-güedě ndécá ñaha-güedé cuáháⁿ vecaá. Te té Hèrodés ní táuchíúⁿ-dě cuáháⁿ sáhúⁿ ìⁿ sandàdú cundeé-güedé té Pèlú. Te ní xáhaⁿ-dě:

—Cundeé-ndó ndì cúmí ndì cúmí-ndó tǎe-ǎⁿ — cǎchí-dé xǎhaⁿ-dě xii-güedé.

Te té Hèrodés ní sanì iní-dé queñuhu-dé té Pèlú vecaá òré ná yǎha vico cuendá cahni ñaha-güedě cáháⁿ-dě ní cùu.

⁵ Te ní xǐhì-nì té Pèlú vecaá, te ní xíndeé cuaa ñaha sàndadú xii-dé. Te cue ñáyiú sàndáá iní tnúhu Yá Ndiǒxí ío ní xícáⁿ táhǔ-yu núú-gǎ cuendá sá ñà túú nǎ cada ñaha-güedě xii-dé.

Yá Ndiǒxí ní dǎcǎcu-gá té Pèlú vecaá

⁶ Ìⁿ niú-gá quìhì té Pèlú vecaá ní cùu, te nduu tñéè tauchìuⁿ té Hèrodés quíhíⁿ sandàdú queñuhu

ñaha-güedě xii-dé vecaá cuendá quini nchaa ñáyiú nása cada ñaha-güedě ní cùu. Te té Pèlú cáá-dě xidí-dé xití vecaá, te ndi ndúú dúcúⁿ ndáhá-dě ndútú càdená, te xio xio dñi-dé ndécú sandadú, te dava-gá sandadú xñdeé-güedé yèhe vecaá.

⁷ Te ní quexìo ìⁿ espíritú xínú cuèchi núú Yă Ndiöxí xití vecaá núú cáá tē Pèlú xidí-dé, te uuⁿni ní dáyèhé-xi xití vecaá, te ní danguìhi ñaha-xi xii-dé, te xăhaⁿ-xi xii-dé:

—Yáchí, ndácóo —càchí-xi xăhaⁿ-xi xii-dé.

Te ní ndacóo-dé, te nchaa cadená ndútú dúcúⁿ ndáhá-dě ní nandáxí.

⁸ Te ní xáhaⁿ tùcu espíritú-áⁿ xii-dé:

—Yáchí, nucuíhnu dóo-n, te ndíhu-n chàu-n —càchí-xi xăhaⁿ-xi xii-dé.

Te ní ndíhu nuu-dé dóo-dě, te ní xáhaⁿ tùcu espíritú-áⁿ:

—Candixi dóo-n, te na quèhíⁿ-ó —càchí-xi xăhaⁿ-xi xii-dé.

⁹ Te té Pèlú ní chinchícúⁿ-dé espíritú-áⁿ, te ñá ní cùtnuní iní-dé nüú ndáá ìⁿ espíritú xínú cuèchi núú Yă Ndiöxí ducaⁿ quide àdi ñáhá, te dàcoto ñaha-xi xii-dé ní sani iní-dé.

¹⁰ Te ndëndaha-ni-dě espíritú-áⁿ cuáháⁿ ní yáha-dé nàcuáa xñnutnîi sandadú, te ta yăha-gá-dé núú ndécú dâva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xití ñuú, te ní nacaáⁿ méé yèhe-áⁿ, te ní quee-dé cuáháⁿ-dé ndihî espíritú-áⁿ. Te ní tnahá-dé ìⁿ tnuú, te yàcáⁿ ní dándöo ñaha espíritú-áⁿ xii-dé.

¹¹ Te dătnùnî ní nene váha saní núú-dě, te ní cutnùnî iní-dé, te ní cachí-dé:

—Ndáá sá Yă Ndiöxí ní tendaha-gă espíritú-ăⁿ ní quixi-xi ní dácăcu ñaha-xi xì-í cuendá sá và cáhni ñaha té Hèrodés. Te dava ñáyiú isràél ío ní cudíí ìní-yu cuendá sá ñí cuiní té Hèrodés cahni ñaha-dě xii-í —duha ní cachí-dé sátá ñí cutnùní ìní-dé.

¹² Te sátá ñí cutnùní ìní-dé sá ñí cácu-dé, te cuáháⁿ-dé vehe ìⁿ ñaha nàni Mariá năná tē Juáá, àdi Mácú chi úú ḍiú-dé, te xíaⁿ ndécú v̄ai-yu cáháⁿ ndihí-yu Yá Ndiöxí.

¹³ Te té Pèlú ní quexìo-dé ndéé yuyèhe ní dácásáⁿ-dě, te ní quixí ìⁿ xíchí nání Ròdé ní quixi ndehe-xi nă cúú ñáyiú d̄acasaⁿ.

¹⁴ Te ní nucúhuⁿ ndudú-xi sá d̄iú tē Pèlú, te ní cudíí víhí ìní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ ngúñaha-xi xìi-yu sá nútñíí té Pèlú yuyèhe ndaa quehé.

¹⁵ Te ñá ní sàndáá ìní-yu tnúhu ní cáháⁿ-xi, te xăhăⁿ-yu xii-xi:

—¡Ná tnúhu v̄ihi cáháⁿ-öⁿ xíchí lùcú! —càchí-yu xăhăⁿ-yu.

Te xăhaⁿ-xi să ndàá nútñíí-dé, te xăhăⁿ-yu:

—Ñá d̄iú tē Pèlú chi espíritú sá xító ñaha xii-dé cúú să cáháⁿ —càchí-yu xăhăⁿ-yu xii-xi.

¹⁶ Te òré ducaⁿ x̄itnàhá-yu, te té Pèlú ní dácásáⁿ t̄ucu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá d̄iú tē Pèlú, te ní cuñúhu v̄ihí-yu.

¹⁷ Te ní quide-dé ndaha-dé núŭ-yu cuendá cadí-yu yuhú-yu. Te ní ngúíta-dé ní caní-dé cuendú năcuáa ní quide ñaha Yă Ndiöxí xii-dé sá ñí dácăcu

ñaha ìⁿ espíritú xínú cuèchi núú-gă xii-dé vecaá, te ní xáhaⁿ-dě xií-yu:

—Cúu-ndo tē Jàcobó ndihi dava-gá ñáyiu sàndáá iní tnúhu Jèsús nàcuáa ní quide ñaha Yă Ndiöxí xii-í —càchí-dé xăhaⁿ-dě xií-yu.

Te sátá dúcáⁿ nǐ xáhaⁿ-dě, te ní quee-dé cuáháⁿ-dé ingá xichi.

¹⁸ Te sátá nǐ túndaá, te ní ngüíta nchaa sandàdú càháⁿ ìⁿ càháⁿ ìⁿ-güedé, te xǐtnàha-güedé:

—Ñá túú-gă té Pèlú yíhí vècaá, ¿te nása cada-o-i? —càchí-güedé xǐtnàha-güedé.

¹⁹ Te té Hèrodés ní tendaha-dě títñí sandàdú cuáháⁿ-güedé cuánúndúcú ñàha-güedé, te ñá ní nàníhí ñáhá-güedě xii-dé. Te dătnùní ní cana-dé sandàdú cue téé ní xindeé ñáhá xì té Pèlú, te ní tenàá ñáhá-dě xii-güedé, te ní xáhaⁿ-dě xii dava-gá cue sandàdú-dé:

—Cahni-ndo cuè téé-ăⁿ —càchí té Hèrodés xăhaⁿ-dě.

Te dătnùní ní quee té Hèrodés distrítú Jùdeá cuáháⁿ-dé ñuú Cèsareá, yàcáⁿ ní ngúndecu-dé.

Ní xíhí té Hèrodés

²⁰ Té Hèrodés ní cudééⁿ-dě núú ñăyiu ñuú Tírú ndihi núú ñăyiu ñuú Sídón. Te xíăⁿ ní ndatnúhu-yu ní cuu ìⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihi ñáhá-yu xii-dé, te ní ndatnúhu ndihí-yu té Blàstú. Te téé-áⁿ cúú-dě chiuⁿ quide-dé núú tē Hèrodés, te ní chindee tnúhu ñaha-dě xií-yu, chi ní cáháⁿ ndàhú-yu núú tē Hèrodés sá vă cádá ũhú ñáhá-dě xií-yu. Te ducaⁿ nǐ quidé-yu cuèndá ñuú té Hèrodés-áⁿ quéé să xéxí-yu.

21 Te ní xáhaⁿ tě Hèrodés ná nduu quĩhíⁿ-yu ndatnúhu ndihí ñaha-dě xií-yu, te nduu-ǎⁿ ñĩ quíunuu-dé ìⁿ dóó vǎha, ìⁿ sá sácuĩhnu téé tàxi tñuní. Te ní ngóo-dé núú xìlé váha, xìlé sá sácõo nchihí téé tàxi tñuní, te ní ngüíta-dé ní cáháⁿ sàhú-dé dóho-yu.

22 Te uuⁿni ní cuáá-yu te càchí-yu:

—¡Téé-a càháⁿ-dé dico ñá díú těe ñuyíú-a cùu-dé chi ndiõxí cúú-dě! —càchí-yu xĩtnàhá-yu.

23 Te ñiu-ni òré-áⁿ ñĩ yáha ìⁿ espíritú xínú cuèchi núú Yǎ Ndiõxí, te ní sáñaha-xi cuèhé xii té Hèrodés. Te ducaⁿ ñĩ tnahá-dé chi mee-dě ñá ñĩ xǎhaⁿ-dě sá ñáyiú cùu-dé, te ní cáháⁿ-yu sá ndiõxí cúú-dě. Te nchìto-gá-dé ní sanú ñáhá tìndácú xii-dé, te dǎtnùní ní xíhí-dé.

24 Te ío tìtní xichí ní sáháⁿ ñáyiú sàndáá iní tñúhu Yá Ndiõxí ní cáháⁿ-yu tñúhu-gá, te ío chítú-yu ní sàndáá iní-yu tñúhu-gá.

25 Te té Bèé ndihí té Sàulú ní ndihí chiuⁿ-güedé, te ní ndee-güedé ñuú Jerusàlén cuáháⁿ-güedé ndihí té Juáá, àdi Mácú chi úú ñiu-dé.

13

Té Bèé ndihí té Sàulú cuáháⁿ-güedé dácuàha-güedé ñáyiú tñúhu Yá Ndiõxí nchaa ñuú xícá

1 Te ñuú Antiòquiá ndécú ìⁿ úú cue téé càháⁿ tñúhu Yá Ndiõxí núú nchàa ñáyiú ní sàndáá iní-xi tñúhu-gá. Te ndècu tucu ìⁿ úú cue téé cùu mestrú dácuàha ñaha-güedé xií-yu tñúhu-gá. Ìⁿ-dé nání-dě Bèé, te ìⁿ-dé nání-dě Xímú, te té Xímú-áⁿ xǎhaⁿ-güedé Nègrú chi tñuu-dě. Te ìngá-dé nání-dě Lùciú, te téé-áⁿ cúú-dě téé ñuú Cìrené. Te ìngá-dé

nání-dě Sàulú, te ingá tucu-dé nání-dě Manàén. Te té Manàén-án ndihí té Hèrodés tée cùu gobiernú Galileá ío váha ní xóo cáháⁿ ndihí tnàha-güedé cútnàhá ní cuu líhli-güedé.

² Te #ⁿ nduu ñá túú nă ní xèxi ñáyiú ní sándáá iní tnúhu Yá Ndiöxí cuendá mee-ni-gă ní cáháⁿ ndihí-yu, te ní xáhaⁿ Espíritú Yă Ndiöxí xií-yu:

—Tendaha-ndo tē Bèé ndihí té Sàulú quíhíⁿ-güedé dava-gá ñuú cada-güedé chiúⁿ tahu-í, chí ducaⁿ cuíní-í cunduu —càchí Espíritú-gá xăhaⁿ-xi xií-yu.

³ Te ní cáháⁿ ndihí tucú-yu Yá Ndiöxí, te ñá túú tnàhí ná ní xèxi tucú-yu, te ní sacáⁿ ndodo-güedé ndaha-güedé díquí tē Bèé ndihí té Sàulú. Te sátá dúcáⁿ ní quide-güedé, te ní quide ndee iní ñáhà-yu xii-güedé.

Té Bèé ndihí té Sàulú cuáháⁿ-güedé distritú Chìpré cáháⁿ-güedé tnúhu Yá Ndiöxí

⁴ Te té Bèé ndihí té Sàulú ní quee-güedé cuáháⁿ-güedé cuendá ducaⁿ cuíní Espíritú Yă Ndiöxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yácáⁿ ní quée-güedé bàrcú cuáháⁿ-güedé distritú Chìpré. Te ñuú-án cáá xití làmár chí ndècu ñuhu yichí xití ndute.

⁵ Te ní quexìo-güedé mei ñùú Salàminá, te ní quene-güedé bàrcú, te ní xica-güedé cuáháⁿ-güedé nchaa veñúhu ñáyiú isràél càháⁿ-güedé tnúhu Yá Ndiöxí. Te cuáháⁿ ndihí-güedé té Juàá cuendá chindee ñàha-dé xii-güedé.

⁶ Te ní tñi-güedé ichi cuáháⁿ-güedé ñuú Pàfós cáá ndàa ingá xio Chìpré, te yácáⁿ ní naníhí

tnáhá-güedě ndihî ïⁿ téé isràél nání-dě Barjèsús, te téé-áⁿ xíní-dé cada ndùu-dé, te càchí-dé sá càháⁿ-dé tnúhu Yá Ndiöxí dico ñá ndàá.

⁷ Te téé-áⁿ quidé chiùⁿ-dé ndihî té Sèrgiú, àdi Páblú chi úú ñiù-dé, te cùu-dé gobièrnú Chìpré, te ío túha-dé. Te ní cana-dé té Bèé ndihî té Sàulú, chi cuíní-dé cundedóho-dé tnúhu Yá Ndiöxí.

⁸ Te téé quide nduu-áⁿ ñá ní dàña-dé cáháⁿ-güedé tnúhu-gá, chi ñá ní cuíní-dé sá tée cùu gobièrnú-áⁿ tuha-dé ichi Yá Ndiöxí. Te ducaⁿ ñi quide té Barjèsús, téé xáhaⁿ-güedě Èlimás.

⁹ Te tnáhá tucu té Sàulú ndécú ùú ñiù-dé chi xáhaⁿ tùcu-güedé Páblú, te ndècu ndihî-dé Espiritú Yá Ndiöxí. Te ní xíndéhé ñi ñáhá-dě xii téé quide nduu-áⁿ.

¹⁰ Te ní xáhaⁿ-dě:

—Yòhó, chi dàtná quidé yùcu ñáváha quide-n chi mee-ni dándahú-n ñáyiú. Yòhó cúú-n dèhe sácuihná, chi nchaa tnúhu váha cuíní Yá Ndiöxí cáháⁿ-yu, te yòhó ñá dáña-n.

¹¹ Te vitna quiní-n nàcuáa cunduu, chi taxi Yá Ndiöxí ïⁿ castiú xii-n chi vá cùtnùní-gá núú-n càca cuu-n ïⁿ úú nduu —càchí-dé xáhaⁿ-dě xii téé quide nduu-áⁿ.

Te òré ducaⁿ ñi xáhaⁿ tē Páblú xii-dé, te òré-ni ní cuaa-dé, te ñá túú ní cùtnuní tnàhí-gá núú-dě, te ní xóo nducu-nă-dé ñáyiú ní xóo cuita nehe ñaha xì-dé.

¹² Te téé cùu gobièrnú ní xíní-dé nàcuáa ní quide té Páblú, te ío ní cuñúhu-dé. Te ní tnahá iní-dé tnúhu Jèsús, núu xíⁿ ní sándáá iní-dé.

Té Páblú ndihî té Bèé ndécú-güedě ñuú Antiòquia Pìsidiá

13 Te té Păblú ndihî dava-gá cue tée xîca cuu ndihî-dé ní quee-güedé bàrcú, te ní quee-güedé ñuú Páfós cuáháⁿ-güedé ñuú Pèrgé, te ñuú-áⁿ yîndèhu-xi distritú Pànfiliá. Te té Juáá ní nacuico-dě ní dándõ ñaha-dě xii-güedé cuánuhú-dé ñuú Jerusalén.

14 Te dava-gá-güedé ní quee-güedé ñuú Pèrgé cuáháⁿ-güedé ñuú Antiòquia, te Pìsidiá yîndàha-xi ñuú-áⁿ. Te nduu xîndetatú-yu, te ní sáháⁿ-güedé veñúhu ñáyiu isràél, te ní ngóo-güedé xití veñúhu.

15 Te cue tée ndècu veñúhu ní queheⁿ-güedé tutú yódó tnùní nchaa tnúhu sá ñî chídó tnùní ndíi Moisés ndihî tutú yódó tnùní nchaa tnúhu sá ñî chídó tnùní dava-gá cue tée ní xóo cáháⁿ tnúhu Yá Ndiõxí ndéé sanaha, te ní dácuáhá-güedě ní xíndedóho cue ñáyiu, te dătnùní cue tée yîndaha veñúhu-áⁿ ñî xáhaⁿ-güedě xii té Păblú ndihî dava-gá-güedé:

—Nchòhó cue tée cùu ñanî tnáhá-ndî, te núu cuinî-ndó cáháⁿ-ndó tnúhu Yá Ndiõxí, te cuu cáháⁿ-ndó tnàvíí cuendá cutúha-yu —càchí-güedé xáhaⁿ-güedě.

16 Te té Păblú ní ndacuíñî-dé, te ní ndacani-dé ndaha-dé cuendá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dě:

—Te nchòhó ñáyiu quide nchaa nacúaa càháⁿ Yá Ndiõxí ndihî nchaa nchòhó ñáyiu isràél, cund-edóho-ndo nchaa-ndo ìⁿ tnúhu na càháⁿ-í-a.

17 Te cuèi ndéé sanduu te cuèi vitna chindee ñaha-nî Yá Ndiõxí xii nchaa ñáyiu isràél, te ní nacáxi ñaha-gă xii-yu te ní chindee ñaha-gá cuendá cáyá-yu, chi cuinî-gá sá cúú vai-yu, te ducaⁿ ñî quide-gá cútnáhá ní xíndecú-yu nàcióⁿ Ègiptú.

Te dătnùnî ní dăcăcu ñaha-gă xií-yu ñuú-áⁿ, chi mee-gă nchaa ndăcu-gă quídé-gă.

18 Te ní xíndecú-yu ñⁿ xichi núú ñà túú tnàhí sàcúndecu ñáyiú údico cuía, te xití údico cuía-ăⁿ ñí cundee ìní-gă nchaa sá ñí quídé-yu.

19 Te Yá Ndiöxí ní chindee ñàha-gă xii ñáyiú isràél, te ní dánáă-yu úsá nàcióⁿ, chi cuendá ní cuiní-gă cuu cuendá-yu ñuhú-áⁿ.

20 Te dătnùnî ní cachí Yă Ndiöxí sá díú-ní cuè téé cùchiuⁿ taxi tnuní-güedé nchaa ñáyiú, te ducaⁿ ñí quide-güedé dătná cúmí ciendú dava cuía. Te sátá xĩăⁿ, te ní xíndecu té Sămuél téé ní cáháⁿ tnúhu Yá Ndiöxí.

21 Te dāvá-áⁿ ñí cuiní ñáyiú isràél sá cúndècu ñⁿ téé quíndaha ñàha-dé xií-yu, te Yá Ndiöxí ní cachí-gă sá tē Sàúl quíndaha-dě-yu, te téé-áⁿ ñí cuu-dé déhe té Cís, te té Benjámín téé ní xíndecu ndéé sanaha-gă ní cuu ñaní tnáhá-dě. Te té Sàúl ní xíndaha-dě ñáyiú údico cuía.

22 Te Yá Ndiöxí ñá ní cuiní-gă cundecu-ni-dé quíndaha-dě ñáyiú, chi ní cuiní-gă sá tē Dàvíí ndíhu ndaha-dě cue ñáyiú isràél, te ní cachí-gă: “Ío váha ní tnahá ìní-í năcuáa quíde té Dàvíí déhe téé Isàí, te cada-dé nchaa năcuáa cúñaha-ĩ xii-dé”, duha ní cachí Yă Ndiöxí –càchí té Păblú xăhaⁿ-dě xií-yu.

23 Te ní xáhaⁿ tùcu té Păblú:

–Díu-ni ñaní tnáhá tē Dàvíí cúú Jèsús. Te Yá Ndiöxí ní tendaha-gă Jèsús ní quixi-gă ñuyíú-a cuendá nchaa ñáyiú isràél ná quíndáá ìní ñáhá xii Jesús naníhí tãhú-yu, chi ducaⁿ ñí cachí Yă Ndiöxí cunduu.

24 Te cùtnàhá vátá ngüïta-gá Jèsús cáháⁿ-gá tnúhu Yá Ndiöxí, te ní cáháⁿ té Juàá núú ñäyiu isràél sá xíní ñùhu-xi dañá-yu nchaa sá cuèhé sá dúhá, te cuanduté-yu.

25 Te sa ta cùyatni-ni-gá cuú-dé, te ní xáhaⁿ-dě xií-yu: “Nchòhó càchí-ndó sã yùhú cùu-í Crìstú Yaá ndétú-ndó dico ñáhá, chi ñã díú yùhú cùu-í Crìstú, chi davitna quixi Crìstú Yaá tendaha Yã Ndiöxí quixi ñuyíú-a. Te yúhú cùu-í ñⁿ téé duuⁿ duuⁿ ñã túú tàú nandaxi cuèdicó chàú-gá dico quide-í chiuⁿ-gá”, duha ní cáháⁿ te Juàá –càchí té Pãblú xãhaⁿ-dě xií-yu.

26 Te ní xáhaⁿ tucu té Pãblú:

–Cundedóho tucu-ndo ìngá tnúhu na càháⁿ-í. Nchòhó tnàhá-ndó cùu-ndo ññaní tnàhá ndïi Àbrahám, te xíní-ndó sã Yã Ndiöxí cùnùu-gá. Te ñu-ni-gá cuíní-gá sá ncháá-ndó cùndedóho-ndo tnùhu-gá, chi cùu-xi tnúhu sá càháⁿ nàcuáa naníhí tàhú-ndó.

27 Te nchaa ñäyiu ndècu ñúú Jerusàlén ndihí nchaa cue téé cùnùu ñã ní cùtnuní iní-yu ndihí-güedé sá Yã Ndiöxí ní tendaha-gã Jèsús ní quixi-gá ñuyíú-a. Te ñã ní sãha-yu cuèndá sá díú Jèsús ní cacunehe cue téé ní cáháⁿ tnúhu Yá Ndiöxí ndéé sanaha cuèi ní dácuáhã-yu tnúhu-gá veñùhu-yu ndi tnahá úná nduu, nduu ndètatú-yu. Te ní cachí-yu sá ndècuéchi Jèsús, te ní xáháⁿ-yu sá cáhni ñàha-güedé xii-gá. Te xíãⁿ sa nàha cue téé ní xóo cáháⁿ tnúhu-gá ndéé sanaha sã dúcáⁿ càháⁿ-yu.

28 Te cuèi ñã túú ñã ní quide-gá te ní xáháⁿ-yu xii té Pìlatú téé cùu gobiernú sá táuchiuⁿ-dé cahni

ñaha-güedě xii-gá.

29 Te xíáⁿ núu ní sata caa ñaha-güedě xii-gá núú cùrúxí. Te ní quide-güedé nchaa nàcuáa ní chídó tnùní cue téé ní cáháⁿ tnúhu Yá Ndiöxí ndéé sanaha. Te sátá ní xíhí-gá, te ní nunehe ñaha-güedě xii-gá núú cùrúxí, te nchìdo ñaha-güedé cuáháⁿ, te ní chihi ñaha-güedě ìⁿ xití yaú.

30 Te Yá Ndiöxí ní dándótó-gă Jèsús.

31 Te titní xito ní sáháⁿ Jèsús núú ndécú ñáyiu ní xica cuu ndihí-gá, ñáyiu ní quee distritú Galileá ní sáháⁿ-yu ndihí-gá ñuu Jerusálén. Te vitna nchaa ñáyiu-áⁿ xăhăⁿ-yu xii dava-gá ñáyiu isrâél nàcuáa ní cuu ní ndoto-gá.

32 Te nchúhú càháⁿ-ndí nàcuáa cada-ndo nàníhí tàhú-ndó, chi Yá Ndiöxí ní xáhaⁿ-gă xii cue ñaní tnáhá-ó ñí xíndecu ndéé sanaha să téndàha-gá Déhe-gá Jèsús quixi-gá ñuyíú-a.

33 Te ní quixi-gá ní xíhí-gá, te ní dándótó ñaha Yá Ndiöxí xii-gá, te núu xíáⁿ naníhí tàhú-ó núu na quíndáá iní-ó-gă. Te ìⁿ téé ní cáháⁿ tnúhu Yá Ndiöxí ndéé sanaha ñí chídó tnùní-dé núú sàlmú cúú úú nàcuáa ní cáháⁿ Yá Ndiöxí ní xáhaⁿ-gă xii Déhe-gá, te duha ní xáhaⁿ-gă: “Yòhó cúú-n Déhe-í, te vitna cutnùní iní ñáyiu sá yŭhú cúú-í Tătá-n”, duha ní xáhaⁿ-gă xii Jèsús. Te diu-ni ducaⁿ ñí chídó tnùní téé ní cáháⁿ tnúhu-gá ndéé sanaha.

34 Te ingá xichi tucu núú tütú-gá ní chídó tnùní ìⁿ téé ní xíndecu ndéé sanaha nàcuáa ní xáhaⁿ-gă xii Déhe-gá, te duha ní xáhaⁿ-gă: “Mee-ni să văha cada ñaha-í dàtná ní xí-í té Dàvíí”, duha ní xáhaⁿ-gă. Te ducaⁿ ñí chídó tnùní téé ní xíndecu ndéé sanaha nàcuáa ní cáháⁿ Yá Ndiöxí, chi òré ní xíhí Jèsús te

ní dándótó ñàha-gá cuèndá sá vǎ tíú yìqui cuñú-gá.

³⁵ Te núu xíáⁿ duha ní chídó tnùnì ìⁿ tée ní xíndecu ndéé sanaha nǔú lǐbrú Sǎlmú nàcuáa ní xáhaⁿ-dě xii-gá: “Vá dáñá-n sǎ tíú yìqui cuñú Déhe-n chi ío váha quide-gá”, duha ní chídó tnùnì tée ní xíndecu ndéé sanaha –càchí té Pǎblú xáhaⁿ-dě xií-yu.

³⁶ Te xáhaⁿ tùcu-dé:

–Te té Dàvíí ní quide-dé nchaa chiúⁿ ní táhú Yǎ Ndiǒxí cada-dé, te dǎtnùnì ní xíhí-dé. Te ní chindúxi ñaha-güedě xii-dé yatni nàcuáa yìndúxi cue ñaní tnáhá-dě ndéé sanaha-gǎ, te xíáⁿ nǐ téhyú yìqui cùñú-dé.

³⁷ Te Jèsús chi ñá ní tēhyú yìqui cùñú-gá, chi ní dándótó ñàha Yá Ndiǒxí xii-gá.

³⁸ Te cuìní-í cachí tnúhu-í xii-ndo cuèndá cutnùnì iní-ndó nchàa-ndo sá cádá càhnu iní Yǎ Ndiǒxí nchaa cuéchi-o, chi ní xíhí Jèsús cuèndá naníhí tàhú-ó.

³⁹ Te nchaa ñáyiu na quìndáá iní ñáhá xì Jesús te cada càhnu iní-gá nchaa sá ñà túú vǎha ní quidé-yu, chi núu mee-ni tnúhu ní chídó tnùnì ndíi Moisés ná quìndáá iní-yu te vá nánihí tàhú-yu.

⁴⁰⁻⁴¹ Te ío coto-ndo mēe-ndo cuendá sá vǎ yǎha-ndo dàtná ní cachí Yǎ Ndiǒxí yáha cue ñáyiu ñá túú ní quide váha ní xíndecu ndéé sanaha. Te nàcuáa ní cáháⁿ-gá ní chídó tnùnì ìⁿ tée ní cáháⁿ tnúhu-gá ndéé sanaha, te duha ní xáhaⁿ-gǎ xií-yu dàvá-áⁿ:

Cundedóho nchaa nchòhó ñáyiu cuèhé yuhu-xi na càháⁿ-í ìⁿ tnúhu te quiní-ndó nǎ cuñúhu-ndo,
yúhú quidè-í vǎi núú sǎ ïo váha vitna ndècu-ndo ñuyíú-a,

te cuèi na còo ñáyiú cachí tnúhu xii-ndo nàcuáa
ndùu nchaa sá vǎha-án, dico nchòhó vá
quìndáá iní-ndó,

te sá dúcán càda-ndo vá quìndáá iní-ndó, te dàcuíta
nihnu-ndo mèe-ndo.

Duha ní xáhaⁿ-gǎ xií-yu te ducaⁿ ñí chídó tnùnì
téé ní cáháⁿ tnúhu-gá ndéé sanaha —càchí té Pǎblú
xǎhaⁿ-dě xií-yu.

42 Te òré ní ndee té Pǎblú veñúhu ñáyiú isràél
ndihì cue téé xica cuu ndihì-dé, te ní cáháⁿ ndàhú
ñáyiú yihì veñúhu núú-dě sá quìhìⁿ-dé núú ùná
nduu, te ñiú-ni tnúhu ní cáháⁿ-dě cáháⁿ tucu-dé òré
quexìo-dé.

43 Te sátá ñí túhú veñúhu-yu, te vài ñáyiú is-
ràél ndihì ñáyiú ní chitnahá ñáhá xií-yu nchicúnⁿ
nihnu quìde nacuáa quìdé-yu càháⁿ ndihì-yu Yá
Ndiǒxí cuáháⁿ ndihì-yu té Pǎblú ndihì té Bèé. Te ní
xáhaⁿ-güedě xií-yu sá vǎ dáñá ndéé-yu canchicúnⁿ
nihnú-yu tnúhu sá càháⁿ nàcuáa quìde Yá Ndiǒxí sá
cúú-xǐ-yu.

44 Te núú ùná nduu, nduu ndètátú-yu ní quexìo
vai vihi ñáyiú, chi ñihì ñuú ní quexìo ndedóho-yu
tnúhu Yá Ndiǒxí.

45 Te cuèndá sá ïo vài ñáyiú ní quexìo, núú xiǎⁿ
ní cuu cuédú ínì ñáhá ñǎyiú isràél xii té Pǎblú, te
ní xícuèhé ñáhǎ-yu xii-dé. Te ní xáhǎⁿ-yu xii-dé sá
dándàhú ñáhá-dě xií-yu ndihì tnúhu càháⁿ-dé.

46 Te té Pǎblú ndihì té Bèé ñá túú ní yùhú
ñáhá-güedě xií-yu. Te ní xáhaⁿ-güedě:

—Xini ñuhu-xi díhna-gá nchòhó ñáyiú isràél cáháⁿ
ndihì-ndí tnúhu Yá Ndiǒxí, te mee-ndo ñǎ cuínì-ndó
cùndedóho-ndo. Te sá dúcán quìde-ndo, te vá nánihì

tàhú-ndó, te ni vǎ cǎháⁿ-gá-ndí tnúhu Yá Ndiǒxí núú-ndó, dico cǎháⁿ-ndí núú dǎva-gá ñáyiu cuèi ñá díú ñǎyiu isràél cúũ-yu,

⁴⁷ chi ducaⁿ ñí táuchíúⁿ Yǎ Ndiǒxí cada-ndí. Te ní cachí-gá:

Cuìní-í cundecu-ndo dǎtná ìⁿ téé yòtnuú ñuhú cun-
decu-ndo

cǎháⁿ-ndó tnúhu-í núú nchàa ñáyiu ñá túú cùndihí-ndo ñáyiu ndècu ñihí ñuyíú, te naníhí tàhú-yu,

duha ní cǎháⁿ-gá —càchí té Pǎblú ndihí té Bèé xǎhaⁿ-güedě xii-yu.

⁴⁸ Te ñáyiu ñá túú cùu ñáyiu isràél ío ní cudíí ñí-í-yu sá dúcáⁿ ñí cǎháⁿ-güedé, te ní xítñahá-yu sá ïo váha cuáháⁿ tnúhu Yá Ndiǒxí. Te mee Yǎ Ndiǒxí sa nàha-gá nándi cùu ñáyiu naníhí tàhú, te díu-ñí ñáyiu-áⁿ ñí sándáá ñí-í-yu.

⁴⁹ Te nchaa xichi xíaⁿ ñí sáháⁿ-yu ní cǎháⁿ-yu tnúhu-gá.

⁵⁰ Te cue téé isràél ní ndatnúhu-güedé ndihí cue téé cùnuu, ndihí cue ñáyiu dìhí cùnùu, te ñáyiu dìhí-áⁿ ñà túú tnàhí cùmání-yu veñúhu. Te ní xáhaⁿ-güedě sá cǎdá ùhú-yu té Pǎblú ndihí té Bèé, te dǎtnùní cuícúⁿ ñáhǎ-yu xii-güedé, te ducaⁿ ñí quidé-yu.

⁵¹ Te ní casaⁿ ñuhu té Pǎblú ndihí té Bèé sáhá-güedě ní naquidi-güedé tícá chúhmá ñí tníí sáhá-güedě. Te ducaⁿ ñí quide-güedé cuendá cutnùní ñí-í-yu sá ñà túú ní quide váha-yu. Te dǎtnùní ní quee-güedé cuáháⁿ-güedé ñuú Ìconiú.

⁵² Te ñáyiu ní sándáá ñí-xi tnúhu Jèsús ío váha ní cuu ñí-í-yu cuendá sá ñí naníhí tàhú-yu, te

nchaá-yu sa ndècu ndihí-yu Espíritú Yă Ndiöxí.

14

Té Păblú ndihí té Bèé ndécú-güedě ñuú İconiú

¹ Te ní quexìo té Păblú ndihí té Bèé ñuú İconiú. Te ní sáháⁿ-güedé veñúhu ñáyiu isràél, te ío váha ní cáháⁿ-güedé tnúhu Yă Ndiöxí, te vâi ñáyiu isràél ndihí ñáyiu ñá túú cùu ñáyiu isràél ní sándáá iní-yu tnúhu-gá.

² Te dava ñáyiu isràél ñá ní sándáá iní-yu, te ní cáháⁿ cuèhé-yu cuendá té Păblú ndihí té Bèé cuendá sá vă quìndáá iní ñáyiu ñá túú cùu ñáyiu isràél.

³ Te ní xíndecu-güedé titní nduu, te ñá túú tnàhí ni yùhú-güedé ní dácuáhá-güedě ñáyiu tnúhu Yă Ndiöxí. Te mee-gă ní chindee ñăha-gá ní quide-güedé titní núú să vă yôo tnàhí ndàcu cada, te ío ní cuñúhu-yu. Te ducaⁿ ñă quide-gá cuendá cutnùnì iní-yu sá ndàá càháⁿ-güedé sá mée-gă ío cùu iní ñáhá-gă xií-yu, te naníhí tàhú-yu núu na quìndáá iní-yu tnúhu-gá.

⁴ Te ní quee dava ñáyiu ñuú İconiú, davá-yu cùndihí-yu ñáyiu isràél ñáyiu ñá túú sándáá iní tnúhu Jèsús. Te davá-yu cùndihí-yu cue téé ní táúchíuⁿ Jèsús càháⁿ tnúhu-gá.

⁵ Te ñáyiu isràél ndihí dava-gá ñáyiu ñá túú sándáá iní-xi ní cuu #ⁿnùú-yu ndihí cue téé cùnuu sá cánì-yu-güedé, te cuáha yúú ñáhă-yu xii-güedé.

⁶ Te té Păblú ndihí té Bèé ní níhí-güedě tnúhu sá cuinì-yu canihá-yu, núu xíăⁿ dayuhu ñă quee-güedé cuáháⁿ-güedé ñuú Lìstrá ndihí ñuú Dèrbé. Te

ndi ndúú ñuú-áⁿ yíndèhu-xi Licaoniá. Te ní sáháⁿ-güedé dava-gá ñuú líhli càa yatni xíaⁿ.

⁷ Te nchaá ñuú-áⁿ ní cáháⁿ-güedé tnúhu Jèsús.

Ñuú Lìstrá ní sáha yúú ñáhă-yu xii té Păblú

⁸ Te ñuú Lìstrá ndécú ñⁿ tée yacua, mee-ni núcóo-dé chi ducaⁿ tnàhí càa-dé ní cacu-dé.

⁹ Te ndèdóho-dé tnúhu càháⁿ té Păblú, te ní cutnùní iní té Păblú sá ïo sàndáá iní tée yacua-ăⁿ sá Yă Ndiöxí cada tátna ñaha-gă xii-dé, núu xíaⁿ ní xíndéhé ñàha váha té Păblú xii-dé.

¹⁰ Te té Păblú ní cáháⁿ níhi-dé, te ní xáhaⁿ-dě:

—Ndacuíñí cunutnúi váha-n —càchí-dé xăhaⁿ-dě.

Te ní ndacuíñí cunu-dé te ní xica-ni-dé.

¹¹ Te òré ní xiní-yu sá tē Păblú ní quide tátna-dé tée yacua-ăⁿ, te nchaá-yu ní cáháⁿ-yu tnúhu mée-yu tnúhu Licàoniá. Te ní cáháⁿ níhi-yu, te xítnàhá-yu:

—Cue tée-ăⁿ sànuu sá ñăyiu cùu-güedé dico ñáhá, chi ndiöxí cúu-güedě te ní quexìo-güedé ñuyíú-a —càchí-yu xítnàhá-yu.

¹² Te ní cachí-yu sá tē Bèé cúu-dě ndiöxí dánàní-yu Júpitér, te té Păblú cúu-dě ndiöxí dánàní-yu Mèrcuriú, chi cuendá tée-áⁿ cúu-dě tée càháⁿ.

¹³ Te càa ñⁿ veñúhu yuhu ñuú-áⁿ núu quidé cahnú-yu ndiöxí sá dánàní-yu Júpitér. Te dútú yíndàha veñúhu-áⁿ ndécá-dě ñⁿ úú ndicutu cuáháⁿ quehé veñúhu, te ñùhu itá dúcúⁿ-güedi. Te cue quiti-áⁿ cahni-dé cada cahnú-dé ndihí-yu té Bèé ndihí té Păblú ní cùu, chi ducaⁿ quidé-yu quide cahnú-yu ndiöxí-yu.

14 Te té Bèé ndihí té Păblú ní níhí-güedě tnúhu nàcuáa sàni iní-yu cadá-yu, te ní ndátá-güedě dóó-güedě cuendá cutnùní iní-yu sá ñă tnàhá iní-güedé nàcuáa sàni iní-yu cadá-yu. Te xìnu-güedé cuánguìhu-güedé tnuú-yu, te níhi ní cáháⁿ-güedé, te xăhaⁿ-güedě:

15 —¿Ná cuendá ducaⁿ cuíní-ndó càda-ndo? Te ḍiu-ni tnàha ñáyiu-ndo cùu-ndí, dìcò-ni tnúhu Yá Ndiöxí véxi-ndí dacuàha ñaha-ndí xii-ndo cuendá sá vâ cadá-gâ-ndó nàcuáa quide-ndo, te quindáá iní-ndó Yă Ndiöxí, chi ìⁿḍii-ni Yá Ndiöxí ndécú. Te ḍiu-gá ní cadúha-gá anḍiu ndihí ñuyíú-a ndihí làmár ndihí nchaandi túhú sá ìò ñuyíú-a.

16 Te ndéé sanaha ñí dáñá Yă Ndiöxí ní quidé-yu nàcuáa cuáháⁿ iní méé-yu.

17 Te ní xóo cada-gá sá vâha cuendá cutnùní iní-yu sá ìo váha iní-gá. Te ḍiu-gá dácùuⁿ-gá dáu, te tàxi-gá sá nchító-ó chi xìto-gá nchaa tatá xítú-ó, te xíⁿ cúdí^í iní-ó ndècu-o ñuyíú-a —càchí té Păblú ndihí té Bèé xăhaⁿ-güedě xií-yu.

18 Te cuèi ducaⁿ ñí xáhaⁿ-güedě nchaa tnúhu-áⁿ, dìco ìo úhú ní sándáá iní-yu ñá ní sàhní-yu ndicutu-áⁿ chi cuendá ducaⁿ tnàhí quidé-yu sàhní-yu ndicutu òré quidé càhnú-yu ndiöxí-yu.

19 Te ñuú Antiòquiá ndihí ñuú Ìconiú x̣ndecu dava ñáyiu isràél, te ní queé-yu cuáháⁿ-yu ñuú Lìstrá núú ndécú tē Păblú. Te xíⁿ ñí quexió-yu te ní xáhăⁿ-yu xii ñáyiu dii ñuú xíⁿ să cáhní-yu té Păblú. Te ní sáha yúú ñáhă-yu xii-dé, te ní cáhăⁿ-yu sá ñí xíhí-dé, te ní tṇi ñaha-güedě xii-dé, te tãñuhu ñaha-güedé xii-dé cuáháⁿ ìⁿ xio yuhu ñuú ní sá dáquéné ñaha-güedé.

20 Te ní quexìo cue ñáyiu sàndáá iní tnúhu Jèsús núú cáttu-dé-án, te ní nadúcúⁿ ndèé ñáhă-yu xii-dé, te nini xĩnutnĩ-yu-án ñĩ ndacóo-dé cuánuhú ndihĩ ñaha tùcu-dé xií-yu xití ñuú. Te nduu tnèé-án ñĩ ndee-dé ndihĩ té Bèé cuáhán-güedé ñuú Dèrbé.

21 Te ní cáháⁿ-güedé tnúhu Yá Ndiöxí ñuú-án, te ío vâi ñáyiu ní sàndáá iní-yu tnúhu-gá. Te dătnùní ní quee-güedé cuáhán tucu-güedé ñuú Lìstrá, ndihĩ ñuú Ìconiú, ndihĩ ñuú Antiòquiá.

22 Te ní xáhaⁿ-güedě xií-yu sá vă dáñá ñìhnú-yu tnúhu Jèsús. Te sá dúcáⁿ ñĩ cáháⁿ-güedé, te vîhi-gá ní cudíí ìní-yu cadá-yu nàcuáa cuìní Yă Ndiöxí cadá-yu, te ní xáhaⁿ-güedě:

—Dacuitíí cùndecu-o ñuyú-a ndoho-o, te dătnùní ducaⁿ te nacuaca ñaha Yă Ndiöxí xii-o —càchí-güedé xăhaⁿ-güedě xií-yu.

23 Te ní sáhán-güedé ndi tnahá ñⁿ ñⁿ xichi núú ndécú ñáyiu dàcuaha tnúhu Yá Ndiöxí, te ní taxi ndecu-güedé cue téé quindaha ñàha xií-yu, te ní cáháⁿ ndihĩ-güedé Yă Ndiöxí, te ñá túú tnahí ná ní xèxi-güedé cuèndá sá ñĩ cáháⁿ ndihĩ-güedé-gá. Te ní xáhaⁿ-güedě sá Yă Ndiöxí coto ñaha-gă xií-yu chi ñiu-ni-gá ní sàndáá iní-yu.

Té Păblú ndihĩ té Bèé cuáhán tucu-güedé ñuú Antiòquiá Síría

24-25 Te dătnùní ní quee té Păblú ndihĩ té Bèé cuáhán-güedé, ní yáha-güedé distrítú Pisidiá. Te ní quexìo-güedé ñuú Pèrgé, xián ñĩ cáháⁿ-güedé tnúhu Jèsús. Te ñuú-án yíndèhu-xi Panfiliá. Te dătnùní cuáhán-güedé ñuú Àtaliá.

26 Te yàcáⁿ ní quée-güedé bàrcú cuánuhú tucu-güedé ñuú Antiòquia. Te ñuú-áⁿ cúu-xí ñuú núú ní xícáⁿ táhũ-yu núú Yá Ndiöxí cuendá sá chíndèe ñaha-gá xii-güedé chiuⁿ quide-güedé. Te cuendá sá ní ndihì chiuⁿ-güedé nchaa ñuú núú ní sáháⁿ-güedé, núu xíãⁿ cuánuhú-na-güedé.

27 Te ní ndexìo-güedé ñuú-áⁿ, te ní cana-güedé nchaa ñáyiú sàndáá iní tnúhu-gá, te ní cani-güedé cuendú núú-yu nchaa nàcuáa ní cuu núú ní sáháⁿ-güedé, te xáhaⁿ-güedé: “Yá Ndiöxí ío ní chindee ñaha-gá xii-ndí ní cáháⁿ-ndí tnúhu-gá núú ní sáháⁿ-ndí, te mee-gã ní quide sá tnàhá ñáyiú ñá túú cùu ñáyiú isràél ní xíndedóho-yu tnúhu-gá cuendá quíndáá iní-yu”, càchí-güedé xáhaⁿ-güedé xii-yu.

28 Te vài nduu ní xíndecu-güedé ñuú Antiòquia ndihì nchaa ñáyiú ní sàndáá iní tnúhu Jèsús.

15

Ní natacá ñáyiú sàndáá iní tnúhu Jèsús ñuú Jerusàlén

1 Te ní quee ìⁿ ùú cue tée distrítú Jùdeá cuáháⁿ-güedé ñuú Antiòquia, te ní sáá-güedé, te ní xáhaⁿ-güedé xii ñáyiú sàndáá iní tnúhu Jèsús sá núu vá cuáha-güedé sèñá ñì nchaa cue tée dàtná ní cachí ndí Moisés, te vá náníhí tàhú-güedé.

2 Te sá dúcáⁿ ní cáháⁿ cue té-áⁿ, te ní ngüíta té Páblú ndihì té Bèé ní tenàá-güedé cue té-áⁿ, chí dandàhú ñáhá-güedé cuíní-güedé ní cùu. Te nchaa ñáyiú sàndáá iní tnúhu-gá ní cachí-yu sá quíhíⁿ té Páblú ndihì té Bèé ndihì ìⁿ ùú-gá-güedé ñuú Jerusàlén. Te yàcáⁿ cada-güedé ìⁿ jùndá ndihì

mee-ni cue téé ní táuchíúⁿ Jèsús càháⁿ tnúhu-gá, ndihí cue téé yìndaha ñáyiú sàndáá iní tnúhu-gá ñuú-áⁿ, te jùndá-áⁿ cada ndáá-güedé tnúhu ní cáháⁿ cue téé ní sáá ñuú Antiòquiá.

³ Te nchaa ñáyiú sàndáá iní tnúhu-gá ní quide ndee iní ñáhă-yu xii-güedé, te ní tñi-güedé ichi cuáháⁿ-güedé. Te ní yáha-güedé distritú Fèniciá ndihí distritú Sàmariá, te yàcáⁿ ní cani-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiöxí, te ní cudíí víhí iní nchaa ñáyiú ní xíndedóho-áⁿ.

⁴ Te té Páblú ndihí té Bèé ní ndexìo-güedé ñuú Jerusàlén, te ío ní cudíí iní-yu sá ñí ndexìo váha-güedé. Te ndècu dava-gá cue téé ní táuchíúⁿ Jèsús dácuàha ñaha xii-yu tnúhu-gá, ndihí cue téé yìndaha ñaha xii-yu, ndihí dava-gá ñáyiú sàndáá iní tnúhu-gá, te ní cani-güedé cuèndú núŭ-yu nàcuáa ní quide Yá Ndiöxí ní chindee ñaha-gá xii-güedé ní quide-güedé chiúⁿ-gá.

⁵ Te ndècu ñⁿ úú cue téé ní tuha ichi Yá Ndiöxí, te cue téé-áⁿ cúú-güedé cue téé farisèú, te ní ndacuíñí-güedé, te ní xáhaⁿ-güedé:

—Dacuíí xini ñuhu-xi sá cuàha-güedé sèñá ñií cue téé cùmání cue téé ñá túú cùu ñáyiú isràél, te cùñaha-ndo sã ná cáda-güedé nchaa nàcuáa ní chídó tñuní ndí Moisés —càchí cue téé cùu farisèú-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihí cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu.

7 Te vại vihi tnúhu ní cáháⁿ-güedé. Te té Pèlú ní ndacuíñí-dé, te ní xáhaⁿ-dě xii-güedé:

—Nchòhó cue tée ndècu ndìhi-í ichi Xítohó Jè-sucrìstú, chí cùndèdóho ìⁿ tnúhu na càháⁿ-í-a. Sa nàha-ndo sá ñí cachí Yă Ndiöxí sá diù-í cáháⁿ-í tnúhu Jèsús núú ñáyiu ñá túú cùu ñáyiu isràél cuèndá sá quèndáá iní-yu, te naníhí tàhú-yu.

8 Dico Yá Ndiöxí sa nàha-gá nása càa iní ìⁿ ìⁿ ñáyiu. Te cùtnuní iní-ó sǎ cúú iní ñáhá-gǎ xii cue ñáyiu ñá túú cùu ñáyiu isràél, chí ní sáñaha-gǎ Espíritú-gá ndécú ndìhí-yu dàtná cuìní-ndó ñí taxi-gá ndécú ndìhi nchoo.

9 Chi Yá Ndiöxí ìⁿnuu-ni cùu iní ñáhá-gǎ xii-o nchàa-o ndìhi cue ñáyiu ñá túú cùu ñáyiu isràél, chí tnàhá-yu ní xócání-gǎ nchaa sá cuèhé sá dúhá ñí xóo cadá-yu ndéé òré ní sándáá iní-yu Jèsús.

10 ¿Te ná cuèndá nchòhó cuìní-ndó càda ñáyiu ní sándáá iní tnúhu-gá ìⁿ sá ñá tnàhá iní-gá sá cadǎ-yu? Te cuìní-ndó dándoho-ndó-yu. Te ni nchòo te ni cue ñaní tnàhá-ó ñí xíndecu ndéé sanaha ñá ní ndàcú-yu cadá-yu nchaa xíǎⁿ.

11 Te vá dúcáⁿ cǎháⁿ-ndó, chí sa nàha-ndo sá Yă Ndiöxí ní cundàhú iní ñáhá-gǎ xii-o, te diò ducaⁿ ñí quide-gá sá nánihí tàhú-ó nchàa-o. Te diu-ni ducaⁿ ñí quide-gá ñáyiu ñá túú cùu ñáyiu isràél, te ní naníhí tàhú-yu —càchí té Pèlú xáhaⁿ-dě xii-güedé.

12 Te dàtnùnì té Bèé ndìhi té Pǎblú ní ngüíta-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xii-yu nàcuáa ní chindee ñàha Yá Ndiöxí xii-güedé, te ní quide-güedé vại núú sǎ vǎ yóo tnàhí ndàcu cada, te ducaⁿ te ní cutnùnì iní ñáyiu ñá túú cùu

ñáyiú isràél sá ndàá càháⁿ-güedé.

13 Te òré ní ndìhi cuèndú ní cáháⁿ-güedé, te té Jàcobó ní xáhaⁿ-dè:

—Nchòhó cue téé ndècu ndìhi-í ichi Xítóhó Jesu-
crístú, chí cùndèdóho ìⁿ tnúhu na càháⁿ-í-a.

14 Té Xímú, àdi Pelú chi úú òù-dé, ní cani-dé
cuèndú nàcuáa ní quide Yá Ndiòxí ndéé díhna ní
dáquée òⁿ-gá ñáyiú ñá túú cùu ñáyiú isràél tnuú
nchaa ñáyiú ñá túú ndècu ichi-gá, cuèndá cuìní-gá
chiñuhu ñàhá-yu xii-gá.

15 Te òⁿndí ní cáháⁿ-dé nàcuáa ní cáháⁿ Yá
Ndiòxí ndéé sanaha. Te òuha ní chíó tñùní cue
téé ní xóo cáháⁿ tnúhu-gá ndéé sanaha nàcuáa ní
cáháⁿ-gá, te òuha ní cachí-gá:

16 Dàtná cuìní-ndó cùu ìⁿ vehe ní sáá te ní ngoyo te
dàndaa-güedé xito cùu uú, ducaⁿ sãtnahá-xi
cada-xi ìⁿ nduu,

chi ñaní tnáhá ndí Dàvíí ní xóo cáháⁿ ndìhi ñàhá-yu
xii-í ní cùu, te ní dáñá ndèé-yu ichi-í,

te na quèxi-í te natuha ñaha tùcú-yu.

17 Te ducaⁿ te vài ñáyiú ñá túú cùu ñáyiú isràél
nandúcú-yu ichi-í te cáháⁿ ndìhi ñàhá-yu.

18 Duha ní cáháⁿ Yá Ndiòxí, te ducaⁿ ní chíó tñùní
cue téé ní xóo cáháⁿ tnúhu-gá ndéé sanaha —cachí
té Jàcobó xáhaⁿ-dè xii-güedé.

19 Te xáhaⁿ tùcu-dé:

—Yúhú cachí iní-í sá vã cúú dàsatú-ó iní nchaa
ñáyiú ta sàndáá iní-xi tnúhu Yá Ndiòxí, ñáyiú ñá túú
cùu ñáyiú isràél, te ìⁿ ùú-ni tnúhu cúñaha-o nàcuáa
cadá-yu.

20 Dico xìni ñuhu-xi daquihíⁿ-ó tùtú cúñaha-o sã
vã cáxi-gã-yu nchaa sá nchító-ó ndùu táhú nchaa
sá cachí-yu cùu ndióxí-yu. Te cúñaha-o sã vã càháⁿ

ndihí cue tée ñàdihí te núu ñá díú ñàdihí-güedé cúŭ-yu, te ni cuè ñáyiu dîhí vá càháⁿ ndihí-yu tée te núu ñá díú yî-yu cùu-güedé, te vá cáxî-yu cuñú quiiti cuèhné, te vá cáxî-yu níñí.

²¹ Te ducaⁿ cũñaha-o, chi ndi tnahá ñuú núú ndécŭ-yu, te xĩndecu ñáyiu isràél dácuàhá-yu tnúhu ní chídó tnùnî ndîi Moisés, te ndi tnahá nduu ndètátú-yu dàcuahá-yu tnúhu ndîi veñúhu-yu — càchí té Jàcobó xăhaⁿ-dě xii-güedé.

²² Te dătnùnî cue tée ní táúchíúⁿ Jèsús dacuàha ñaha xîi-yu tnúhu-gá, ndihí cue tée yîndaha ñáyiu sàndáá iní tnúhu-gá ní cachí-güedé sá ndúcú-güedě ïⁿ úú-gá cue tée quíhíⁿ ndihí té Păblú ndihí té Bèé ñuú Antiòquiá, te dîu-ni ducaⁿ ní càháⁿ dava-gá ñáyiu ndècu ichi-gá. Te úú cue tée ní ndúcú-güedě, ïⁿ-dé nánî-dě Silás, te ïⁿ-dé nánî-dě Jüdás, àdi Barsabás chi úú dîu-dé, te cùnuu-güedé ndi ndùú-güedé.

²³ Te ní cadúha nchaa cue tée cùnuu tutú canehe-güedé quíhíⁿ, te duha càháⁿ-xi:

“Cóvăha dîi-ndó nchàa-ndo. Nchúhú cue tée ní táúchíúⁿ Jèsús càháⁿ-ndî tnúhu-gá, ndihí cue tée yîndaha cue ñáyiu sàndáá iní tnúhu-gá quide ndee iní ñáhá-ndî xii nchòhó cue ñáyiu ndècu ndihî-ndî ichi-gá cuèi ñá díú ñáyiu isràél cúú-ndó. Te nchòhó ñáyiu xĩndecu ñuú Antiòquiá, ndihí nchòhó ñáyiu ndècu distritú Sîriá, ndihí nchòhó ñáyiu ndècu distritú Cìliciá, càchí tnúhu-ndî xii-ndo să

²⁴ nî níhî-ndî tnúhu sá ïⁿ úú cue tée ndècu iha ní quixi-güedé núú ndécú-ndó, te ñá túú chiúⁿ ni tahu-ndî quixi-güedé. Te sá ïⁿ tnúhu ní càháⁿ-güedé

ní xáhaⁿ-güedě xii-ndo sã ngündecu sèñá ñii-ndo, te canchicúⁿ nihnu-ndo nchàa nacuáa ní chídó tnùní ndíi Moisés, te xíãⁿ ní sani ñⁿ ní sani úú iní-ndó, chí ñá túú xìní-ndó nũ ndáá tnúhu càháⁿ-güedé àdi ñá ndàá.

25 Te ní ndatnúhu-ndí nàcuáa cunduu sá téndàha-ndí úú cue téé quixi-güedé ndihí té Bèé ndihí té Păblú, cue téé ío cùu iní-ndí, te cue téé-án càháⁿ-güedé nàcuáa càháⁿ-ndí-a.

26 Te diu-ni té Bèé ndihí té Păblú ní sáháⁿ-güedé ní càháⁿ-güedé tnúhu Xítóhó Jesucristú nchaa xichi. Te ndi tnahá cuáháⁿ-güedé cuíní-yu cahni ñàhá-yu xii-güedé.

27 Te tendaha-ndí té Júdás ndihí té Silás quixi-güedé tnàhá-güedé cachí tnúhu váha-güedé nàcuáa cuáháⁿ tnúhu càháⁿ-ndí.

28 Te diu-ni ducaⁿ càháⁿ-ndí càchí tnúhu-ndí nàcuáa càháⁿ Espíritú Yă Ndiõxí cada-ndo, chí nchúhú vá càháⁿ-ndí sá cáda-ndó nchàa sá ñí càháⁿ ndíi Moisés cada ñáyiu, chí ío úhú, te vá yõo ndacu cada. Te vitna na càháⁿ-ndí ñⁿ úú-ni tnúhu nàcuáa cada-ndo.

29 Vá cáxí-ndó sã nchító-ó ndùu táhú nchaa sá càchí ñáyiu cùu ndiõxí-yu, te vá cáxí-ndó ñíñí, te vá cáxí-ndó cùnũ quití cuèhné, te vá càháⁿ ndihí cue téé ñadìhí te núu ñá díú ñadìhí-güedé cúú-yu, te ni cuè ñáyiu dìhí vá càháⁿ ndihí-yu téé te núu ñá díú yíi-yu cùu-güedé. Te núu na càda-ndo nchaa nacuáa càháⁿ-ndí-a, te cada váha-ndo. Te vitna ío cada ndee ìní-ndó nchàa-ndo-na.” Duha ní chídó tnùní-güedé núú tütú ní tendaha-güedé cuáháⁿ.

30 Te ní quide ndee ìní-yu cue téé quíhíⁿ ñuú An-

tiòquia, te ducaⁿ te ní xica-güedé cuáháⁿ-güedé. Te òré ní quexìo-güedé ñuú-áⁿ, te ní cana-güedé nchaa ñáyiú sàndáá iní tnúhu Jèsús, te ní sáñaha-güedě tutú xií-yu.

³¹ Te ní dácuáhă-yu tutú ní sáñaha-güedě-áⁿ, te ní cudíí víhí iní-yu chí ío váha càháⁿ tutú-áⁿ.

³² Te té Jùdás ndihì té Silás tnàhá-güedé ní nduu táhú-güedě cáháⁿ-güedé tnúhu sá dácàhu iní ñáhá Yă Ndiöxí. Te ní xáhaⁿ-güedě vâi tnúhu nàcuáa cadá-yu, te vîhi-gá ní cudíí iní-yu cadá-yu nàcuáa càháⁿ Yă Ndiöxí cadá-yu.

³³ Te ní xíndecu-güedé ìⁿ ũú nduu ndihí-yu, te dătnùnì ní quide ndee iní ñáhă-yu xii-güedé cuendá sá nùhú-güedé núú vèxi-güedé, te mee-ni tē Jùdás cuánuhú-dé.

³⁴ Te té Silás ní xáhaⁿ-dě sá vă nùhú-ni-dé.

³⁵ Te té Păblú ndihì té Bèé ní ndóo-güedé ní cáháⁿ-güedé tnúhu Yă Ndiöxí ñuú Antiòquia, te vâi-gá tucu ñáyiú Antiòquia ní cáháⁿ-yu tnúhu-gá.

Xito cùu uú cuáháⁿ té Păblú càháⁿ-dé tnúhu Yă Ndiöxí núú ñáyiú

³⁶ Te sátá nǐ cuu cuéhé nduu, te ní xáhaⁿ tē Păblú xii té Bèé:

—Na quìhíⁿ-ó nchàa ñuú núú nǐ sáháⁿ-ó nǐ cáháⁿ-ó tnúhu Yă Ndiöxí cáháⁿ ndihì-o nchàa ñáyiú ní tuha ichi-gá cuendá quiní-ó nǐ ndècu váha-yu —càchí-dé xăhaⁿ-dě.

³⁷ Te té Bèé ní xáhaⁿ-dě sá quìhíⁿ ndihì-güedé té Juáá, àdi Mácú chí úú dîu-dé.

³⁸ Dico té Păblú ñá ní dàña-gá-dé quìhíⁿ té Juáá, chí ní dándöo ñaha-dě xii-güedé cúnàhá ní xíndecu-güedé Pànfilíá, te ní nacuico-dě

cuánuhú-dé, te ñá túú-gă ní sǎháⁿ ndihî ñaha-dě xii-güedé.

³⁹ Xíǎⁿ ní cuu ní tenàá tnáhá tĕ Bèé ndihî té Pǎblú, te ichi càa ichi caa ní cuu-güedé. Te té Bèé ndihî té Mǎcú ní quée-güedé bàrcú cuáháⁿ-güedé Chìpré.

⁴⁰ Te té Pǎblú ní xáhaⁿ-dĕ xii té Sìlás sá quihîⁿ ndihî ñaha-dĕ, te ñáyiu sàndáá iní-xi tnúhu Jèsús ní cáháⁿ ndihî-yu Yá Ndiǒxí sá chíndèe ñaha-gá xii-güedé.

⁴¹ Te ní xica-güedé cuáháⁿ-güedé te ní yáha-güedé ñihî distritú Sìriá ndihî distritú Cìliciá. Te ní cáháⁿ-güedé tnúhu Jèsús núú ncháa ñáyiu ní sàndáá iní tnúhu-gá, núú xíǎⁿ ío-gá ní cudhî iní-yu cadá-yu nàcuáa càháⁿ Yǎ Ndiǒxí.

16

Tnàhá té Timùteú cuáháⁿ ndihî-dé té Pǎblú ndihî té Sìlás

¹ Te té Pǎblú ndihî té Sìlás cuáháⁿ-güedé ñuú Dèrbé ndihî ñuú Lìstrá, te ñuú Lìstrá yàcáⁿ ndécú ìⁿ téé nàni Timuteú. Te téé-áⁿ sàndáá iní-dé tnúhu Jèsús, te tnàhá nǎná-dĕ sàndáá iní-aⁿ tnúhu-gá, te ñaha isràél cúú-áⁿ, te téé griégú cúú tǎtá-dĕ.

² Te ncháa ñáyiu ní sàndáá iní tnúhu-gá ñáyiu ndècu ñuú Lìstrá, ndihî ñáyiu ñuú Ìconiú, ncháa ñáyiu-áⁿ cudhî iní-yu nàcuáa quìde-dé.

³ Te ní cuiní té Pǎblú sá tnàhá té Timùteú quihîⁿ ndihî-dé dava-gá ñuú, núú xíǎⁿ díhna-gá sèñá ní sáha té Pǎblú ñihî té Timùteú, chi ñá ní tnàhá iní té Pǎblú sá càháⁿ cuèhé ñáyiu isràél cuèndá té Timùteú. Te ncháa ñáyiu isràél ndécú ñuú-áⁿ

xiní-yu sá tēe griègú cúú tătă-dě, te ñá díú tēe isràél cúú-dě, te xiǎⁿ ní sáha té Păblú sèñá ñii té Timùteú.

⁴ Te ndi tnahá ñuú ndi tnahá ñuú cuáháⁿ-güedé cáháⁿ ndihi-güedé nchaa ñáyiú ní sándáá iní tnúhu Jèsús. Te ní xáhaⁿ-güedé nàcuáa cáháⁿ tutú ní cadúha cue tée ní táuchíúⁿ Jèsús dacuàha ñaha xií-yu tnúhu-gá, ndihi cue tée yìndaha ñáyiú sándáá iní tnúhu-gá ñuú Jerusalén.

⁵ Te cuendá ducaⁿ ñi sáháⁿ-güedé nchaa ñuú núú ndécú ñáyiú sándáá iní tnúhu-gá ní dácuhá ñaha-güedé xií-yu, núú xiǎⁿ tá cùu túha-gá-yu tnúhu Yá Ndiǒxí, te vài-gá-yu ní tuhá-yu ichi-gá.

Ní dácótó ñàha-xi xii té Păblú sá ñi xiní-dé ñⁿ tée distrítú Macèdoniá

⁶ Te ñá ní dàña Espíritú Yá Ndiǒxí quíhíⁿ-güedé cáháⁿ-güedé tnúhu-gá distrítú Àsiá, núú ní sáháⁿ-güedé distrítú Frìgiá ndihi distrítú Gàlaciá cáháⁿ-güedé tnúhu-gá.

⁷ Te ní sáá-güedé yuhu distrítú Mìsiá. Te quíhíⁿ-güedé distrítú Bìtiniá ní cùu, dico ñá ní dàña Espíritú Yá Ndiǒxí quíhíⁿ-güedé yàcáⁿ.

⁸ Te ní yáha-güedé Mìsiá, te ní quexìo-güedé ñuú Tròás, te yàcáⁿ ní nanítnáhá-ndí ndihi-dé.

⁹ Te ñⁿ niú ní dácótó-xí núú tē Păblú sá ñi xiní-dé ñⁿ tée distrítú Macèdoniá nútñi-dé, te ní xáhaⁿ tēe-áⁿ xii té Păblú: “Cada ndee iní-n quíhíⁿ-n Màcedoniá chi dacuàha ñaha-n nchaa sá xiní-n”, cächí-dé xáhaⁿ-dē, ní dácótó ñàha-xi xii té Păblú.

¹⁰ Te cuendá sá dúcáⁿ ñi dácótó ñàha-xi xii té Păblú núu ní ndatnúhu-ndí quíhíⁿ-ndí Macèdoniá, chi ní cutnùní iní-ndí sá cáná ñàha Yá Ndiǒxí quíhíⁿ-ndí cáháⁿ-ndí tnúhu-gá núú ñáyiú yàcáⁿ.

Té Păblú ndihî té Silás ndécú-güedě ñuú Filipú

11 Te ní quee-ndí bàrcú ñuú Tròás, te cuáháⁿ ndáá-ndí ñuú Samòtraciá, te yàcáⁿ ní quexìo-ndí, te ní yáha-ni-ndí cuáháⁿ-ndí. Te nduu tněé ní quexìo-ndí ñuú Nèápolís.

12 Te yàcáⁿ ní quene-ndí bàrcú, te xìca-na-ndí cuáháⁿ-ndí ñuú Filipú te ñuú-áⁿ yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñuú Filipú-áⁿ ïo cùnuu-xi, chi ío chitu ñăyiu rò má ní ngóo-yu.

13 Te nduu ndètátú-yu ní quee-ndí ñuú cuáháⁿ-ndí ìⁿ xio yuhu yŷte, chi yàcáⁿ sàháⁿ-yu càháⁿ ndihî-yu Yá Ndiöxí. Te òré ní quexìo-ndí, te ní naníhí tnáhá-ndí ndihî mee-ni ñăyiu ðihî, te ní cáháⁿ-ndí tnúhu Yá Ndiöxí ní xíndedóho-yu.

14 Te ndècu ìⁿ ñaha nani Lidiá ní xíndedóho-aⁿ nàcuáa ní cáháⁿ-ndí, te ñaha ñuú Tiàtirá cúú-áⁿ, te ðico-aⁿ dóo muràdú, te ío càháⁿ ndihî-aⁿ Yá Ndiöxí. Te ðiu-ni mee Yá Ndiöxí ní chindee ñàha-gá ní sándáá iní-aⁿ tnúhu ní cáháⁿ té Păblú.

15 Te ní sandute-aⁿ ndihî landú-aⁿ, ndihî nchaa ñăyiu xínu cuechi núú-aⁿ, te ní cachí-aⁿ xii-ndí:

—Te núu ní cutnùní iní-ndó sã ñí sándáá ndisa iní-í tnúhu Jèsús, te cundecu tnaa-ndo vèhe-í — càchí-aⁿ xii-ndí.

Te ní quide yica-aⁿ ñí xíndecu-ndí vehe-aⁿ.

16 Te ìⁿ nduu ñùhu-ndí ichi cuáháⁿ-ndí núú càháⁿ ndihî-yu Yá Ndiöxí, te ní naníhí-ndí ìⁿ xíchí ñúhú ìchi, te yìhî ñaha espíritú cündihî yucu ñávàha xii-xi. Te xíáⁿ ní quide ní cáháⁿ-xi nchaa sá vã yõo tnàhí cùtnuní iní-xi núú nchàa ñăyiu ní sángándihî

ñaha xii-xi. Te ñáyiú dii vèhe-xi xinu cuechi-xi ío vài díhúⁿ ñí níhí-yu chi ní cháhu nchaa ñáyiú ní sángándihí ñaha xii-xi.

¹⁷ Te xíchí-ǎⁿ ñí chinchícúⁿ ñáhá-xí xii-ndí ndihí té Pǎblú ndëndaha ñàha-xi cuáháⁿ, te ní cáháⁿ níhi-xi xǎhaⁿ-xi xii dava-gá ñáyiú:

—Cue téa-xi xinu cuechi-güedé núú Yǎ Ndiǒxí, chi ío càhnu cuu-gá, te càchí tnúhu-güedé nása cada-ndo nàníhí tǎhú-ndó —càchí-xi xǎhaⁿ-xi xii-yu.

¹⁸ Te titní xito ní yáha-ndí ducaⁿ-ni ñí cáháⁿ-xi. Te ñá ní cùndee-gá iní té Pǎblú sá dúcáⁿ càháⁿ-xi, núu ní nanchocuíhnu-dé núú nútníⁿ-xi, te ní xǎhaⁿ-dě xii espíritú cùndihí yucu ñávǎha yihí ñaha xii-xi:

—Ío càhnu cuu Xítóhó Jesucristú, núu xíǎⁿ càchí-í sá xócuíñí-n vǎ quíhí-gǎ-n yiquí cuñú xíchí-a —càchí-dé xǎhaⁿ-dě.

Te òré-ni ní quee espíritú cùndihí yucu ñávǎha-áⁿ yiquí cuñú-xi.

¹⁹⁻²⁰ Te ñáyiú dii vèhe-xi xinu cuechi-xi-áⁿ ñí cutnùníní iní-yu sá vǎ ñihí-gá-yu díhúⁿ cuendá tnúhu càháⁿ-xi, núu ní tñíⁿ-yu té Pǎblú ndihí té Silás ndécá ñáhá-yu cuáháⁿ núú cuè téa cùchiuⁿ Romá, te xǎhǎⁿ-yu xii-güedé:

—Cue téa-xi cùu-güedé cue téa isráel, te ío dusaⁿ xíquide-güedé ñuú-ó.

²¹ Te cuíní-güedé cada-o nàcuáa quide-güedé, te vá cúú dùcaⁿ cada-o chi ñáyiú nacióⁿ Rómá cúú-ó —càchí-yu xǎhǎⁿ-yu xii cue téa cùchiuⁿ.

²² Te uuⁿ-ni ní cáháⁿ ncháá-yu, te xǎhǎⁿ-yu sá ñà túú quide váha té Pǎblú ndihí té Silás. Te cue téa cùchiuⁿ ní cándeé-güedé dóó tǎ Pǎblú ndihí

dóo tē Silás ní ndátá-güedě, te ní táuchíúⁿ-güedě caniha-güedě ndihí tnudli xii-güedé.

23 Te ní caniha-güedě, te dātnùní ní chihi ñaha-güedě vecaá. Te ní xāhaⁿ-güedě xii té ndēnchito vecaá sá cáda cuèdadú víhí-dě cuendá ná canú-güedé vecaá.

24 Te cuendá sá dúcáⁿ ñí cáháⁿ-güedé, núu té ndēnchito vecaá ní dáyāha ñaha-dě ingá cuartú ndécú xítí vecaá, te ní chihi-dé sáhá-güedě yaú nduhu, te ní quide tii-dé.

25 Te dava niú ní cáháⁿ ndihí té Pāblú ndihí té Silás Yā Ndiöxí, te ní xita-güedé ndudú ní quide càhnu ñaha-güedé xii-gá. Te dava-gá cue té yìhi vecaá ní xíndedóho-güedé nàcuáa ní xita-güedé.

26 Te uuⁿni níhi víhi ní tnáa ní quidi-xi ndéé cimientú vecaá, te ní nacaáⁿ nchaa yèhe vecaá, te ní ndihí cadèná ndútú cuè té yìhi vecaá ní nandáxí.

27 Te ní ndiquíú cúnú ìní té ndēnchito vecaá, te ní quide cuendá-dé nchìi nchaa yèhe vecaá. Te ní tava-dé machití-dé cahni-dé méé-dě ní cùu, chi ní cáháⁿ-dě sá ñí ndihí cue té yìhi vecaá ní xinu ni cùu.

28 Te té Pāblú ní cáháⁿ níhi-dé, te xāhaⁿ-dě xii té ndēnchito vecaá:

—Vá dúcáⁿ càda-n cahni-n mee-n, chi nchaa-ni-ndí yíhí —càchí-dé xāhaⁿ-dě xii té ndēnchito vecaá.

29 Te dātnùní ní xícáⁿ té ndēnchito vecaá ñuhú, te xínu-dé cuánguihu xítí vecaá núu yíhí tē Pāblú ndihí té Silás, te quidi ñaha-ná-xi xii-dé ní quexìo-dé ní ngüíñí xítí-dě núu-güedé.

30 Te dătnùnî ndécá ñàha-dé xii-güedé ní ndee vecaá, te ní xicáⁿ tnúhú-dě núú-güedě, te xàhaⁿ-dě:

—Nchòhó cachí tnúhu-ndo năsa cada-í naníhí tǎhú-í —càchí-dé xàhaⁿ-dě.

31 Te ní xàhaⁿ-güedě:

—Quindáá iní-n ndìhî ñadihí-n, ndìhî landú-n, ndìhî nchaá ñáyiú xìnu cuechi núú-n tnúhu càháⁿ Xítóhó Jesucrístú, te naníhí tǎhú-ndó —càchí-güedé xàhaⁿ-güedě.

32 Te ní dácuahá ñàha-güedé xii téé nděchito vecaá ndìhî nchaá ñáyiú ndècu vehe-dé tnúhu Yá Ndiǒxí.

33 Te diu-ni òré-áⁿ ñă naquete-dé sátá-güedě núú ñă ñáni, te dătnùnî ní sandute-dé ndìhí-yu.

34 Te ndèca ñàha-dé cuáháⁿ vehe-dé ní sǎñaha-dě sá ñă xexi-güedé, te ní cudíí víhí ìní téé nděchito vecaá ndìhî nchaá-dé vehe-dé sá ñă tuhá-yu ichi Yá Ndiǒxí. Te cuándihu tucu té Pǎblú ndìhî té Silás vecaá.

35 Te nduu tněé ní xàhaⁿ cuè téé cùchiuⁿ xii poleciá cuáháⁿ-güedé cúu-güedé téé nděchito vecaá queñuhu-dé úú cue téé cuánguihu ndedí nduu ìcu núhú-güedé.

36 Te téé nděchito vecaá ní xàhaⁿ-dě xii té Pǎblú ndìhî té Silás:

—Cue téé cùchiuⁿ ní cachí-güedé sá queé-ndó nùhú-ndó, chi ñá túú-gǎ ná cada-güedé, chi sa ní yáha cuèndá-ndó —càchí téé nděchito vecaá xàhaⁿ-dě xii-güedé.

37 Te té Pǎblú ní xàhaⁿ-dě xii cue téé cù poleciá:

—Téé rò má cúú-ndí, te vá cúú dùcaⁿ-ni cunduu, chi ní caniha-güedě tnudì xii-ndí, te ní xiní-yu nchaá-yu. Te ñá túú tnàhí ñă xicáⁿ

tnúhú-güedě nŭu ndáá ndècuéchi-ndí àdi ñáhá, chi cuendá-ni ní chihi ñaha-güedě vecaá xii-ndí. Te vitna cuini-güedé dacăcu ñaha-güedě núhú-ndí cuendá sá vǎ yōo quiní ñáhá nŭhú-ndí cáháⁿ-güedě, dico vá cúú dùcaⁿ cada ñaha-güedé xii-ndí. Chí cuàháⁿ cúñaha-ndo na quixi mee-güedé queñuhu ñaha-güedě —càchí té Pǎblú xǐ-dé cue poleciá.

³⁸ Te cue tée cùu poleciá cuánuhú-güedé núú ndécú cuè tée cùchiuⁿ, te ní xáhaⁿ-güedé nàcuáa ní cáháⁿ té Pǎblú. Te sá dúcáⁿ ñí xáhaⁿ pòleciá sá tēe ròmá cúú-güedě, xǐⁿ ní yùhú-güedé.

³⁹ Te ní sáháⁿ cue tée cùchiuⁿ yehe vecaá, te ní xáhaⁿ-güedě sá cádá càhnu iní-güedé sá ñí chihi ñaha-güedě vecaá, te ní ndeñuhu ñaha-güedě vecaá. Te ní cáháⁿ ndàhú-güedé núú cuè tée ní xǐhi vecaá sá ndéé-güedě ñuú-áⁿ nŭhú-güedé.

⁴⁰ Te ní ndee-güedé vecaá, te cuáháⁿ-güedé vehe tá Lìdiá, te ní ndatnúhu-güedé ndihí nchaa ñáyiu ní sándáa iní-xi tnúhu Jèsús, te ní xáhaⁿ-güedě xíi-yu nàcuáa cadá-yu, te ío ní cudíí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiu ñuú Tesalónica

¹ Te ní yáha-güedé ñuú Ànfpólís ndihí ñuú Apòloniá, te ní quexìo-güedé ñuú Tesalónica, te yàcáⁿ cáá ìⁿ veñúhu ñáyiu isràél.

² Te ní sáháⁿ té Pǎblú veñúhu-áⁿ, chi ducaⁿ tnàhí quide-dé, te ndí tnahá nduu ndètatú-yu ní sáháⁿ-dé veñúhu-áⁿ ũní xito. Te ní ndatnúhu ndihí ñaha-dě

xií-yu nàcuáa ní chídó tnùní cue téé ní xóo cáháⁿ tnúhu Yá Ndiöxí ndéé sanaha.

³ Te ní xítnũhu ñaha-dě nàcuáa ní cáháⁿ cue téé-áⁿ sã Crìstú Yaá tendaha Yã Ndiöxí quixi ñuyíú-a ndoho vïhi-gá, te cuú-gá, te ndoto-gá, te xãhaⁿ-dě:

—Te ðiu Jèsús cúú Crìstú Yaá ní tendaha Yã Ndiöxí ní quixi ñuyíú-a, núu xíãⁿ càchí tnúhu-í vitna —càchí té Pãblú xãhaⁿ-dě xií-yu.

⁴ Te dava ñáyiu isràél ní sándáá iní-yu tnúhu ní cáháⁿ té Pãblú, te ní níhí tnáhã-yu ndihí-dé, ndihí té Silás. Te vài ñáyiu griégú ñáyiu càháⁿ ndihí Yá Ndiöxí ní sándáá iní-yu tnúhu Jèsús. Te ndècu titní ñáyiu ðihí ñáyiu cùnuu, te ñáyiu-áⁿ tnàhá-yu ní sándáá iní-yu tnúhu-gá.

⁵ Te dava ñáyiu isràél ñá túú ní cùu váha iní-yu núú tẽ Pãblú núu ní ndúcũ-yu cue téé cuihna ìní-xi tuhío-güedé cada chiuⁿ-güedé, chi ndi cuihnu ndi cuihnu-ni-güedé, te nchaá-yu ndihí cue téé-áⁿ ndi coyo ndi coyó-yu xĩcuáá-yu. Te sátá ñi tecú dóho dava-gá-yu, te ní sáháⁿ tuhá-yu, te ío ní quide dùsáⁿ-yu. Te nísáháⁿ-yu vehe té Jàsón, te ní quide yicá-yu ní quihu-yu vehe-dé nándúcú-yu té Pãblú ndihí té Silás cuëndá queñuhu ñàhá-yu núú nchaa ñáyiu.

⁶ Te ñá ní nàníhí ñáhã-yu xii-güedé, núu xíãⁿ ní tnií-yu té Jàsón ndihí ñiⁿ ùú-gá cue téé sándáá iní tnúhu Jèsús, te tãñuhu ñahá-yu xii-güedé cuáháⁿ núú cuè téé cùchiuⁿ. Te òré ní quexió-yu núú ndécú cuè téé cùchiuⁿ, te ní ngüíta-yu ní cuáá-yu, te xãhãⁿ-yu xii-güedé:

—Ní quexío cue téé-ãⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú

núu xícá cùu-güedé.

⁷ Te té Jàsón-ǎⁿ ní xáhaⁿ-dě sá cúu cùndecu-güedé vehe-dé, te ñá túu sàndáá iní-güedé nàcuáa càháⁿ té Cèsár té yìndaha cuéhé nàcióⁿ, te càchí-güedé sá ndécú ìngá té cùnuu-gá tucu nàni-dé Jèsús — càchí-yu xǎhǎⁿ-yu xii cue té cùchiuⁿ.

⁸ Te sátá dúcáⁿ ñí càháⁿ-yu, te ní cudééⁿ víhí cue té cùchiuⁿ ndìhi dava-gá ñáyiu ndèdóho.

⁹ Te vài díhúⁿ ñí xícáⁿ cue té cùchiuⁿ núu tē Jàsón ndìhi dava-gá cue té cuáháⁿ ndìhi-dé cuendá té Pǎblú ndìhi té Silás, te núu na ndèe-güedé núhú-güedé, te nacuañaha cuè té cùchiuⁿ díhúⁿ-güedé.

Té Pǎblú ndìhi té Silás ndécú-güedé ñuú Bèreá

¹⁰ Te òré ní cundiⁿquⁿ, te ní quide ndee ìní ñáhá ñáyiu sàndáá iní tnúhu Jèsús xii té Pǎblú ndìhi té Silás, te ní xica-güedé cuáháⁿ-güedé ñuú Bèreá. Te ñu-ni nduu ñí sáá-güedé yàcáⁿ ní sáháⁿ-güedé veñúhu ñáyiu isràél.

¹¹ Te váha-gá iní ñáyiu ñuú Bèreá dàcúúxí ñáyiu ñuú Tesalónicá, chí ío ní cudíí ìní-yu ní xíndedóho-yu tnúhu Jèsús, te ñⁿ nduu ñⁿ nduu ní dàcuáhǎ-yu tnúhu ní chídó tnùní cue té ní xóo càháⁿ tnúhu Yá Ndiǒxí ndéé sanaha cuendá cuíni-yu quíni-yu núu ndáá càháⁿ té Pǎblú ndìhi té Silás.

¹² Te titní ñáyiu isràél ní sàndáá iní-yu tnúhu-gá ndìhi titní cue té grìégú ndìhi ñáyiu dìhí ñáyiu cùnuu ní sàndáá iní-yu.

¹³ Te dava ñáyiu isràél ndécü-yu ñuú Tesalónicá, te ñáyiu-áⁿ ñí níhí-yu tnúhu sá ndécú tē Pǎblú ndìhi té Silás ñuú Bèreá càháⁿ-güedé tnúhu Yá Ndiǒxí,

núu xíãⁿ ní sáháⁿ-yu ñúú Bèrèá ní dácuándèhndé-yu núu nchàa ñáyiú vátá dácuàha-gá. Te ñáyiú-áⁿ ñí sándáá iní-yu tnúhu ndehnde te ní cudééⁿ víhí-yu núú-güedě.

14 Te òré-áⁿ ñí xáhaⁿ ñáyiú sàndáá iní tnúhu-gá xii té Păblú sá quíhíⁿ-dé yuhu làmár, te ní xica-dé cuáháⁿ-dé, te té Silás ndihí té Timùteú ní quendóo-güedě ñúú Bèrèá.

15 Te ìⁿ úú-güedě cuáháⁿ ndihí-güedě té Păblú, te ndèca ñaha-güedě cuáháⁿ ndéé ñúú Àtenás, te ní xáhaⁿ tē Păblú xii-güedě:

—Núu na nùhú-ndó, te cúu-ndo tē Silás ndihí té Timùteú ná quíxí ndihí-ni-güedě nanítnáhá-ndí iha —càchí-dé xáhaⁿ-dē.

Te ní xica-güedě cuánuhú-güedě.

Té Păblú ndécú-dě ñúú Àtenás

16 Te ñúú Àtenás ndétú tē Păblú quíhíⁿ té Silás ndihí té Timùteú. Te yàcáⁿ ní xiní-dé sá ïo cuéhé sã càchí-yu cùu ndiòxí-yu ndècu te ñá ndàá sá díú ndiòxí cúú-xí, te xíãⁿ ñá túú ní cùu váha iní-dé, chi ñá tnàhá iní-dé nàcuáa quidé-yu.

17 Te ní sáháⁿ-dé veñúhu ní cáháⁿ ndihí-dé ñáyiú isràél ndihí dava-gá ñáyiú càháⁿ ndihí Yá Ndiòxí. Te ìⁿ nduu ìⁿ nduu sáháⁿ-dé xití ñúú càháⁿ-dé tnúhu-gá ndihí nchaa ñáyiú xica cuu yacáⁿ.

18 Te cue tée cùu epicureú ndihí cue tée cùu esto-icú, cue tée-áⁿ ñí ndatnúhu-güedě ndihí té Păblú, te dava-güedě xítnàha-güedě:

—¡Ná tnúhu víhi cáháⁿ tée lùcú-ãⁿ! —càchí-güedě xítnàha-güedě.

Te dava-güedě xítnàha-güedě:

—Sàni iní-ndí sá cãháⁿ-dé cuendá ndiöxí sá vätä quini-gá-ó —cächí-güedé xitnaha-güedé.

Te ducaⁿ xitnaha-güedé, chi cãháⁿ té Pãblú tnúhu Jèsús, te ní cãháⁿ-dé nãcuáa ní dándótó ñaha Yá Ndiöxí xii-gá, xíãⁿ nõu ducaⁿ xitnaha-güedé.

¹⁹ Te ndèca ñaha-güedé xii té Pãblú cuáháⁿ ìⁿ xichi núú nání Àreópagú, te ní xáhaⁿ-güedě xii-dé:

—Cächí tnúhu ndáá-n nãsa cuáháⁿ tnúhu cãháⁿ-n, chi na cùtnuní ndáá iní-ndí,

²⁰ chi ducaⁿ-ni cãháⁿ-n tnúhu sá ñà túú sácúndedóho-ndí, te cuini-ndí cachí tnúhu ndáá-n nãsa ndùu tnúhu-áⁿ cuendá cutnùní váha iní-ndí —cächí-güedé xãhaⁿ-güedě xii-dé.

²¹ Te nchaa ñáyiú ñuú Àtenás ndihí ñáyiú dava-gá ñuú, mee-ni tnúhu saa cuini-yu cãháⁿ-yu, nchaa sá vätä cúndedóho-gá-yu cuini-yu cundedóho-yu.

²² Te té Pãblú ní ngúnutnii-dé núú xixúcu-yu nchaá-yu, te xãhaⁿ-dě:

—Nchòhó cue ñáyiú ñuú Àtenás, cundedóho-ndo nchaa tnúhu na cãháⁿ-í-a. Ío quide cahnu nchohó sá cächí-ndó cùu ndiöxí-ndó.

²³ Te vitna ní quexio-í ñuú-ndó, te ní xiní-í sá yàyacáⁿ ndécú nchaa sá cächí-ndó cùu ndiöxí-ndó cãháⁿ ndihí-ndo. Te ní xiní-í ìⁿ xichi núú ndéé tnuní quidé cahnu-ndo Yá Ndiöxí Yaá ñá túú xiní-ndó, te ñu-ni ducaⁿ cãháⁿ lètrá ndéé tnuní xíaⁿ, te cächí-xi: “Iha quide cahnu-ndí Ndiöxí sá ñà túú xiní-ndí”, duha cãháⁿ lètrá-áⁿ. Te quide cahnu-ndo Yá Ndiöxí cãháⁿ-ndó, dico ñá túú xiní-ndó nãsa càa-gá, te yúhú xiní ndáá-í nãcuáa càa Yá Ndiöxí, chi ñu-ni Yá Ndiöxí cãháⁿ ndihí-í, te ñu tnúhu-gá cãháⁿ-í vitna.

24 "Te ðiu Yá Ndiöxí ní cadúha-gá ñuyíú-a ndihi nchaa sá ìó, núu ðiu-gá cúú Xítohó ñuyíú-a ndihi andiu. Te ñá túú xìni ñuhu-gá vehe ðàcaa ñáyiú ñuyíú-a cundecu-gá.

25 Te ñá túú xìni ñuhu-gá ñáyiú chindee ñàhá-yu xii-gá, chi mee-gă quidé-gă nchító-ó ndècu-o te tàxi-gá yócó tăchí-ó ndihi nchaa sá xíní ñùhu-o.

26 "Te ndéé sanaha ñí cadúha-gá ìⁿdi-ni téé, te ðiu-ni níñí-dě cúú ñáyiú ndècu nìcaxico ñuyíú. Te ðiu-ni mee Yá Ndiöxí ní xáhaⁿ-gă nchaa núú cùndécú-yu, te mee-gă ní cáháⁿ-gá ná daha cuía cudíi nchaa nàcióⁿ ndihi mèé-yu.

27 Te cuìní-gá sá ncháá ñáyiú nanducu ñàhá-yu cáháⁿ ndihi ñàhá-yu xii-gá, te mee-gă ndécú tũha-gá sá càháⁿ ndihi ñaha-gă xií-yu ìⁿ ìⁿ-yu.

28 Te ðiu-ni Yá Ndiöxí xító ñàha-gá xií-yu núú cùdíi-yu ndécú-yu te càndá-yu. Te ðuha ní cáháⁿ ìⁿ ñaní tnáhá-ndó, téé ní cutnùnì iní-xi ní xíndecu ndéé sanaha, te ní xáhaⁿ-dě xií-yu: "Nchaa-o cùu-o déhe Yá Ndiöxí", ðuha ní xáhaⁿ-dě xií-yu.

29 Te núu déhe Yá Ndiöxí cúú-yu ncháá-yu, te vá cúú càháⁿ-yu sá Yá Ndiöxí cúú să ñí cadúha-yu ndahá-yu. Te sá ñí cadúha-yu cùu ndióxí-yu-áⁿ, ðava cùu-xi díhúⁿ cuàáⁿ, ðava cùu-xi díhúⁿ cuixíⁿ, ðava cùu-xi yúú. Te mèé-yu ní cahu iní-yu nàcuáa cunduu sá cúú ndiöxí-yu.

30 Te cùtnàhá ñá túú ní cùtnunì iní-yu sá nèhé ní quidé-yu ní cadúha-yu nchaa xiáⁿ, te ñá túú ní quide cuendá Yá Ndiöxí sá dúcáⁿ ñí quidé-yu. Te vitna càchí Yá Ndiöxí sá dáñá nchàa ndi túhú-yu nchaa sá cuèhé sá dúhá quidé-yu.

31 Te Yá Ndiöxí náhá-gă ná nduu cùndecu nchaa

ñáyiú núú-gǎ, te mee-gǎ sa nàha-gá ndëndida càa ñáyiú ní quide váha, te ndëndida càa ñáyiú ñá túú ní quide váha. Te mee-gǎ ní xáhaⁿ-gǎ xii Déhe-gá Yaá nání Jèsús cúñaha-gǎ xií-yu núu ndëndida càá-yu ní quide váha te ndëndida càá-yu ñá túú ní quide váha. Te mee Jèsús cáháⁿ ndáá cuiti-gá, te sa nàha-o sá ncháá xǎⁿ cada Jèsús, chi ñu cuendá-áⁿ ñí dándótó ñàha Yá Ndiöxí xii-gá —cachí té Pǎblú xǎhaⁿ-dē xií-yu.

³² Te òré ní cáháⁿ té Pǎblú sá ñí ndoto Jèsús, te dava ñáyiú ñá ní tnàhá iní-xi tnúhu ní cáháⁿ-dé ní cáháⁿ yíchí-yu. Te davá-yu ní xáhǎⁿ-yu xii-dé:

—Te ingá xito quixi-n, te cáháⁿ tucu-n tnúhu ní cáháⁿ-n vitna —cachí-yu xáhǎⁿ-yu xii-dé.

³³ Te ní xica-dé cuáháⁿ-dé.

³⁴ Te dava ñáyiú ní xíndedóho tnúhu ní cáháⁿ té Pǎblú ní sándáá iní-yu Jèsús, te ní chindee tnúhu ñàhá-yu xii-dé. Te ñⁿ té cùchiuⁿ Areópagú nání-dē Nǐxú ndihi ñⁿ ñadihí nání-áⁿ Dǎmarís, tnàhá-yu ní sándáá iní-yu tnúhu-gá ndihi dava-gá-yu.

18

Té Pǎblú ndécú-dē ñuú Còrintú

¹ Te té Pǎblú ní quee-dé ñuú Àtenás cuáháⁿ-dé ñuú Còrintú.

² Te yacáⁿ ní naníhí tnàhá-dē ndihi ñⁿ té isràél nání-dē Àquilú, te té-áⁿ cúú-dē té distritú Pòntó, te ní xíndecu-dé ndihi ñadihí-dé tá Priscilá ñuú Rómá. Te té Cèsár té yíndaha cuéhé nacióⁿ, té nàni Claudiú ní xáhaⁿ-dē sá vǎ cúú-gǎ cundecu ñáyiú isràél ñuú Rómá, te xǎⁿ ñuú ní ndee té Àquilú ndihi ñadihí-dé cuáháⁿ-yu ñuú Còrintú. Te sácú-ni nduu

ní cuu sá nĩ quexiò-yu ñuú-án, te ní sáhán té Páblú ní ndatnúhu ndihí ñaha-dě xií-yu vehé-yu.

³ Te ní xáhă-yu sá cundècu-dé cada chiuⁿ ndihí ñahá-yu, chi ĩⁿ-ni chiuⁿ quide-dé ndihí-yu, te ní xóo dacàá-yu vehe dóó. Te núu xiăⁿ ní xíndecu ndihí ñaha tẽ Páblú ní quide chiuⁿ ndihí ñaha-dé xií-yu.

⁴ Te núú ùná núú ùná nduu, nduu ndètatú-yu, ní xóo quíhíⁿ-dé veñúhu ñáyiú isràél. Te ní ndatnúhu-dé ndihí ñáyiú isràél ndihí ñáyiú ñá túú cùu ñáyiú isràél, te ní xáhaⁿ-dě sá quèndáá iní-yu tnúhu Jèsús.

⁵ Te té Silás ndihí té Timùteú ní quee-güedé distritú Macèdoniá cuáháⁿ-güedé núú ndécú tẽ Páblú. Te òré ní quexiò-güedé, te ní cáháⁿ-ni té Páblú tnúhu Yá Ndiöxí núú ñáyiú isràél, te xáhaⁿ-dě xií-yu sá Jèsús cúú-gă Crístú Yaá ní tendaha Yă Ndiöxí ní quixi ñuyíú-a.

⁶ Te sá dúcáⁿ nĩ cáháⁿ-dé nõu ní nàá ndihí ñahá-yu xii-dé, te ní cáháⁿ cuèhé-yu cuèndá-dé, núu xiăⁿ ní naquidi-dé dóó-dě. Te ducaⁿ nĩ quide-dé cuèndá sá cútnùní iní-yu sá ñă ní tnàhá iní-dé nàcuáa ní cáháⁿ-yu, te ní xáhaⁿ-dě xií-yu:

—Yúhú ñá túú cuèchi-í, te núu ní xíta nihnu-ndo, xiăⁿ quèndóo cuèchi mee-nă-ndó. Te vitna quíhíⁿ-í cáháⁿ ndihí-í ñáyiú ñá túú cùu ñáyiú isràél, te vá nándücu-gá-í nchòhó ñáyiú isràél cáháⁿ ndihí ñaha-ĩ xii-ndo —càchí-dé xáhaⁿ-dě xií-yu.

⁷ Te ní xica-dé cuáháⁿ-dé vehe ĩⁿ tée nani Justú, te tée-áⁿ ndécú yàtni-dé núú cáá veñúhu, te tnàhá-dé càháⁿ ndihí-dé Yă Ndiöxí.

⁸ Te té Crispú tée yíndaha veñúhu-án nĩ sándáá iní-dé Jèsús ndihí ñadìhí-dé ndihí landú-dé. Te

vài ñáyiu ñúú Còrintú ní sáháⁿ-yu ní xíndedóho-yu tnúhu-gá, te ní sándáá iní ñáhă-yu xii-gá, te ní sanduté-yu.

9 Te ìⁿ niú ní cáháⁿ saní té Păblú sá ñí xáhaⁿ Yă Ndiôxí xii-dé:

—Cáháⁿ-ni-n tnúhu-í, te vá yùhú-n nchàa tnúhu cuèhé tnúhu duha càháⁿ ñáyiu,

10 chi yúhú chindee ñàha-í xii-n, te vá yôo ìⁿ cada úhú ñáhá xii-n, te vai-gá ñáyiu ñúú-áⁿ quíndáá iní-yu tnúhu-í —càchí-gá xáhaⁿ-gă núú sàní-dé.

11 Te ñúú Còrintú ní xíndecu té Păblú ìⁿ cuíá dava, te mee-ni tnúhu Yă Ndiôxí ní xóo dacuàha-dé ñáyiu.

12 Te ndècu-gá-dé ñúú-áⁿ ñí ngóo té Gàlìón chiúⁿ taxi tnuní-dé distritú Acăyá. Te dàvá-áⁿ ñí cudééⁿ ñáyiu isràél núú tĕ Păblú, te ní tni ñàhá-yu xii-dé ndécá ñàhá-yu cuáháⁿ núú cuè tée cùchiuⁿ.

13 Te ní xáháⁿ-yu xii té Gàlìón tée cùu gobiernú:

—Tée-a ní quexìo-dé ñúú-ó xica cuu-dé te cuìní-dé dandàhú ñáhá-dĕ chitnahá-ndí-dé cada-ndí nàcuáa quide-dé quidé càhnu-dé Ndiôxí-dĕ, te dañá-ndí vá cádá-gă-ndí nàcuáa càháⁿ tnúhu sá sánú ìchi ñàha xii-o nacuáa cundecu-o cuìní-dé —càchí-yu xáháⁿ-yu xii tée cùu gobiernú.

14 Te té Păblú cuìní-dé caní-dé cuèndú ní cùu, te ní ngúíta té Gàlìón càháⁿ-dé, te xáhaⁿ-dĕ xii-yu:

—Nchòhó ñáyiu isràél, cundedóho-ndo tnúhu na càháⁿ-í-a. Te núu ndècu núú ìⁿ cuéchi ní quide-dé àdi ní sahní-dé ìⁿ ndíyĭ, te cuu cundáá-xi iha, te cáháⁿ-ndó nŭu nándĭ cùu sá ñí quide-dé,

15 àdi dico-ni sá ìⁿ tnúhu ní cáháⁿ-dé, te yáchí-gá chí cuáháⁿ yàcáⁿ ndatnúhu-ndo nŭú méé-ndó, chi mee-ni să ñà túú quide-dé nàcuáa càháⁿ tnúhu

sá sánú ìchi ñaha xii-ndo caháⁿ-ndó, te yúhú ñá túú tnàhá iní-í cada ndáá-í nchaa xíăⁿ —càchí-dé xăhaⁿ-dě.

¹⁶ Te ní cudéeⁿ-dě, te ní ndeñuhu ñaha-dě xií-yu vechi^u.

¹⁷ Te ñáyi^u ñá túú cùu ñáyi^u isràél ní tnií-yu té Söstenés té yìndaha veñúhu ñáyi^u isràél, te ndèhe té Gàlìón té cùu gobiernú ní canhá-yu xii-dé, dico ñá túú tnàhí ná tnúhu ní cǎháⁿ-dé taunihnu-dé té ní caní-yu-áⁿ.

Té Pǎblú cuáháⁿ tucu-dé ñuú Antiòquia, te yàcáⁿ ní xica tucu-dé cuáháⁿ-dé dava-gá ñuú càháⁿ-dé tnúhu Yá Ndiöxí

¹⁸ Te titní-gá nduu ní xíndecu té Pǎblú ñuú Còrintú, te ní quide ndee ìní-dé nchaa ñáyi^u ní sándáá iní-xi tnúhu Jèsús, te ní tnií-dé ìchi cuáháⁿ-dé distritú Síríá ndihí té Àquilú ndihí ñadìhí té Àquilú-áⁿ tă Prìscilá, te ní quexió-yu ñuú Cèncreá. Te cùmání-gǎ tnií-yu ìchi quíhíⁿ-yu ñuú Éfesú, te ní dèté díquí tǎ Pǎblú, chi ducaⁿ ñí xáhaⁿ-dě xii Yá Ndiöxí sá ndée xínu ìⁿ chiuⁿ ní sani iní-dé cada-dé cuendá-gá, te dǎtnùní dèté-dé. Te ní quée-yu bàrcú cuáháⁿ-yu.

¹⁹ Te ní quexió-yu ñuú Éfesú, te yàcáⁿ ní xáhaⁿ tǎ Pǎblú sá cùndècu té Àquilú ndihí ñadìhí-dé, te mee-dě quíhíⁿ-dé dava-gá ñuú. Te cùmání-gǎ caca-dé quíhíⁿ-dé, te ní sáháⁿ-dé veñúhu ñáyi^u isràél ní ndatnúhu ndihí ñaha-dě xií-yu.

²⁰ Te ní xáhăⁿ-yu sá cùndècu-dé titní nduu, te ñá ní cuìní-dé cundecu-dé.

²¹ Te ní xáhaⁿ-dě:

—Núhú-í chi dacuítíi xini ñuhu-xi cundecu-í vico coo ñuú Jerusàlén, te quixi tucu-í te núu Ndiõxí ná càchí-gá, te vitna chí cáda ndèe iní —càchí-dé xãhaⁿ-dẽ xií-yu.

Te ní quée-dé bàrcú cuáháⁿ-dé.

²² Te ní quexìo-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusàlén, te ní ndexìo-dé, te ní dándácõo váha-dé ñáyiu ndècu ichi Yá Ndiõxí, te dãtnùní ní xica-dé cuáháⁿ-dé ñuú Antiòquia.

²³ Te yàcáⁿ ní xíndecu-dé tĩtní nduu, te dãtnùní ní tñi-dé ichi cuáháⁿ-dé. Te ní sáháⁿ-dé nihi distritú Gàlaciá ndihi distritú Frigiá. Te ndi tnahá ñuú ní sáháⁿ-dé ní cáháⁿ-dé ndihi ñáyiu sãndáá iní tnúhu Yá Ndiõxí, te ní ndúcú ndéé-gã-yu ní quidé-yu nchaa nàcuáa ní xãhaⁿ-dẽ cadá-yu.

Té Àpolós càháⁿ-dé tnúhu Yá Ndiõxí ñuú Éfesú

²⁴ Te dàvá-áⁿ nĩ quèxio iⁿ tée isràél ñuú Éfesú, te nàni-dé Àpolós, te cùu-dé tée ñuú Alejãndriá, te ío váha túha-dé tnúhu Yá Ndiõxí, te ío váha ñuhu díquí-dẽ nàcuáa cáháⁿ-dé,

²⁵ chi sa xini-dé nàcuáa ní xóo cáháⁿ ndíi Juáa cútnàhá ní xóo dacuàndute ndíi ñáyiu. Te ío ní cudíi iní-dé ní cáháⁿ-dé nchaa nàcuáa ní cuu cuendá Jèsús, dico vátá dácuaⁿha-gá-dé nchaa tnúhu ní cáháⁿ méé Jèsús.

²⁶ Te ní sáháⁿ-dé veñúhu ñáyiu isràél, te yàcáⁿ ní cáháⁿ-dé ni yùhu ni iní-dé. Te ndècu té Àquilú ndihi ñadìhí-dé tá Priscilá ndèdóho-yu tnúhu ní cáháⁿ-dé, te ní xáhãⁿ-yu sá quihíⁿ-dé vehé-yu, te

ní sáháⁿ-dé, te ní xítñũhu ñàhá-yu xii-dé dava-gá tñúhu Yá Ndiõxí sá ñà túú xìní-dé.

²⁷ Te ní cachí té Àpolós sá quíhíⁿ-dé distritú Acăyá, núu xíãⁿ ní cadúha ñáyiu ñuú Éfesú ìⁿ tutú canehe-dé quíhíⁿ ndaha ñáyiu sàndáá iní tñúhu-gá xĩndecu Acăyá. Te xăhăⁿ-yu núú tütú-yu: “Cáháⁿ váha-ndo ndìhi té Àpolós núu ní quexìo-dé”, càchí-yu xăhăⁿ-yu núú tütú-yu. Te ní xica-dé cuáháⁿ-dé, te ní quexìo-dé Acăyá. Te nchaa ñáyiu sàndáá iní tñúhu-gá yàcáⁿ, ðiu-ni mee Yă Ndiõxí ní chindee ñàha-gá ní sàndáá iní ñáhă-yu xii-gá. Te té Àpolós ío váha ní cáháⁿ-dé tñúhu Yá Ndiõxí núu-yu, te xíãⁿ ío ní ndúcú ndéé-gă-yu ní quidé-yu chiũⁿ-gá.

²⁸ Te té Àpolós ní ndatnúhu-dé ndìhi ñáyiu isràél, te ní xíndedóho dava-gá-yu. Te ío váha ní cani-dé cuendú nchaa nàcuáa ní xóo cáháⁿ cue téé ndéé sanaha sã quixí Crístú ñuyíú-a. Te ní cáháⁿ ndáá-dé ní xáhaⁿ-dë sá ðíú-ní Jèsús cúú-gă Crístú Yaá ní tendaha Yă Ndiõxí ní quixi ñuyíú-a. Te ñáyiu isràél xĩndatnúhu-yu sá ñă ndàá nàcuáa càháⁿ-dé, dico ñă ní ñĩhí-yu tñúhu cúñàhá-yu xii-dé, chi ío váha ñũhu díquí-dë tñúhu cáháⁿ-dé.

19

Té Păblú ndécú-dë ñuú Éfesú

¹ Te cútnàhá ndécú-gă té Àpolós ñuú Còrintú, te ní xica té Păblú cuáháⁿ-dé tá yăha-dé mee-ni xití yucu cuáháⁿ, te ní sáá-dé ndéé ñuú Éfesú. Te ñuú-áⁿ ñĩ ñaníhí tnáhá-dë ndìhi cue téé sàndáá iní tñúhu Jèsús.

² Te ní xícaⁿ tñúhú-dë núú-güedë, te xăhaⁿ-dë:

—¿Sa ní quexìo Espíritú Yă Ndiöxí ní ngúndecu ndìhi-ndo ndéé òré ní sándáá iní-ndó Jèsús-ă? —
càchí-dé xăhaⁿ-dě xii-güedé.

Te ní xăhaⁿ-güedě:

—Ñá túú xìní-ndí sá iò Espíritú Yă Ndiöxí —
càchí-güedé xăhaⁿ-güedě xii-dé.

³ Te ní xăhaⁿ tùcu-dé:

—¿Nása ní cáháⁿ téé ní dăcuándute ñaha xii-ndo-i?
—càchí-dé xăhaⁿ-dě xii-güedé.

Te ní xăhaⁿ-güedě:

—Ní cáháⁿ-dé năcuáa ní xóo cáháⁿ ndí Juáa —
càchí-güedé xăhaⁿ-güedě xii-dé.

⁴ Te ní xăhaⁿ tĕ Păblú:

—Ndí Juáa ní dăcuándute ñaha ndí xii ñáyiu, chi
ní cuiní-yu sá dáñă-yu nchaa sá cuèhé sá dúhá
quidé-yu. Te ní xăhaⁿ ndí xií-yu: “Quindáá iní-ndó
tnŭhu Jèsús chi dacuití quixi-gá ĩⁿ nduu”, duha
ní xăhaⁿ ndí Juáa xií-yu —càchí té Păblú xăhaⁿ-dě
xii-güedé.

⁵ Te sá dúcáⁿ ñí cáháⁿ té Păblú xăhaⁿ-dě xii-güedé,
núu xíăⁿ ní sandute-güedé năcuáa ní dándöo tnúhu
Jèsús.

⁶ Te ní sacáⁿ ndodo té Păblú ndahá-dé
díquí-güedě, te òré-ni ní quexìo Espíritú Yă Ndiöxí
ní ngúndecu ndìhi-güedé, te ní ngüita-güedé ní
cáháⁿ-güedé tnúhu sá dăcàhu iní ñáhá Espíritú-gá,
tnúhu sá ñà túú xìní-güedé cáháⁿ-güedé, te ní
cáháⁿ-güedé tnúhu Yă Ndiöxí năcuáa ní dăcáhú ìní
ñáhá Espíritú-gá xii-güedé.

⁷ Te cùu datná úxúú tnàhá-güedé.

⁸ Te té Păblú ní sáháⁿ-dé veñúhu ñáyiu isràél
ní cáháⁿ ndìhi-dé-yu, te úní yóó ñí xínu ní xica

cuu-dé veñúhu-yu. Te ío váha ñùhu díquí-dě tnúhu cáháⁿ-dé, núu xiǎⁿ ní cuyi-dě ní cáháⁿ-dé, te ní xáhaⁿ-dě sá quindáá iní-yu tnúhu Jèsús, te ducaⁿ te ndíhu ndaha ñàha Yá Ndiǒxí xií-yu.

⁹ Te davá-yu ío sàá iní-yu ñá ní cuiní-yu quindáá iní-yu, te ío ní cáháⁿ cuèhé-yu cuendá Jèsús xití veñúhu núu dàva-gá-yu. Te té Pǎblú ní ndee-dé veñúhu cuáháⁿ-dé ndihi ñáyiú sàndáá iní tnúhu Jèsús. Te iⁿ nduu iⁿ nduu ní sáháⁿ-dé scuèlá té Tiranú ní dácuáhá ñàha-dé xií-yu.

¹⁰ Te úú cuía ducaⁿ ñí sáháⁿ-dé scuèlá ní dácuáhá-dě ñáyiú. Te nchaa ñáyiú isràél ñáyiú ndècu nihíi distritú Àsiá ndihi nchaa ñáyiú ñá túú cùu ñáyiú isràél ní xíndedóho-yu tnúhu Jèsús.

¹¹ Te té Pǎblú ío ní chindee ñàha Yá Ndiǒxí xii-dé ní quide-dé vài núú sǎ vǎ yǒo tnàhí ndàcu cada.

¹² Te pañú díquí-dě ndihi dóó cándèé núu yíquí-dě ní xicáⁿ-yu nèhé-yu ní sáháⁿ núu ndécú ñáyiú cùhú, te xiǎⁿ ní tni ñáyiú cùhú ndihi ñáyiú yìhi ñaha espíritú cúndìhi yucu ñávàha, te ní ndúha-yu.

¹³ Te ñuú Isràél véxi cue tée tatna xica cuu-güedé quidé tātna-güedé ñáyiú yìhi ñaha espíritú cúndìhi yucu ñávàha. Te ní ngüíta-güedé ní cacu nèhe-güedé Jèsús cuendá quee espíritú-án yiqui cùñú-yu, te ní xáhaⁿ-güedě:

—Xocuiñí-n, chi càchí Jèsús sá vǎ cúndècu ndihi-gá-n tēe-a. Te diu-ni Jèsús cacú nèhe té Pǎblú òré càháⁿ-dé tnúhu-gá —càchí-güedé xàhaⁿ-güedé xii espíritú-án.

¹⁴ Te úsá tnàhá-güedé ducaⁿ ñí xóo cada-güedé. Te tātá-güedé ní xínani-dě Èsevá, te tée-án ñí cuu-dé

dútú cúnùu.

15 Te sá dúcáⁿ nǐ cáháⁿ-güedé, te ní xáhaⁿ espíritú cúndìhi yucu ñávãha-áⁿ xii-güedé:

—¿Te ná cúú nchòhó nǔu dayùhú ñáhá-ndó? Te xìní-í Jèsús, te xìní-í yoo cùu té Pãblú, te nchòhó ñá túú xìní ñáhà-í xii-ndo —càchí espíritú-áⁿ xãhaⁿ-xi xii-güedé.

16 Te tée yìhi ñaha espíritú cúndìhi yucu ñávãha-áⁿ nǐ ndanchita-dé ní tñi-dé cue tée quide tátna-áⁿ, te ní ndìhi dóó-güedé ní ndátá-dě, te ní dánìcuèhé ñáhá-dě xii-güedé, te ní xinu-güedé cuáháⁿ-güedé.

17 Te nchaa ñáyiu isràel ndécú ñùú Éfesú ndìhi dava-gá ñáyiu ndècu ñu-ni ñuú-áⁿ nǐ níhì-yu tnúhu nàcuáa ní cuu, te ío ní yùhú-yu, te vãi-yu ní cachí sá ïo càhnu cuu Xítohó Jesucrìstú.

18 Te dava ñáyiu ní sándáa iní-xi tnúhu Jèsús ní sáháⁿ-yu núú ndécú tẽ Pãblú, ndìhi núú ndécú nchàa ñáyiu ní sándáa iní tnúhu-gá ní náhmá-yu nàcuáa ní xóo cada-yu.

19 Te titní ñáyiu nǐ xóo cada ndùu nehé-yu tutú-yu ní sáháⁿ núú ndécú nchàa ñáyiu sándáa iní-xi tnúhu-gá, te yàcáⁿ ní ndada cuendá-yu sá ïo yahu ní sáha-yu tutú-yu, chi ndéé údico úxí mǐl díhúⁿ cuixíⁿ ní sáha-yu núú ncháa. Te ncháa-yu ní sahmí-yu tutú-yu.

20 Te sátá nǐ cáyú nchaa tutú-áⁿ, te vãi-gá ñáyiu ní tuhá-yu ichi Yá Ndiõxí, te ní sáha-yu cuendá sá ïo xìnì ñuhu tnúhu Yá Ndiõxí.

21 Te ní cachí té Pãblú sá quíhíⁿ-dé distritú Macèdoniá ndìhi distritú Acãyá, te dàtnùnì nùhú-dé ñuú Jerusàlén, te ducaⁿ te dàtnùnì quíhíⁿ-dé ñuú Rómá.

22 Te ndècu ndihì-dé té Timùteú ndihì té Èrastú cue té chindee ñaha xii-dé. Te té Păblú ní xáhaⁿ-dë xii-güedé sá códó nùu-güedé quíhíⁿ Macèdoniá, te ní xica-güedé cuáháⁿ-güedé, te mee-dë ní quendóo-dé.

Ñáyiu Éfesú ío dusaⁿ quidé-yu ñúu-yu

23 Te dàvá-ánⁿ ío ní cudééⁿ-yu núú nchàa ñáyiu ní tuha ichi Yá Ndiöxí.

24 Te ìⁿ téé ñúú Éfesú nání-dë Demètriú. Te téé-ánⁿ ñí xóo canehe chùuⁿ-dé mee-ni dǐhúⁿ cuìxíⁿ ní xóo cadúha-dé veñúhu lǐhli, dàtná cuíní-ndó càa veñúhu Diáná sá cúú ndiöxí-yu. Te vài dǐhúⁿ ñí xóo níhí-dë ndihì cue téé ní xóo cada chùuⁿ ndihì-dé.

25 Te ní cana-dé cue téé quide chiuⁿ ndihì-dé, ndihì nchaa cue téé quide chiuⁿ ndihì dǐhúⁿ cuìxíⁿ, te ní xáhaⁿ-dë xii-güedé:

—Nàha-ndo sá ío váha ñihí-ó dǐhúⁿ cuèndá chùuⁿ quide-o.

26 Te nàha-ndo sá càchí té Păblú sá ñà díú ndiöxí cúú sǎ ñí cadúha ñáyiu ñuyíú-a. Te ducaⁿ càháⁿ-dé ñúú-ó, te ducaⁿ-ni càháⁿ-dé ñihí distritú Àsiá, te ío-gá vài ñáyiu sàndáá iní tnúhu càháⁿ-dé.

27 Te ío úhú nùu na cuíta chùuⁿ quide-o, vá yõo-gá cuaaⁿ sá cádúha-o. Te ngüíta-yu cáháⁿ-yu sá veñúhu Diáná ñá túú càváha, te vá cádá càhnu-gá-yu sàndú-ó. Te nàha-ndo sá ío càhnu cuu Dianá, chi nchaa ñáyiu distritú Àsiá quidé càhnu ñahá-yu ndihì ñáyiu xǐndecu ñí càa xico ñuyíú — càchí té Demètriú xǎhaⁿ-dë xii-güedé.

28 Te sá dúcáⁿ ñí cáháⁿ té Demètriú, xǎⁿ ní cudééⁿ-güedé núú tǎ Păblú, te uuⁿni ní cuáá-güedé te càchí-güedé:

—¡Ío càhnu cuu Dianá sàndú ñáyiú Éfesú! —
càchí-güedé.

29 Te nchaa ñáyiú ñuú Éfesú ndì coyo ndi coyó-yu xícáháⁿ-yu. Te tnàhá úú cue téé distritú Macèdoniá xicá cùu-güedé ndihì té Pàblú, ìⁿ-dé nání-dě Găyú, te ìⁿ-dé nání-dě Aristarcú. Te ní tnì-güedé úú cue téé-áⁿ, te cuánguihu coyo ndihì ñaha-güedě vehe núú quidé-güedě jùndá.

30 Te té Pàblú cuìní-dé quíhu-dé tnàhá-dé vehe-áⁿ cãháⁿ ndihì ñaha-dě ní cùu, te ñá ní dàña cue téé ní sándáá iní tnùhu-gá.

31 Te ìⁿ úú cue téé cùnuu distritú Àsiá ní cãháⁿ váha-güedé cuèndá té Pàblú, te ní xáhaⁿ-güedě xii ìⁿ téé xinu cuechi núú-güedě ní sáháⁿ-dé ní xáhaⁿ-dě xii té Pàblú sá vã quíhu-dé vehe núú quidé-güedě jùndá.

32 Te uuⁿni ní cuáá-yu nchaá-yu, te ñá ìⁿ-ní tnùhu ni cãháⁿ-yu, chi ndi dîⁿ tnùhu ní cãháⁿ-yu ìⁿ ìⁿ-yu. Te chitu-gă ñáyiú ñá ní cùtnuní iní-yu ná cuèndá ní dátàcá ñáhá-güedě xití vehe-áⁿ, chi ñá ìⁿ-ní tnùhu ni cãháⁿ-yu.

33 Te davá-yu ní cãháⁿ-yu sá cuèchi té Lijandrú cúú-xí, chi ní xáhaⁿ ñáyiú isràél xii-dé sá cãháⁿ-dé yuhú-yu chindee tnùhu ñaha-dě xií-yu. Te ní quide-dé ndaha-dé núŭ-yu sá cùndèdóho-yu tnùhu cãháⁿ-dé chindee tnùhu ñaha-dě xií-yu yòtnúhu.

34 Te ní cutnùní iní-yu sá tée isràél cúú-dě, te uuⁿni ní cuáá tucú-yu, ñá ní dàñá-yu cãháⁿ-dé, te càchí-yu:

—¡Ío cùnuu Dianá sàndú ñuú Éfesú! —càchí-yu. Te dàtná úú òré ìⁿ-ni tnùhu ní cãháⁿ-yu.

35 Te téé cùu secretariú-ni-gá ní cáháⁿ-dé, te dǎtnùní cuèé cuèé ní sadí-yu yuhú-yu. Te ní xáhaⁿ-dě xií-yu:

—Nchaa-ndo cùndedóho-ndo ìⁿ tnúhu na càháⁿ-í-a. Ío cùnuu Dianá, te nchaandi túhú ñáyíu sa nàhá-yu sá ncháá-ó ío nèhe cuendá-ó vèñúhu-ǎⁿ. Te nàhá-yu sá néhé cuendá-ó sàndú-áⁿ, chi véxi cuuⁿ-gá andíu.

36 Te vá yǎo ìⁿ càchí sá ñǎ ndàá. Te coto-ndo mèe-ndo, te vá cuidó-ndó càda-ndo, te vá cuidó-ndó cǎháⁿ-ndó.

37 Te ná cuendá ndécá-ndó cuè téé-áⁿ vèxi, te ñá túú nǎ ní quide-güedé, te ñá túú nǎ ní dùhu-güedé veñúhu, te ñá túú càháⁿ cuèhé-güedé cuendá Diáná.

38 Te núu ío yoo nàá ndihí ñaha xì té Demetriú ndihí cue téé quide chiuⁿ ndihí-dé, te quíhíⁿ-güedé cacáⁿ cuéchi-güedé núú cuè téé cùchiuⁿ. Te cue téé cùchiuⁿ na cundoho-güedé nǎu quehndé-güedé cuéchi-yu àdi ñáhá.

39 Àdi ío-gá ná cuèndú ñúhú ìní-ndó, te cáháⁿ-ndó òré ná cóo jùndá.

40 Te ío úhú nǎu na ñihí téé tàxi tnuní ñáhá xì-o tnúhu sá dúhá ío quide dusaⁿ-o, te cachí-dé sá ndècuéchi-o chi ñá túú sàndáá ìní-ó-dě quesaha-dě. Te ñá túú tnàhí ndùu váha-xi sá dúhá càda-o ni cuu, te vitna duha ní quide-o, te ñá cùtnùní ìní-ó nǎsa cúñaha-o xì téé tàxi tnuní ñáhá xì-o núu na càna ñaha-dé —càchí téé cùu secretariú xáhaⁿ-dě xií-yu.

41 Te ní xáhaⁿ-dě sá nùhú-yu te ní ndihí-yu cuánuhú.

Té Păblú cuáháⁿ-dé distrítú Macèdoniá ndihí distrítú Grèciá

¹ Te òré ñá túú-gă ní quide dusáⁿ-yu, te ní cana ñaha tĕ Păblú xii nchaa ñáyiú sàndáá iní tnúhu Jèsús ní cáháⁿ-dé dóho-yu nàcuáa cadá-yu. Te ní quide ndee iní ñáhá-dĕ xií-yu, te ní tñi-dé ichi cuáháⁿ-dé distrítú Macèdoniá.

² Te tayăha-dé cuáháⁿ ñⁿ ñⁿ ñuú yíndèhu Macèdoniá. Te càháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudí iní-yu cadá-yu nàcuáa càháⁿ Yă Ndiöxí cadá-yu sá dúcáⁿ ñí cáháⁿ-dé dóho-yu. Té ní quexìo-dé distrítú Grèciá.

³ Te xíaⁿ ñí xíndecu-dé úní yóó. Te xíaⁿ quĕe-dé bàrcú quíhíⁿ-dé distrítú Siriá ní cùu, te ní níhí-dĕ tnúhu sá ndétú ñaha ñⁿ úú cue tée isràél cahni ñaha-güedĕ xii-dé ní cùu, núu xíaⁿ ní tñi-dé ichi cuáháⁿ-dé ní yáha-dé ichi distrítú Macèdoniá.

⁴ Te cuáháⁿ ndihí-dé té Sopàtér tée ñuú Bèrea, ndihí té Arìstarcú, ndihí ñⁿ tée nàni Segundú. Te ndi ndúú cue tée-áⁿ cúu-güedĕ cue tée ñuú Tesalónicá. Te tñàhá té Găyú tée ñuú Dèrbé, ndihí té Timùteú cuáháⁿ ndihí-dé, te tñàhá té Tìquicú ndihí té Tröfimú cuáháⁿ ndihí-dé, te úú cue tée-áⁿ cúu-güedĕ cue tée distrítú Àsiá. Te nchaa cue tée-áⁿ cuáháⁿ ndihí-güedĕ té Păblú.

⁵⁻⁶ Te ní quexìo-güedĕ ñuú Fìlipú, te yàcáⁿ ní naníhí ñáhá-güedĕ xii-ndí. Te té Păblú ní tendaha-dĕ cue tée ndihí-dé cuáháⁿ-güedĕ ñuú Tròás, te ní xáhaⁿ-dĕ sá díú-ní yàcáⁿ cundetu ñaha-güedĕ xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhí levadurá. Te sátá ñí

yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñuú-áⁿ. Te yàcáⁿ ní naníhí tnáhá-ndí ndìhi cue téé yòdo nuu cuáháⁿ ní xíndecu-ndí úsá nduu.

Té Păblú cuáháⁿ ngándìhi-dé ñáyiu ñuú Tròás

⁷ Te ìⁿ nduu ndumìngú ní naníhí tnáhá-ndí ndìhi nchaa ñáyiu ní sándáá iní-xi tnúhu Jèsús ní xexi-ndí pàá ndìhí-yu. Te ducaⁿ ñi quide-ndí, chi ní cachí Jèsús sá dúcáⁿ càda-o cuendá sá vǎ nácuànaa-o sá ñi xíhí-gá cuendá naníhí tǎhú-ó. Te té Păblú ní ngúita-dé càháⁿ-dé tnúhu-gá, te càháⁿ-dé ní cuu dava niú, chi cuendá ná tǔndaá ingá nduu-áⁿ, te caca-dé quíhíⁿ-dé ingá xichi.

⁸ Te ndècú-yu vehe yòdo tnaha, te yìhí-yu ndéé cuàrtú cúú ùní núú ñnu, te càyú víhí ñùhú xití cuàrtú-áⁿ.

⁹ Te ìⁿ téé sa ta cùu sacuéhé luha nàni-dé Eùticú núcòo-dé yèhe ventaná, cuìní-dé cúdú-dé, chi ní cunaha vèhi caháⁿ té Păblú, te ní tñi ñaha sàni xii-dé ní xídí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xíhí-dé, chi ío dùcúⁿ ní ngava-dé.

¹⁰ Te tnáhá té Păblú nchìcúⁿ-dé ní nuu. Te ní quexìo cunu-dé núú cǎtùu téé ní xíhí-áⁿ, te ní numi ñaha-ni-dé, te ní xáhaⁿ-dè xii-yu:

—Vá ndìhú iní-ndó, chi ní ndoto-dé —càchí-dé xǎhaⁿ-dè xii-yu.

¹¹ Te dǎtnùní cuándaa ndìhi ñaha tùcu-dé xii-yu cuàrtú núú yìhí-yu ni cùu, te yàcáⁿ ní xexi ndìhi ñaha-dè xii-yu, dǎtnùní ní ngúita-dé vǎi-gá tnúhu

ní cáháⁿ-dé, te càháⁿ-ni-dé ní túndaá, te dătnùní ní xica-dé cuáháⁿ-dé.

¹² Te téé ní ngava-áⁿ ní sánúndeca ñàhá-yu xii-dé ndéé vehe-dé, te ío ní cudíí ìní-yu sá ñí ndoto-dé.

Ní quee-güedé ñuú Tròás cuáháⁿ-güedé ñuú Miletú

¹³ Te té Păblú ní cachí-dé sá quèhíⁿ-ndí ndíhi bàrcú ndéé ñuú Àsón, te mee-dě caca saha-dě, te yàcáⁿ naníhí tnáhá-ndí ndíhi-dé te quée-dé bàrcú, te ní quée-ndí bàrcú cuáháⁿ-ndí.

¹⁴ Te ní naníhí tnáhá-ndí ndíhi-dé ñuú Àsón, te yàcáⁿ ní quée-dé bàrcú tnáhá-dé cuáháⁿ-ndí ñuú Mitilené.

¹⁵ Te ní quexìo-ndí ndéé ìngá nduu yatni ñuú Quiú, te ndéé nduu tněé ní quexìo-ndí ñuú Sămú te yàcáⁿ ní yáha-ndí, te ní quexìo-ndí ñuú Trògiliú. Te ndéé nduu ìdá ní quexìo-ndí ñuú Miletú.

¹⁶ Te té Păblú ñá ní cuìní-dé yáha-ndí ñuú Éfesú, chi ñá túú ní tnàhá ìní-dé cuyaa-dě ichi, chi ío ndíhi ìní-dé cuèndá cuìní-dé quini-dé ñuú vá ndácú-dě ndexìo-dé ñuú Jerusalén cundecu-dé vico Pentecòstés.

Té Păblú càháⁿ ndíhi-dé cue téé yìndaha ñaha xii ñáyiu sàndáá ìní tnúhu Jèsús ñuú Éfesú

¹⁷ Te òré ndécú tē Păblú ñuú Miletú, te ní cana-dé cue téé yìndaha ñaha xii ñáyiu sàndáá ìní tnúhu Jèsús ñuú Éfesú sá quèhíⁿ-güedé núú ndécú-dě.

¹⁸ Te sátá ñí quexìo-güedé, te ní xáhaⁿ-dě xii-güedé:

—Nàha-ndo nacuaá ní quide-í ndéé cútnàhá ní quexìo-í distrìtú Àsiá.

19 Chi ní quide-í nàcuáa ní cáháⁿ Yă Ndiöxí cada-í, ñá túú ní túhío-í, te ñá túú ní quide cahnu-í méè-í, te ío ní ndáhyú-í sá quidé dává-yu, chi ío sàá iní-yu. Te sa nàha-ndo sá títí xito ní cuini ñáyiú isràél cahni ñàhá-yu xii-í ní cùu, te ío ní ndoho-í ní cácu-í.

20 Te sa nàha-ndo sá ncháándi túhú sa ní cachí tnúhu-í nàcuáa cada-ndo cuèndá sá chindèe ñaha Yă Ndiöxí xii-ndo. Te ní cáháⁿ-í tnúhu-gá núú-ndó nchàa-ndo, te ñu-ni ducaⁿ ñi quixi-í ndi tnahá vehe-ndo ñi cáháⁿ-í tnúhu-gá núú-ndó.

21 Te ní xáhaⁿ-í xii ñáyiú isràél ndihí ñáyiú ñá túú cùu ñáyiú isràél sá dáñă-yu nchaa sá cuèhé sá dúhá quidé-yu te quindáá iní-yu tnúhu Xítóhó Jesucristú.

22 Te dacuítí quíhíⁿ-í ñuú Jerusálén, chi Espíritú Yă Ndiöxí ní cachí-xi sá dáí quíhíⁿ-í, te ñá túú xini-í nándi cada ñaha-güedě xii-í yàcáⁿ te núu na quèxio-í.

23 Te ñiⁿ ñiⁿ ñuú núú sàháⁿ-í càchí tnúhu Espíritú-gá sá chíhí ñàha-güedé vecaá, te cada úhú ñàhá-güedě.

24 Dico ñá túú tnahí ná cuu cuèi na càhni ñaha-güedé xii-í, dico cuini-í sá ñi iní dandihí-í nchaa sá ñi cachí Xítóhó Jesucristú cada-í. Te ní cachí Yă Ndiöxí sá càháⁿ-í núú ñáyiú sá ío cùu iní ñàhá-gă xií-yu, te naníhí tàhú-yu núu na quindáá iní-yu tnúhu-gá.

25 Te sa ní cachí tnúhu-í xii-ndo nchàa-ndo sá ñuú na quindáá iní-ndó Yă Ndiöxí, te ndihu ndaha ñàha-gá xii-ndo. Te na càchí tnúhu-í sá ñi ñiⁿ nduu-gá vá quini ñàhá-ndó xi-í ñuyíú-a.

26-27 Te yúhú ñá túú cuèchi-í ñuú ío ñáyiú vá naníhí tàhú, chi sa ní cachí tnúhu-í nchaa sá ñi cáháⁿ méé Yă Ndiöxí cada-ndo.

28 Te coto-ndo mèe-ndo, te coto-ndo tnàhá ñáyiu sàndáá iní tnúhu-gá, chi Espíritú-gá ní cachí-xi sá cúnùu-ndo núũ-yu dacuàha-ndó-yu tnúhu-gá. Te cada-ndo cuendá sá dàtná mbèé-ndó cùu-yu, te mee-ndo cùu-ndo datná toli xìto-ndó-yu ducaⁿ càda-ndo cuendá, chi nàha-ndo sá Jèsús ní sati níñí-gă, te ní xíhí-gá cuendá naníhí tàhú-ó ndìhí-yu.

29 Te yúhú sa cùtnuní iní-í sá òré ñá túú-gă-í ndécú, te quixi ñáyiu dandàhú ñáhá xii-ndo cuendá dañ-ndo tnúhu Yá Ndiõxí, te cada ñàhá-yu xii-ndo dàtná quidé ñãñá òré tníí-dí mbèé.

30 Te ñiu-ni ñⁿ úú cue téé ndècu ndìhí-ndo, cue téé-áⁿ dacuàndehnde-güedé, te cudana davá-yu quindáá iní-yu chítnáhá ñáhă-yu xii-güedé.

31 Te xĩaⁿ nũu càchí tnúhu-í sá ïo quihí iní-ndó cùndecu-ndo ndìhí nchaa ñáyiu sàndáá iní tnúhu-gá. Te nàha-ndo sá yúhú ní xíndecu-í úní cuíá ñí cáháⁿ-í tnúhu Jèsús núú ñáyiu cuèi nduu cuèi niú. Te áma ní xóo ndáhyú-í, chi ñá ní cuìní-yu quindáá iní-yu nchaá-yu tnúhu ní cáháⁿ-í —càchí té Páblú xăhaⁿ-dë xii-güedé.

32 Te xăhaⁿ tùcu-dé:

—Nchòhó cue téé ndècu ndìhí-í ichi Xítóhó Jesu-crístú, ío cuìní-í sá méé Yă Ndiõxí chindee ñàha-gá xii-ndo. Te mee-gă ní cáháⁿ-gá sá ïo cùdíí ìní ñáhă-gă xii-ndo. Te naníhí tàhú-ndó ndìhí nchaa ñáyiu cùu cuendá-gá, te chindee ñàha-gá xii-ndo cuendá cada-ndo nchaa sá càháⁿ-gà.

33 Te òré ní xíndecu ndìhí ñaha-í xii-ndo, te ni dǐhúⁿ ni dǒó ñà túú ní cùdíí ìní-í.

34 Te mee-ndo sà naha-ndo sá yúhú ní guide chiuⁿ-í, te ní níhí-í nchaa sá ñí nandíhí-í ndìhí cue

tée xìca cuu ndìhi-í.

³⁵ Te sa ní xiní-ndó nàcuáa ní guide-í ní guide chiuⁿ-í, te diu-ni ducaⁿ càda chiuⁿ-ndo cuendá chindee-ndo nchàa ñáyiú ndàhú, chi sa nàha-ndo nacuáa ní cachí Xítóhó Jesucristú, te duha ní cachí-gá: “Cùdíí-gă iní-ó cuăha-o ñăyiú ndàhú sá xiní ñùhú-yu dàcúúxí sǎ táxí-yu xii mee-o”, duha ní cachí-gá —càchí té Păblú xăhaⁿ-dě xii-güedé.

³⁶ Te sátá dúcáⁿ ñí cáháⁿ-dé, te ní ngüíñí xítí-dě ndìhi dava-gá-güedé, te ní cáháⁿ ndìhi-dé Yă Ndiöxí.

³⁷ Te sátá ñí túhú tnúhu ní cáháⁿ-dé ndìhi Yá Ndiöxí, te ní ndáhyú víhí-güedě sá quíhíⁿ-dé, te ní numi ñaha-güedě, te ní teyuhu ñaha-güedě.

³⁸ Te ní ndíhú víhí ìní-güedé, chi ní xáhaⁿ tĕ Păblú sá ñí ñⁿ nduu-gá vá náníhí tnáhá-güedě cáháⁿ ndìhi tnàha-güedé. Te cuáháⁿ ndìhi ñaha-güedě xii-dé núú ndécú bàrcú.

21

Té Păblú cuáháⁿ-dé ñuú Jerusàlén

¹ Te ní guide ndee ìní-ndí nchaa cue tée cùnuu. Te ní quée-ndí bàrcú cuáháⁿ ndáá ichi-ndí ñuú Cös. Te nduu tnée ní sáháⁿ-ndí ñuú Ròdás, te ní yáha-ndí cuáháⁿ-ndí ñuú Pàtará.

² Te yàcáⁿ ní naníhí-ndí ñⁿ bàrcú ñùhú ìchi-xi quíhíⁿ-xi distritú Fèniciá, xǎⁿ ní quée-ndí cuáháⁿ-ndí.

³ Te ichi cuáháⁿ-ndí ní xiní-ndí distritú Chìpré cáá cuădava xítí làmár, te ní yáha-ndí, te ní quendóo ñuú-áⁿ xio dàtni-ndí. Te cuáháⁿ-ndí ñuú Tìrú ñⁿ

ñuú yíndèhu distritú Sìriá cuèndá yàcáⁿ tava-güedé nchaa sá nchídó bàrcú.

⁴ Te yàcáⁿ ní naníhí tnáhá-ndí ndihí ñáyiu ní sándáá iní tnúhu Jèsús, te ní xíndecu-ndí úsá nduu ndihí-yu. Te ní xáhãⁿ-yu sá vã quihíⁿ té Pãblú ñuú Jerusàlén, chi Espíritú Yã Ndiõxí ní xáhaⁿ-xi xíi-yu sá ndóhó vïhi-dé nõu na quihíⁿ-dé.

⁵ Te sátá ñí yáha nduu úsá, te ní quee-ndí cuáháⁿ-ndí yuhu làmár. Te ní quee nchaa ñáyiu ní sándáá iní tnúhu-gá, téé, ñadihí, nchaa landú, nchaá-yu ní sàndeca ñàhá-yu yuhu làmár, te òré ní quexìo-ndí, te ní ngüíñí xítí-ndí ní cáháⁿ ndihí-ndí Yã Ndiõxí.

⁶ Te ní quide ndee ìní tnáhá-ndí ndihí-yu, te dàtnùní ní quee-ndí bàrcú, te ní naquehéⁿ-yu ichi cuánuhú-yu vehé-yu.

⁷ Te ní xica bàrcú ñúhú-ndí ní quee-xi ñuú Tìrú cuáháⁿ-ndí ndihí-xi ñuú Tolèmaidá. Te xíaⁿ ñí sáá-xi te ní quene-ndí, te ní sáháⁿ-ndí ní cáháⁿ ndihí-ndí nchaa ñáyiu sàndáá iní-xi tnúhu Jèsús, te ní xíndecu-ndí ndihí-yu ìⁿ nduu.

⁸ Te nduu tnèé ní ndée tucu-ndí bàrcú cuáháⁿ-ndí ñuú Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lìpé cundecu-ndí ndihí-dé. Te téé-áⁿ ñí xóo cada chùⁿ ndihí-dé ìñú-gá cue téé ní chindee ñàha xii ñáyiu sàndáá iní tnúhu-gá ñuú Jerusàlén ní xóo cuáñaha-güedè sá ñí xóo caxí-yu. Te dàtnùní mee-nã tnúhu Yá Ndiõxí càháⁿ-dé xicá cùu-dé.

⁹ Te té Lìpé-áⁿ ndècu cùmí dèhe òhí-dé, te ni ìⁿ-yu vátá ndúcú ñàha-gá téé xií-yu, te nchaá-yu

càháⁿ-yu tnúhu Yá Ndiöxí tnúhu sá dácàhu iní ñáhá mèe-gá.

10 Te xíaⁿ ñí cuu titní nduu ndècu-ndí, te ní quexìo ñⁿ téé nàni Agabú ñúú-áⁿ, véxi-dé distritú Jùdeá, te téé-áⁿ tnàhá-dé càháⁿ-dé tnúhu Yá Ndiöxí.

11 Te ní níhí-dě tnúhu núú ndécú-ndí nùu ní quixi-dé ní cáháⁿ ndihí ñaha-dě xii-ndí. Te ní xícáⁿ-dé cínchú té Páblú, te ní ngóo-dé, te ní ngúíta-dé ní dácútú-dě sáhá-dě ndihí ndaha-dé, te ní cachí-dé xii-ndí:

—Espiritú Yá Ndiöxí ní cachí-xi sá tée dii cínchú-xi-a tñi ñaha cuè téé isràél ñúú Jerusalén, te duha dacutu ñaha-güedé xii-dé, te cuáha cuendá ñáhá-güedé xii-dé núú cuè téé ñúú Rómá. Duha ní cáháⁿ Espiritú-gá —càchí té Àgabú.

12 Te sá dúcáⁿ ñí cáháⁿ-dé, te ní xáhaⁿ-ndí nchaa-ndí sá vǎ quèhíⁿ té Páblú ñúú Jerusalén.

13 Te té Páblú ní cachí-dé:

—¿Ná cuendá ndéé dúcáⁿ ndàhyú-ndó dándihú iní ñáhá-ndó xì-í-i? Te ñá túú nǎ cuu cuèi na dàcutu ñaha-güedé, àdi cuèi na càhni ñaha-güedé xii-í cuendá sá càháⁿ ndihí-í Jèsús, chi sa ndècu túha-í sá cùú-í —càchí-dé.

14 Te ñá túú ní sàndáá iní-dé sá dúcáⁿ xǎhaⁿ-ndí, núu xíaⁿ ñá túú-gǎ ná ní xǎhaⁿ-ndí xii-dé sá vǎ quèhíⁿ-dé, te ní xítñaha-ndí:

—Mee-ni-gǎ Yá Ndiöxí ná cùnaha-gá nása sàni iní-gá cada-gá —xítñaha-na-ndí.

15 Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñúú Jerusalén.

16 Te cuáháⁿ ndihí-ndí ñⁿ úú cue téé Cèsareá, cue téé ní sàndáá iní tnúhu Jèsús. Te ndèca ñaha-güedé

xii-ndí cuáháⁿ vehe té Mnàson, te téé-áⁿ cúú-dě téé distritú Chìpré, te ndècu-dé ñuú Jerusàlén, te sa ní cuu vài nduu ní sándáá iní-dé tnúhu-gá, te vehe téé-áⁿ ñí xíndecu-ndí.

Té Păblú ndátnũhu-dé ndihí té Jàcobó

¹⁷ Te òré ní quexìo-ndí ñuú Jerusàlén, te nchaa ñáyiú ní sándáá iní tnúhu Jèsús ní quixí-yu ní dándácõ váha ñàhá-yu, chi ní cudíí víhí ìní-yu sá ñí quexìo-ndí.

¹⁸ Te nduu tnéé cuáháⁿ ndihí-ndí té Păblú cuendá cáháⁿ ndihí-ndí té Jàcobó, te òré ní quexìo-ndí núú ndécú-dě, te ndècu ndihí-dé nchaa cue téé yìndaha ñaha xii ñáyiú sándáá iní tnúhu Jèsús.

¹⁹ Te té Păblú ní dándácõ váha ñaha-dě xii-güedé, te ní xáhaⁿ-dě nàcuáa ní quide Yá Ndiõxí ní chindee ñàha-gá xii-dé ní cáháⁿ-dé tnúhu-gá núú ñáyiú ñá túú cùú ñáyiú isràél.

²⁰ Te sátá ñí yáha ní cáháⁿ-dé, te ní ndácáⁿ táhũ-yu núú Yá Ndiõxí cuendá nchaa sá ñí quide-gá. Te dătnùní ní xáhaⁿ-güedě xii té Păblú:

—Yòhó sa nàha-n sá ñí cuu tìtní mĩ ñáyiú isràél ní sándáá iní-yu tnúhu Jèsús, te càchí-yu sá ño xìni ñuhu-xi cadá-yu nchaa nàcuáa càháⁿ tnúhu sá ñí chídó tnùní ndíi Moisés.

²¹ Te ní níhĩ-yu tnúhu sá dăcuàha-n ñáyiú isràél ñáyiú ndècu ñuú xícá cuendá sá vă cadá-gă-yu nàcuáa ní cachí ndíi Moisés cadá-yu. Te xáhaⁿ-n xìi-yu sá vă cuàha-gá-yu sěñá ñí landú-yu, te vá cadá-gă-yu dătná ní xóo cada ñáyiú ndéé sanaha, duha dăcuaha-n ñáyiú ní níhĩ-yu tnúhu.

22 Te na nìhí-yu tnúhu sá ndécú-n ìha, te tnàvíí ngüíta-yu cáháⁿ cuèhé-yu cuendá-n.

23 Te na càchí tnúhu-ndí nàcuáa cada-n. Ndècu cúmí cue téé vátá cádá-gã-güedé nàcuáa ní cáháⁿ méé-güedé sá cádá-güedé cuendá nduu vétú iní Yă Ndiöxí.

24 Te quíhíⁿ-n ndìhi-güedé te cada-n nchàa nacuáa ní xóo cada ñáyiu ndéé sanaha cuendá nduu vétú iní Yă Ndiöxí. Te tava-n dîhúⁿ cuu núu-güedé cháhu-güedé veñúhu, te ducaⁿ te dătnùní ndacu dèté díquí-güedé. Nchaa xǎⁿ cada-n, te quiní ñáyiu sá ñă ndàá tnúhu cáháⁿ nchaa ñáyiu cáháⁿ cuèhé cuendá-n. Te na cùtnuní iní-yu sá tnàhá-n quide-n nchaa nacuáa ní chídó tnùní ndí Moisés cadá-yu.

25 Te sa ní quide ndáá-ndí cuendá nchaa ñáyiu ñuú xícá, nchaa ñáyiu ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyiu-áⁿ sǎ vǎ cǎxǐ-yu nchaa sá nchító-ó ndùu táhú nchaa sá cǎchí-yu cùu ndióxí ní cadúha cue ñáyiu ñuyíú-a. Te ní xáhaⁿ-ndí sǎ vǎ cǎxǐ-yu níñí, te vǎ cǎxǐ-yu cuñú nchaa quiti cuèhné. Te yǎ cáháⁿ ndìhi cue téé ñàdìhí te núu ñǎ díú ñàdìhí-güedé cúŷ-yu, te ni cue ñáyiu dîhí vǎ cáháⁿ ndìhí-yu téé te núu ñǎ díú yǐ-yu cùu-güedé. Duha ní tee-ndí núu tütú cuáháⁿ –cǎchí-güedé xǎhaⁿ-güedé xii té Pǎblú.

Ní tnǎ-güedé té Pǎblú xití veñúhu ñáyiu isràél

26 Te nduu tnéé cuáháⁿ té Pǎblú ndìhi cúmí cue téé veñúhu cǎhnu sǎ ïo cùnuu núu ñáyiu isràél cada-güedé nàcuáa ní xóo cada ñáyiu ndéé sanaha

cuèndá nduu vétú iní Yă Ndiöxí. Te ní quíhu-dé veñúhu càhnu sá ïo cùnuu-áⁿ nĩ xáhaⁿ-dě ná daha-gá nduu cùmání dandìhi-güedé nàcuáa ní xóo cada ñáyiu ndéé sanaha, te dătnùní cânehe-güedé sá ndúú tăhú Yă Ndiöxí quíhíⁿ veñúhu.

27 Te cùmání-gă cuu úsá nduu sá nĩ sáháⁿ-güedé veñúhu càhnu sá ïo cùnuu, te sa ndècu tucu té Păblú veñúhu. Te cue téé isràél véxi distritú Ásiá ní xiní-güedé té Păblú yíhí-dě veñúhu, te ní tñi ñaha-güedě xii-dé, te ío ní cáháⁿ cuèhé-güedé cuèndá-dé núú dăva-gá ñáyiu yìhi veñúhu cuèndá sá cúděēⁿ-yu núú tē Păblú.

28 Te níhi ní cáháⁿ-güedé, te xăhaⁿ-güedě xii-yu:

—¡Nchòhó ñáyiu isràél, yáchí-ndó chì cuánundaha ñaha-ndo! Chi téé-a yayácáⁿ cuáháⁿ-dé càháⁿ-dé sá ñà túú nàndíhi-o, te càháⁿ-dé sá vă cadá-ó nchàa nacuáa càháⁿ tñúhu sá nĩ chídó tñùní ndíi Moisés, te càchí-dé sá ñà túú nàndíhi veñúhu-a. Te ñá díú-ní xǎⁿ chi sa ní quíhu-dé veñúhu-a ndíhi cue téé ñá túú cùu ñáyiu isràél, te sá dúcáⁿ nĩ quide-dé, te ñá túú-gă ní cânehe íi-dě xití veñúhu. Te veñúhu-a cùu-xi vehe Yă Ndiöxí —càchí-güedé xăhaⁿ-güedě xii-yu.

29 Te ducaⁿ nĩ cáháⁿ-güedé chi ní sani iní-güedé sá nĩ quíhu ndíhi-dé té Tröfimú veñúhu-güedé, chi ní xiní-güedé xícá cùu ndíhi ñaha-dé xití ñuú. Te téé-áⁿ cúú-dě téé ñuú Éfesú, te ñá díú tēe isràél cúú-dě.

30 Te chitu ñáyiu ñuú-áⁿ nĩ tacá-yu ní tñi-yu té Păblú táñùhu ñahá-yu ní ndee veñúhu càhnu sá ïo cùnuu, te òré-ni ní nacadí-güedé yèhe veñúhu-áⁿ.

31 Te sa cahní-yu té Păblú ní cùu, te ní sáháⁿ ìⁿ ùú-güedé núú ndécú tēe cùu capitáⁿ cúnùu-gá, te ní xáhaⁿ-güedě xii-dé sá ncháá ñăyiu ñuú Jerusalén xînáá-yu.

32 Te òré-áⁿ cuáháⁿ tēe cùu capitáⁿ cúnùu-gá ndihì dava-gá cue tēe nchìcúⁿ-gá ndihì sandàdú-dé. Te òré ní xiní-yu ní quexìo coyo-güedé núú xìxúcu-yu, te ní yùhú-yu ñá túú-gă ní càní-yu té Păblú.

33 Te tēe cùu capitáⁿ ní sátuha-dé té Păblú, te ní xáhaⁿ-dě xii cue sandàdú-dé sá tníí ñàha-güedé dacùtu ñaha-güedé úú cadèná. Te dătnùní ní xícáⁿ tnúhú-dě núú-yu, te xăhaⁿ-dě:

—¿Ná cúú tēe-a? ¿Ná ní quide-dé? —càchí-dé xăhaⁿ-dě xií-yu.

34 Te tēe cùu capitáⁿ-áⁿ ñă ní cùtnuní iní-dé nŭu ná cúú să ñí quide té Păblú, chi uuⁿi ní cuáá-yu. Te tucu càháⁿ ìⁿ, tucu càháⁿ ìⁿ-yu, núu xíăⁿ ní xáhaⁿ-dě cue sandàdú-dé sá cándèca ñaha-güedé xii-dé quihíⁿ cuártél núú ndécú-güedě.

35-36 Te nchìcúⁿ ñáhă-yu cuáháⁿ ní quexìo ndéé nàcuáa càa nchio cùnì-yu cahni ñàhá-yu xii-dé ni cùu. Te níhi ní cáháⁿ-yu xăhăⁿ-yu sá cáhni ñàha-güedé, te xíăⁿ ní ndacani ñaha-güedě ndécá ñàha-güedé cuásaá nchio-ăⁿ.

Té Păblú xăhaⁿ-dě xii-güedé sá ñà túú cuěchi-dé

37 Te cuánguìhu-güedé cuártél ndihì té Păblú ní cùu, te ní xáhaⁿ-dě xii tēe cùu capitáⁿ cúnùu-gá:

—Càháⁿ ndàhú-í núú-n cùndetu-ŋ na cúñaha-ĩ ìⁿ ùú tnúhu xií-yu —càchí-dé xăhaⁿ-dě.

Te tēe tàxi tnuní-áⁿ ñí xáhaⁿ-dě:

—¿Náa tnàhá yòhó càháⁿ-n tnúhu grìégú?

38 Te ní cáhàⁿ-í sá tǽ ègiptú cúú-n, chi ðiu-n nǐ ndúcú-n cuè tée ní nàá ndihí tée cùchiuⁿ Césár ní cáhàⁿ-í, chi ðiu ìⁿ tée yàcáⁿ ní ndúcú-dě cúmí mǐl cue tée ní sahní ndíyí. Te ndèca tnaħa-güedé ní sáháⁿ xití yucu ní xíhi váħa-güedé —càchí-dé xǎħaⁿ-dě xii té Pǎblú.

39 Te té Pǎblú ní xáħaⁿ-dě:

—Ná díú tǽ ègiptú cúù-í, chi tée isràél cúù-í, chi ðiu-ni tée isràél cúú tǎtà-í, te ðicó-ni sá nǐ cacu-í ñuú Tàrsú ñuú cáhnú, te ñuú-áⁿ yíndèhu-xi ðistritú Cìliciá. Te cuíní-í cada ndee ínín-ñ dàña-n na caháⁿ ndihí-í-yu —càchí-dé xǎħaⁿ-dě.

40 Te ní xáħaⁿ tǽ cùu capitáⁿ cúnùu-gá sá cúú cǎħáⁿ té Pǎblú, núu ní ngúnutnǐ-dé núú nchio, te ní quide-dé ndaha-dé sá cündedóho-yu. Te ní sadí-yu yuhú-yu, te ní cáhàⁿ-dé tnúhu ñáyiu isràél, te xǎħaⁿ-dě xii-yu:

22

1 —Chí cádá càħnu ínín nchòhó cue tée sa cuéhé ndihí nchòhó cue tée cuechi, na càhàⁿ-í ìⁿ tnúhu cundedóho-ndo sǎ ñà túú cuěchi-í, chi ñá túú ñǎ ní quide-í, te ni ñà túú ñǎ tnúhu càhàⁿ-í —càchí-dé xǎħaⁿ-dě xii-güedé.

2 Te cuendá sá dúcáⁿ nǐ cáhàⁿ-dé tnúhu mèé-yu núu tnávíí-ñǎ ní sadí-yu yuhú-yu ní xíndedóho-yu ní cáhàⁿ-dé, te xǎħaⁿ-dě:

3 —Yúhú cúù-í tée isràél, te ní cacu-í ñuú Tàrsú, te ñuú-áⁿ yíndèhu-xi Cìliciá. Te ðavitna lǐħli-í cútnàhá ní quexìo-í ñuú Jerusàlén ní dácuáhá ñàħa té Gamàliél. Te ní dácuáhà-í nchaa tnúhu ní chídó tnùnín nchaa cue tée ndéé sanaha nàcuáa cada ñáyiu. Te yúhú ní cahu ínín-í ní quide-í titní núú

chìuⁿ nacuaá cuu váha iní Yă Ndiöxí ní cáhàⁿ-í, te ñiⁿ-ni ducaⁿ quide nchohó tucu.

⁴ Te ní sánú ndúcù-í nchaa ñáyiⁿ sàndáá iní-xi tñuhu Jèsús, cuëi téⁿ, cuëi ñáyiⁿ ñí ní dácútù-í-yu, te ní chihi-í-yu vecaá, te ní níhì-í tñuhu ndee ñí sá cáhní-ndí-yu.

⁵ Te dútú cúnùu-gá ndihì cue téⁿ cùnùu núú-ndó nàha-güedé sá ndàá càháⁿ-í chi mee-güedé ní taxi-güedé tutú cuáñaha-í xii ñáyiⁿ isràél ñáyiⁿ ndècu ñuú Dàmascú cuendá cutnùní iní-yu ná chíúⁿ cuáháⁿ-í ní cùu. Te ñùhu-í ichi cuáháⁿ-í ñuú-áⁿ cuánúndúcù-í ñáyiⁿ ní sàndáá iní-xi tñuhu Jèsús cuendá dacùtu-í-yu te candeca-í-yu ndixi, te iha cada úhú ñáhá-güedé xií-yu ní cùu.

Té Păblú xăhaⁿ-dě xii ñáyiⁿ nàcuáa ní cuu ní tuha-dé ichi Jèsús

(Hch. 9:1-19; 26:12-18)

⁶ Te ta cùyatni-í ñuú Dàmascú cuáháⁿ-í, te cùu-xi datná òré caúxúú nduu, te uuⁿni ní quee ñuhú andiⁿ, te ní dáyèhé-xi ndéé núú nùtní-í.

⁷ Te ní quide nee-xi núù-í, xíăⁿ ní nduá-í ndéé ñuhu. Te ní tecú dóho-í càháⁿ ñí sá càháⁿ andiⁿ, te càchí-xi: “Yòhó té Sàulú, ¿ná cuendá cúú úhú iní ñáhá-n dândoho ñaha-n xii-í?”, càchí sá càháⁿ-áⁿ.

⁸ Te ní xáhaⁿ-í: “¿Ná cúú yòhó sá càháⁿ-áⁿ?”, xăhaⁿ-í. Te ní cáháⁿ tucu ingá xito te càchí-xi: “Yúhú cúù-í Jèsús téⁿ ní xíndecu ñuú Nazàrét, te ducaⁿ ño dândoho ñaha-n xii-í”, càchí sá càháⁿ-áⁿ. Te xíăⁿ ní cutnùní iní-í sá ñíú Jèsús càháⁿ.

⁹ Te nchaa cue téⁿ ndihì-í ní xiní-güedé ní dáyèhé ñuhú, te ní yùhú-güedé, dico ñá túú ní tècú dóho-güedé òré ní cáháⁿ-gá.

10 Te ní xáhaⁿ-ĩ xii-gá: “Yòhó Xítóhó Jesucrìstú, ¿ná cuení-n càda-í?”, xáhaⁿ-ĩ xii-gá. Te ní cachí-gá: “Ndacóo, te quíhíⁿ-n ñuú Dàmascú, yàcáⁿ tecú tnúhu-n nchàa nacuáa cuení Yă Ndiöxí cada-n”, càchí-gá —càchí té Păblú xáhaⁿ-dě xií-yu.

11 Te ní xáhaⁿ tùcu té Păblú:

—Te cuendá sá ñĩ dăcuáa ñàha ñuhú xii-í ñũ ní tnĩ cue tée ndihí-í ndaha-í ndécá ñàha-güedé cuáháⁿ ndéé ñuú Dàmascú.

12 Te yàcáⁿ ndécú ñⁿ tée nàni Ananiás, te ío vâi sá ñĩ chídó tnùnı ndıi Moısés cadá-yu quide-dé. Te nchaa ñáyıu ñuú Dàmascú ío váha càháⁿ ndihı ñàhá-yu xii-dé.

13 Te ní quexıo-dé núú ndécù-ı, te ní cachí-dé: “Yòhó té Sàulú, tée ndècu ndihı-ı ichı Xítóhó Jesu-crıstú, ndúha núú-n”, càchí-dé. Te òré-nı ní nacaáⁿ núú-ı te ní xinı-ı-dé.

14 Te dătnùní ní cachí-dé: “Yă Ndiöxı ní cáháⁿ ndihı-gá ñanı tnáhá-ó ñĩ xındecu ndéé sanaha. Te dıu-gá ní cáxi ñaha-gă xii-n cuendá quinı-n nchàa sá vâha cuení-gá cada-n. Te quinı-n Jèsús Yaá ñá túú cuèchi-xı, te dıu-nı mee-gă cáháⁿ ndihı ñaha-gă xii-n.

15 Te cáháⁿ-n tnũhu Jèsús núú nchàa ñáyıu, te cáháⁿ-n nchàa sá ñĩ xinı-n ndihı nchaa sá ñĩ xındedóho-n.

16 Tnàvıí, te quíhıⁿ-n cuàndute-n, te cáháⁿ ndihı-n Yă Ndiöxı cuendá cada càhnu inı-gá nchaa sá cuèhé sá dúhá ñı quide-n”, duha ní cachı té Ananiás xii-ı —càchı té Păblú xáhaⁿ-dě xií-yu.

Té Păblú ní cani-dé cuendú năcuáa ní xáhaⁿ Jèsús cada-dé quíhıⁿ-dé ñuú núú xındecu ñáyıu ñá túú cıu ñáyıu isrăél

17 Te ní xáhaⁿ tùcu té Păblú:

—Te ní ndee-í cuándixi-í ñúú Jerusàlén. Te ní sáháⁿ-í veñúhu càhnu sá ìo cùnuu ní cáháⁿ ndìhì-í Yă Ndiöxí, te ní dácótó nùú ñáhá-xí sã méé Jèsús ní xiní-í xití veñúhu,

18 te ní cachí-gá: “Yáchí, quee-n ñúú Jerusàlén, chi ñáyi-u-a vá quìndáá iní-yu nàcuáa ní cachí-í cúñaha-n xii-yu cuèndá-í”, duha ní cachí-gá xii-í.

19 Te ní xáhaⁿ-í xii-gá: “Yòhó Xítóhó Jesucristú, sa xiní-n sã ncháá ñáyi-u nàhá-yu sá ñí sáháⁿ-í ndì tnahá ìⁿ ndì tnahá ìⁿ veñúhu nànducu-í ñáyi-u sàndáá iní tnúhu-n, te ní tñi-í-yu, ní chihi-í-yu vecaá, te ní táuchíuⁿ-í ní caniha-güedě xii-yu.

20 Te cútnàhá ní sahani-güedé ndíi Těvá téé ní xóo cáháⁿ tnúhu-n, te tnàhá-í ndécú òré-áⁿ te ní xindee-í dóó cue téé ní sahani ñaha xii ndíi. Te yúhú ní cáháⁿ-í sá ñí quide váha-güedé sá dúcáⁿ ñí quide-güedé”, duha ní xáhaⁿ-í xii-gá.

21 Te ní cachí tnúhu-gá xii-í: “Cuàháⁿ chi cuiní-í quíhíⁿ-n ncháa ñúú xícá nùú xíndecu cue ñáyi-u ñá túú cùu ñáyi-u isràél cáháⁿ-n tnúhu-í”, càchí-gá — càchí té Păblú xăhaⁿ-dě xii-yu.

Te Păblú ndìhi téé tàxi tnuní ñáhá xii cue sandadú

22 Te sá dúcáⁿ ñí cáháⁿ-dé, te ñá ní tnàhá-gá iní-yu cundedóho-yu tnúhu càháⁿ-dé. Te ìⁿ-ni ñí cuú-yu ncháá-yu, te ní cuáá-yu, te xăhăⁿ-yu:

—¡Chí cáhni-dě! ¡Ñá díú sã cùndècu-dé ñuyú-a! — càchí-yu xăhăⁿ-yu.

23 Te mei òré ducaⁿ ñí cáháⁿ-yu, te ní ndátă-yu dóo-yu, te ní dáquéně-yu núú ñínu sá sàtú iní-yu. Te ní quéhnu-yu ñuhu, te ní dácácòyó-yu núú ñínu sá ìo sàtú iní-yu.

24 Te tée cùu capitáⁿ cúnùu-gá ní xáhaⁿ-dě xii cue sandàdú-dé:

—Chí dítá-dě ná quǐhu-dé ndéé xití vehe, te cani-ndo-dě ñi, chi na quène yuhu-dé ná tnúhu ní cáháⁿ-dé nùu ndéé dúcáⁿ cùdéesⁿ-yu núú-dě — cächí-dé xǎhaⁿ-dě xii-güedé.

25 Te sátá ñi dácútú ñàha-güedé xii té Pǎblú sá cáni ñàha-güedé ní cùu, te ní xáhaⁿ-dě xii tée cùu capitáⁿ ndécú-ǎⁿ:

—Te na cächí tnúhu-í sá vǎ cúú cànih-güedé ñi, chi tée ròmá cúú-í, te vátá quini ndáá-gá-ndó nùu ndècuéchi-í àdi ñáhá —cächí-dé xǎhaⁿ-dě xii tée cùu capitáⁿ.

26 Te sá dúcáⁿ ñi cáháⁿ-dé, te ní sáháⁿ tée cùu capitáⁿ núú tée cùnùu-gá, te ní xáhaⁿ-dě:

—Vá cúú cani-o tée-ǎⁿ, chi tée ròmá cúú-dě — cächí-dé xǎhaⁿ-dě.

27 Te ní sáháⁿ tée cùu capitáⁿ cúnùu-gá ndéé núú tǎ Pǎblú, te ní xáhaⁿ-dě:

—Cáháⁿ ndáá-n nùu ndisa tée ròmá cúú-n — cächí-dé xǎhaⁿ-dě.

Te ní xáhaⁿ tǎ Pǎblú:

—Ndáá sá tǎe ròmá cúú-í —cächí té Pǎblú xǎhaⁿ-dě xii tée cùnùu-áⁿ.

28 Te ní xáhaⁿ tǎe cùnùu-áⁿ:

—Yúhú tnàhá-í cúú-í tǎe ròmá, chi vài díhúⁿ ñi cháhu-í —cächí-dé xǎhaⁿ-dě.

Te té Pǎblú ní xáhaⁿ-dě:

—Tnàhá-í cúú-í tǎe yácáⁿ tucu, chi tǎtà-í cúú-dě tǎe ròmá —cächí té Pǎblú xǎhaⁿ-dě xii tée cùu capitáⁿ cúnùu-gá.

29 Te uuⁿni ní nacaca sata cuè tǎe cuáháⁿ canihá xii-dé ní cùu. Te ní yúhú tǎe tàxi tnuní sá dúcáⁿ ñi xáhaⁿ tǎ Pǎblú sá tǎe ròmá cúú-dě, chi ní xáhaⁿ-dě ní dácútú ñàha-güedé xii-dé, núu xíǎⁿ ní yúhu-dé.

Té Păblú ní cáháⁿ ndi^{hi}-dé cue téé cùn^{uu} oré ní quide-güedé jündá

³⁰ Te téé tàxi tnuní sandàdú ñá ní xìní-dé ná cuéchi ní dácáá ñăyiu isràél díquí tē Păblú, núu xiáⁿ nduu tnéé ní cana-dé cue dútú cún^{uu}, ndi^{hi} cue téé cùchiuⁿ, ndi^{hi} cue téé cùu sacuéhé, te ní xáhaⁿ-dě sá cádá-güedé jündá cuendá nducu tnūhu-güedé núú tē Păblú ná cuéchi ní dácáá-yu díquí-dě. Te ní xáhaⁿ-dě xii cue sandàdú sá nándàxi ñaha-güedé cadená ndútú-dě, te candeca ñaha-güedé quíhíⁿ núú cádá-güedé jündá. Te ní sáháⁿ-güedé ní nandaxi ñaha-güedé xii-dé ndécá ñaha-güedé cuáháⁿ jündá, te ní quexiò-güedé, te ní ngúnutnîi-dé núú cuè téé cùchiuⁿ.

23

¹ Te yacáⁿ ní xíndéhé vâha té Păblú núú nchàa-güedé, te ní xáhaⁿ-dě:

—Cada càhnu iní nchòhó cue téé cùchiuⁿ, te ducaⁿ nchòhó cue téé cùu sacuéhé, véxi-í càchí tnúhu-í sá ñà túú cuéchi-í, chi mee Yă Ndiöxí náhá-gă nása ndècu-í ñuyú-a, te ñá túú cùcahaⁿ núu-í núú-gă — càchí té Păblú xáhaⁿ-dě xii-güedé.

² Te té Ananiás téé cùu dútú cún^{uu}-gá ní xáhaⁿ-dě xii cue téé nùtnîi yatni ñîni té Păblú sá cání-güedé déhndé yuhu-dé.

³ Te té Păblú ní xáhaⁿ-dě xii dútú-ăⁿ:

—Yòhó, chi úhú tnàhí iní-n, chi ní ndúcú-n tēe ní caniha xii-í, te ñá túú cuéchi-í, dico quiní-n nă cada ñaha Yă Ndiöxí xii-n. Te yòhó ní cana ñaha-n ndùcu tnúhu-n nūu quide-í nchaa nàcuáa càháⁿ tnúhu sá ñi chídó tnùní ndíi Moisés cada-o. Te mee-n ñi ndúcú-n tēe ní caniha, te ñá túú dùcaⁿ ní

cáháⁿ ndíi cada-o —càchí té Păblú xăhaⁿ-dě xii dútú cúnùu-gá-áⁿ.

⁴ Te cue tée xĭnutníi ðĩñi té Păblú ní xáhaⁿ-güedě xii-dé:

—Nèhé ní guide-n chi ní xícuèhé-n dütú cúnùu-gá tée xĭnu cuechi núú Yă Ndiöxí —càchí-güedé xăhaⁿ-güedě xii té Păblú.

⁵ Te té Păblú ní xáhaⁿ-dě xii-güedé:

—Cada càhnu iní-ndó chi ñá túú xĭní-í sá dütú cúnùu-gá cúú-dě, chi núú tütú Yă Ndiöxí càchí-xi sá vă cúú cáháⁿ cuèhé-ó cuendá ĩⁿ tée cùnūu ñūú-ó yòtnúhu. Te yúhú ñá túú xĭní-í sá tée cùnūu cuu-dé nūu ní sácóo-í ní cáháⁿ-í —càchí té Păblú xăhaⁿ-dě xii-güedé.

⁶ Te òré-áⁿ nĭ cutnùní iní té Păblú sá dává-güedě cúndĭhi-güedé cue tée cùu saducéú, te dava-güedé cúndĭhi-güedé cue tée cùu fariséú, te níhi ní cáháⁿ-dé ní xáhaⁿ-dě xii-güedé:

—Yúhú cúú-í tée fariséú, te tnàhá tătà-í ndihĭ xĭi-í cúú-güedě cue tée fariséú tucu. Te tnàhá yúhú sàndáá iní-í sá ndótó nchàa ñáyĭu ní xĭhí, te núu xĭáⁿ cuìní-ndó ndùcu tnúhu-ndo nūù-í cáná ñàha-ndo —cachí-dé xăhaⁿ-dě xii-güedé.

⁷ Te sá dúcáⁿ nĭ cáháⁿ-dé xĭáⁿ ní nàá ndihĭ tnàha cue tée cùu fariséú ndihĭ cue tée cùu saducéú, chi ñá ĩⁿ-ní tnúhu ni cáháⁿ-güedé, chi ní ndi queheⁿ ndi queheⁿ-güedé sá nĭ cáháⁿ-güedé.

⁸ Te cue tée cùu saducéú càchí-güedé sá vă ndótó cuè ñáyĭu ní xĭhí, te cue tée cùu fariséú càchí-güedé sá ndótó-yu. Te cue tée cùu saducéú càchí-güedé sá ñà túú espíritú xĭnú cuèchi núú Yă Ndiöxí, te cue tée cùu fariséú càchí-güedé sá ìó espíritú xĭnú cuèchi núú-gă.

9 Te ta cùdéeⁿ-güedě cuáháⁿ, te níhi-gá cúu ñí-güedé cáháⁿ-güedé, te ñⁿ úú cue tée cùu fariséu cue tée dàcuaha ñaha xii ñáyi nchaa tnúhu ní chídó tnùní ndí Moisés ní cáháⁿ níhi-güedé, te xáhaⁿ-güedě:

—Ñá túu cuěchi-dé, te cudana te ní cáháⁿ ndíhi-dé ñⁿ espíritú xínú cuěchi núu Yă Ndiõxí te vá ngõo vá cúu vâha iní-ó nûú-gă —câchí cue tée cùu fariséu xáhaⁿ-güedě xii-güedé.

10 Te cuendá sá ño xñàá-güedé, xíãⁿ ní yùhú tée cùu capitáⁿ cúnúu-gá sá cáhni-güedě té Păblú, núu xíãⁿ ní xáhaⁿ-dě sá quíhíⁿ-güedé cúnúcuaca ñaha-güedě candeca ñaha-güedě núhú cuàrtél.

11 Te ndéé niú cúu ùú ní quexì Xítóhó Jesucristú núu ndécú tē Păblú, te ní xáhaⁿ-gă:

—Ñí cunduu-n, vá yùhú-n, chi nàcuáa ní cáháⁿ-n nĩ cacunehe ñaha-n xii-í iha, te ñu-ni ducaⁿ cáháⁿ-n càcunehe ñaha-n xii-í quíhíⁿ-n ñúú Ròmá —câchí-gá xáhaⁿ-gă xii-dé.

Cahni-güedé té Păblú ní cùu

12-13 Te nduu tnéé ní natacá vîhi-gá údico cue tée israél ní ndatnúhu-güedé sá cáhni-güedě té Păblú, te ní xitnáha-güedé:

—Ni dítá vă cáxí-ó te ni ndüte vá cóhó-ó ndéé ndacu-o cahní-o té Păblú, te dătnùní caxi-o dítá, te coho-o ndüte, chi sa ní sani iní-ó sã cádá-ó, te cuu cuěchi xii-o nûu vá cádá-ó —câchí-güedé xitnáha-güedé.

14 Te ní sáháⁿ-güedé núu ndécú nchàa dútú cúnúu ndíhi nchaa cue tée cùu sacuéhé, te ní xáhaⁿ-güedě:

—Ní cachí-ndí sá ni dítá vǎ cáxí-ndí ndéé nǔu ní ndacu-ndí ní sahani-ndí té Pǎblú, chi sa ní sani iní-ndí sá cádá-ndí, te cuu cuéchi núu vá cádá-ndí.

15 Te duha cada-ndo ndíhi dava-gá cue tée cùnuu, chi cúñaha-ndo xìi tée cùu capitáⁿ cúnùu-gá: “Quixi ndíhi-n tǎ Pǎblú núu ndécú-ndí cuendá ndatnúhu ndíhi-ndí-dé, chi cuíní-ndí nducu tnúhu váha-gá-ndí ná cúu sǎ ní quide-dé”, duha cúñaha-ndo xìi tée tàxi tnuní sandàdú. Te ducaⁿ-ní cúñaha-ndo dándahú-ndó-güedé cuendá quixi ndíhi-güedé té Pǎblú, te nchúhú sa cundetu-ndí-güedé ichi, chi quiní té Pǎblú ná cahni-ndí-dé —càchí-güedé xǎhaⁿ-güedě xii cue tée cùchiuⁿ.

16 Te déhe cúha té Pǎblú ní níhí-dě tnúhu nàcuáa cada-güedé ditó-dé. Te ní sáháⁿ-dé cuàrtél, te ní xáhaⁿ-dě xii ditó-dé nàcuáa càháⁿ-güedé cada ñaha-güedě.

17 Te ní cana té Pǎblú ìⁿ tée cùu capitáⁿ, te ní xáhaⁿ-dě:

—Vá cùndèe iní-n, quíhíⁿ ndíhi-n tǎe-a na càháⁿ ndíhi-dé tée cùnuu-gá, chi ndècu ìⁿ cuendú cúñaha-dě cuíní-í —càchí té Pǎblú xǎhaⁿ-dě xii tée cùu capitáⁿ.

18 Te dǎtnùní ní xica tée cùu capitáⁿ ndécá-dě dáxíⁿ tǎ Pǎblú cuáháⁿ núu ndécú tǎe cùnuu-gá, te òré ní quexìo-güedé núu-dě, te ní xáhaⁿ tǎe cùu capitáⁿ xii-dé:

—Té Pǎblú tée yìhi vecaá ní cana ñaha-dě xii-í, te ní cachí-dé véxi-í ndíhi tǎe-a cuendá cachí tnúhu-dé ìⁿ cuendú cuíní-dé —càchí-dé xǎhaⁿ-dě xii tée cùnuu-gá.

19 Te tée cùnuu-áⁿ nǐ tñi-dé ndaha dáxíⁿ tǎ Pǎblú, te tànehe ñaha-dé cuáháⁿ iⁿ xio, te ní xícáⁿ tnúhú-dě núú-dě, te xǎhaⁿ-dě:

—¿Ná cuèndú cuìní-n cǎháⁿ-n? —càchí-dé xǎhaⁿ-dě xii dáxíⁿ tǎ Pǎblú.

20 Te ní xáhaⁿ-dě xii tée cùnuu-áⁿ:

—Cue tée isràél ní ndatnúhu ndáá-güedé sá quíxí-güedě tneé cǎháⁿ ndàhú-güedé núú-n càndeca-n té Pǎblú quíhíⁿ jùndá, te yàcáⁿ cǎcáⁿ tnúhú ndáá-güedé núú-dě ná cúú sǎ nǐ quide-dé, càchí-güedé xǐtnàha-güedé.

21 Te vá quìndáá iní-n chi dicó dandàhú ñáhá-güedě, chi vǐhi-gá údico-güedé ndátnúhu-güedé cundedí-güedé ichi cahni ñaha-güedé. Te xǐtnàha-güedé sá ni dítá vǎ cǎxí-güedě, te ni ndùte vá cóhó-güedě ndéé nǔu ní ndacu-güedé ní sahani ñaha-güedě, te dǎtnùní caxi-güedé dítá, te coho-güedé ndute, chi sa ní sani iní-güedé sá cǎdá-güedě, te cuu cuéchi núu vá cǎdá-güedě, càchí-güedé xǐtnàha-güedé. Te cundecu túha-ná-güedé cundetú ñaha-güedě tneé, te núu na quìndáá iní-n càndeca-n-dé quíhíⁿ jùndá —càchí-dé xǎhaⁿ-dě xii tée cùnuu-áⁿ.

22 Te tée cùnuu-áⁿ nǐ xáhaⁿ-dě:

—Cuanùhú, te vá yǒo tnàhí cúñaha-n sǎ nǐ quixi-n nǐ cachí tnúhu-n nàcuáa cǎháⁿ-güedé cada-güedé té Pǎblú —càchí-dé xǎhaⁿ-dě.

Ndèca-güedé té Pǎblú cuáháⁿ núú tǎ Juéì tée cùu gobiernú

23 Te tée cùnuu-gá ní cana-dé úú cue tée cùu capitáⁿ, te xǎhaⁿ-dě:

—Tava-ndo úú cièndú sandàdú cue tée xìca saha, ndìhi únídico úxí sandàdú cue tée yòdo cuayú, ndìhi

úú cièndú sandàdú mee-ni cuè téé xǐnehe lànzá. Te cada túha-ndo chi caca-ndo òré caá ìíⁿ niú quíhíⁿ-ndó ñùú Cèsareá ndihí té Pàblú.

24 Te nducu-ndo cuèdicó ìíⁿ úú cuáyú codo-dě ndihí cue téé ndéé ñáhá xii-dé. Te cada cuedàdú-ndó-dě ichi, te candeca-ndo-dě quíhíⁿ quíndeca-ndo-dě núú tée cùu gobiernú —càchí téé cùnuu-áⁿ xǎhaⁿ-dě xii cue téé cùu capitáⁿ.

25 Te téé cùnuu-áⁿ ñí cadúha-dé tutú cuèndá quíhíⁿ ndaha té Juélí téé cùu gobiernú. Te duha ní chídó tnùní-dé núú tütú cuáháⁿ:

26 “Cóvǎha díí-n, tǎtá gobernàdór. Ío cada càhnu iní, yúhú nání-í Clàudiú Lisíás. Yúhú ní tendaha-í ìíⁿ tutú véxi ndaha-n cuèndá quiní tnùní-n nàcuáa ní cuu iha.

27 Cue téé isràél ní tñi-güedé ìíⁿ téé nàni Pàblú cuiní-güedé cahni ñaha-güedě ní cùu, te ní níhí-í tnúhu sá tée ròmá cúú-dě nùu ní sáháⁿ-í ndihí sandàdú-í ní dácăcu-ndí-dé.

28 Te ní cuiní-í quiní-í ná cuèndá téé ñaha-güedé cuéchi xii-dé, núu xǎⁿ ndécà-í-dé ní sáháⁿ núú ñí quide cue téé cùchiuⁿ isràél jùndá.

29 Te yàcáⁿ ní níhí-í tnúhu sá ñà túú nǎ cuéchi ní quide-dé, chi cuèndá-ni sá ñí níhí-güedě tnúhu sá ñà túú sàndáa iní-dé cada-dé nchaa sá ñí xóo cada ñáyiu ní xíndecu ndéé sanaha nchícúⁿ nihnu-güedé quide-güedé, xǎⁿ ní cudééⁿ-güedě núú-dě. Te ñà túú cuéchi càhnu ni quide-dé nùu quíhíⁿ-dé vecaá àdi cahni-í-dé.

30 Te ní níhí-í tnúhu sá cuè téé isràél ndúcú-güedě nàcuáa cada-güedé cahni ñaha-güedě xii-dé, xǎⁿ ní xáhaⁿ-í xii sandàdú-í sá cándèca ñaha-güedé quixi xǎⁿ. Te ní xáhaⁿ-í xii cue téé tée ñaha

cuéchi sá quíxí-güedě ndéé xíaⁿ cǎháⁿ-güedé nŭu ná cuéchi ní quide-dé. Te cada cǎhnu iní-n chi duha-ni ndùu tnúhu cǎháⁿ-í, te cundee iní-n quèheⁿ cuendá-n-dě”, duha ní chídó tnùní téé ní cadúha tutú cuáháⁿ ndaha té Juělí.

³¹ Te cue sandàdú ní quide-güedé nàcuáa ní xáhaⁿ tée tàxi tnuní ñáhá xii-güedé chi ní xica-güedé ndihí té Pǎblú òré caá íⁿ niú, te diu-ni niú-áⁿ nǐ quexìo-güedé ñuú Antìpatrís.

³² Te sátá nǐ túndaá, te ní nacuico cuè téé xínehe lànzá ndihí dava-gá sandàdú xícá sàha cuánuhú-güedé cuàrtél, te mee-nǎ sandàdú cue téé yòdo cuayú cuáháⁿ ndihí té Pǎblú.

³³ Te òré ní quexìo-güedé ñuú Cèsareá, te ní sáha-güedé téé cùu gobiernú tutú néhé-güedé cuáháⁿ. Te ní queheⁿ cuendá-dé té Pǎblú.

³⁴ Te sátá nǐ dácuáhá tée cùu gobiernú-áⁿ tutú-áⁿ te ní xícáⁿ tnúhú-dě núú tǎ Pǎblú, te xǎhaⁿ-dě:

—¿Ndéé téé cùu-n? —cachí-dé xǎhaⁿ-dě.

Te ní xáhaⁿ tǎ Pǎblú:

—Tée Cìlicíá cúu-í —càchí-dé xǎhaⁿ-dě.

³⁵ Te ní xáhaⁿ tée cùu gobiernú-áⁿ:

—Òré quexìo cue téé tée ñaha cuéchi xii-n, te cǎháⁿ-n nǎsa ní cuu, chi níhí-í nàcuáa cada ndáá-í cuendá-n —càchí-dé xǎhaⁿ-dě xii té Pǎblú.

Te ní xáhaⁿ-dě xii sandàdú sá cúndéé-güedé té Pǎblú vehe cǎhnu té Hèrodés.

24

Té Pǎblú xǎhaⁿ-dě xii té Juělí sá ñà túú cuéchi-dé

¹ Te sátá nǐ cuu úhúⁿ nduu, te té Anàniás dútú cúnùu-gá cuáháⁿ-dé ñuú Cèsareá ndihí cue téé cùu sacuéhé ndihí íⁿ téé nàni Tértulú téé

càháⁿ yuhu-güedé. Te cuáháⁿ-güedé núú tǝ cùu gobiernú cuáháⁿ dácuaándèhnde-güedé núú-dǝ sá ndècuéchi té Pǎblú.

² Te ní sánguaca-güedé té Pǎblú. Te òré ní quexìo-dé núú-güedé, te ní ngüíta té Tǝrtulú xǎhaⁿ-dǝ xii té Juǎlí nàcuáa càa cuéchi tǝ-güedé té Pǎblú:

—Ío càhnu cada iní tǎtá gobernàdór. Duha ndùu chiuⁿ ndéé iní ñáhá-ndǝ xii-n vǝxi-ndǝ, núu nása cachí-n cùnduu. Táxǎhu xii-n, chi ío váha ndècu nchaa ñáyiú, te ñá túú nàá-yu chi ío váha quide-n.

³ Te ío cùdíí iní-yu chi nchaa-ni nduu xǐndecu váha-yu ncháá-yu, te ío táxǎhu Ndiöxí xii-n sǎ dúcáⁿ quide-n.

⁴ Te cada càhnu iní, cuìní-í ndatnúhu-o ñⁿ úú-ni cuèndú cuèndá sá vǎ cùyàa-o dacuíta-í chiuⁿ-n.

⁵ Te ñⁿ tée iha ío dàsatú iní ñáhá-dǝ, chi ndèni ní cuu cuáháⁿ-dé ndátnǔhu-dé ndǝhi ñáyiú isràél dánàá-dé-yu. Te nèhé quidé-dǝ chi cuáháⁿ-dé dácàháⁿ-dé nchaa ñáyiú cuèndá quíndáá iní-yu tnúhu tée ní xǐndecu ñuú Nazàrét.

⁶ Chi ducaⁿ càháⁿ cue tée iha sá ñǝ sáháⁿ-dé veñúhu càhnu sá ío cùnuu, te cuìní-dé daquèe tíhú-dǝ veñúhu cuèndá cuìní-dé xocàni-dé sá íí ndécú, núu xǎⁿ ní tñǝ ñaha-güedé ndécá ñaha-güedé cuáháⁿ núú cuè tée cùchiuⁿ cuèndá cácaⁿ tnúhú-güedé núú-dǝ nǔu ná cuèndá ducaⁿ cuìní-dé cada-dé, chi ducaⁿ càa leí ndécú ndǝhi-güedé sá cáda ndǎá-güedé nǔu ná ñⁿ sá cúu.

⁷ Te té Lìsiú tée cùu capitáⁿ cúnùu-gá ní quexìo-dé ndǝhi sandàdú, te ní dácúnú-güedé nchaa cue tée nùtnǝ ndǝhi té Pǎblú, te dǎtnùnǝ ní tñǝ ñaha-güedé xii-dé ndécá ñaha-güedé cuáháⁿ.

8 Te sáta xǎaⁿ, te ní xáhaⁿ-dě sá quíxí-güedě ndéé ndíha cundáá cuéchi-dé. Te yòhó cundee ìní-n càcáⁿ tnúhú-n nǔú-dě, te núu ndáá ducaⁿ nǐ quide-dé àdi ñáhá —càchí té Těrtulú xǎhaⁿ-dě xii té Juéí tée cùu gobiernú.

9 Te dava-gá cue tée isràél xǎnutnǐ xíaⁿ nǐ cáháⁿ-güedé sá ndàá càháⁿ té Těrtulú.

10 Te tée cùu gobiernú ní quide-dé ndaha-dé núu tǎ Pǎblú cuendá cáháⁿ-dé, te té Pǎblú ní xáhaⁿ-dè:

—Yòhó sa ní cuu titní cuía ndécú-n ìha xehndé-n cuéchi nchaa ñáyiu xǎnàá, núu xǎaⁿ ío cùdí ìní-í sá ndíha téhndé cuéchi tée ñaha-güedé xii-í. Te cundee ìní-n cùndedóho-n na càni-í cuendú nàcuáa ní cuu.

11 Te nducu tnǔhu-n te quini-n nǎ càháⁿ ndáá-í, chí sa ní cuu úxúú nduu sá nǐ sáháⁿ-í veñúhu càhnu sá ío cùnuu ñúú Jerusàlén ní cáháⁿ ndihí-í Yǎ Ndiǒxí.

12 Te ni ñà túú ní nàá-í ndihí ñáyiu xití veñúhu, te ñá túú ní xáhaⁿ-í nàá-yu ni ñⁿ xichi, te ni ñⁿ veñúhu líhli ní sáháⁿ-í ñá túú nǎ ní xáhaⁿ-í cadá-yu.

13 Te ni ñà túú quèñuhu-güedé cue tée cáháⁿ ndáá te núu ndáá ducaⁿ nǐ quide-í.

14 Te yúhú càháⁿ ndáá-í sá càháⁿ ndihí-í Yǎ Ndiǒxí, chí ñu-ni Yá Ndiǒxí ní xóo cáháⁿ ndihí ñáyiu ndéé sanaha, núu xǎaⁿ ní tuha-í ichi-gá. Te cue tée-a càchí-güedé sá ñà díú ñⁿ ichi váha ni tuha-í. Te yúhú sàndáá ìní-í nchaa sá nǐ chídó tnùní ndí Moisés ndihí dava-gá cue tée ní xóo cáháⁿ tnúhu Yá Ndiǒxí ndéé sanaha.

15 Te sàndáá tucu ìní-í sá ndótó nchaa ñáyiu ní xíhí, cuéi ñáyiu váha ìní-xi, te cuéi ñáyiu úhú ìní-xi, dico ndotó-yu. Te ducaⁿ nǐ xóo quindáá ìní nchaa ñáyiu ní xíndecu ndéé sanaha.

16 Te yúhú ío ndùcu ndee-í quidè-í nchaa sá càháⁿ Yă Ndiöxí cuendá sá vă cúú càhaⁿ núù-í núú-gă ndihî núú ñăyiu ñuyíú-a.

17 Te sa ní cuu titní cuía să ñà túú-gă sàháⁿ-í ñuú Jerusàlén, te ní sàháⁿ tucu-í néhè-í díhúⁿ ñă taxi ñăyiu ñuú xícá cuendá cuáñaha-í xii ñăyiu ñuú Jerusàlén. Te ní ndúcù-í sá cuăha táhù-í Yă Ndiöxí.

18 Te ní xindecu-í veñúhu càhnu sá ío cùnuu ní quide-í nchaa nàcuáa ní xóo cada ñăyiu ní xindecu ndéé sanaha cuendá nduu vétú iní Yă Ndiöxí. Te ñá túú chítú-yu ní sàháⁿ, te ní ñà túú ñà ní cùu, te ní naníhí ñáhá ñⁿ úú cue téé isràél xii-í, cue téé véxi distrítú Àsiá.

19 Te quixi mee-güedë iha cáháⁿ-güedé, te núu sá ndàá ní xini-güedé sá yúhú ndècuéchi-í ní cùu,

20 àdi ñáhá. Dico cachí tnúhu cue téé-áⁿ nása ní cuu òré ní xindecu-í jündá-güedé ñuu ndècuéchi-í àdi ñá túú ndècuéchi-í.

21 Dico ñá túú cuéchi-í chí ñⁿdìi-ni tnúhu ní cáháⁿ-í ní xáhaⁿ-í xii-güedé sá sàndáá ini-í sá ndótó nchàa ñăyiu ní xíhí, te diu-ni núu xíãⁿ càchí-güedé sá ndècuéchi-í —càchí té Păblú xăhaⁿ-dë xii té Juělí.

22 Te té Juělí sa xini váha-dé nàcuáa cuáháⁿ tnúhu Jèsús, núu xíãⁿ ñá ní cuení-gá-dé ndatnúhu-dé ndihî té Păblú, te ní xáhaⁿ-dë:

—Sa ní cuu, cundetu-n na quèxio té Lìsiú téé cùu capitáⁿ cùnùu-gá, te òré-áⁿ cundáá cuendá-n —càchí té Juělí xăhaⁿ-dë.

23 Te ní xáhaⁿ-dë xii téé cùu capitáⁿ:

—Cundeé-n tē Păblú-ăⁿ, te núu nása càchí-dé cada-n, te dañ-a na càháⁿ ndihî-dé cue téé xini tnáhá ndihî-dé ñuu cuáñaha-güedë nchaa sá

xíní ñùhu-dé àdi nása cada-güedé —càchí té Juéli xáhaⁿ-dě xii tée cùu capitáⁿ.

²⁴ Te ní cuu titní nduu, te ní sáháⁿ té Juéli vechiùⁿ ndihí ñadihí-dé, te ñaha-áⁿ nání-áⁿ Drùsilá, te ñaha isràél cùu-áⁿ. Te ní xáhaⁿ-dě sá quĩngueñuhu-güedé té Páblú, te òré ní quexìo-dé vechiùⁿ, te ní cáháⁿ-dé núu-yu nchaá-yu sá quìndáá iní-yu tnúhu Xítóhó Jesucrístú.

²⁵ Te ní xáhaⁿ-dě:

—Mee-ni sã vãha cada-ndo. Te coto-ndo mée-ndo, te vá cáda-ndó ñi ñⁿ sá cuèhé sá dúhá, chí ñⁿ nduu cáháⁿ Yã Ndiõxí ndèdacàa ñáyiu váha iní-xi, te ndèdacàa ñáyiu úhú iní-xi —càchí té Páblú xáhaⁿ-dě.

Te sá dúcáⁿ ñi xáhaⁿ-dě, te ní yùhú té Juéli, te ní xáhaⁿ-dě:

—Vá càháⁿ-gá-ó tnàvíí, cuàháⁿ, te òré cùyächí-í, te cana ñaha-ĩ xii-n —càchí-dé xáhaⁿ-dě.

²⁶ Te té Juéli ní quide-dé cuèndá sá cuãñaha tẽ Páblú díhúⁿ te vá ndĩhu-gá-dé vecaá ní cùu, núu xíãⁿ titní xito ní cana-dé té Páblú vechiùⁿ ní ndatnúhu ndihí tnàha-güedé, dico ñá túú ní chãhu-dé.

²⁷ Te úú cuíá ducaⁿ ñi quide-güedé, te dàtnùní ní xínu té Juéli chiùⁿ-dé, te ní ngúnutnĩi té Pòrsiú Fèstú. Te òré ní xínu té Juéli chiùⁿ-dé, te ní dándõo-dé té Páblú yíhí-ni-dẽ vecaá. Te ducaⁿ ñi quide-dé cuèndá ní cuiní-dé cudìu-dé núu cuè tée isràél.

25

Té Páblú càháⁿ ndihí-dé té Fèstú

¹ Te ní cuu úní nduu sá nǐ quexìo té Fèstú ñuú Cèsareá ní queheⁿ-dé chùⁿ, te ní quee-dé cuáháⁿ-dé ñuú Jerusàlén.

² Te yàcáⁿ ní naníhí tnáhá-dě ndihì nchaa dútú cúnù ndihì nchaa cue tée tàxi tnuní ñáhá xì ñáyìu isràél, te xǎhaⁿ-güedě xii té Fèstú sá ndàá ndècuéchi té Pǎblú.

³ Te ní cáháⁿ ndàhú-güedé núú-dě sá téndàha-dé sandàdú-dé quíngueñuhu ñaha-güedě vecaá xii-dé ndéé ñuú Cèsareá te candeca ñaha-güedě quíhíⁿ. Te ducaⁿ nǐ cáháⁿ-güedé, chi ní ndatnúhu-güedé sá cáhní ñàha-güedé xii té Pǎblú ichi ni cùu.

⁴ Te té Fèstú ní xáhaⁿ-dě:

—Vá cúú quìxi-dé ndéé ndíha. Na cùndetu-dé ñuú Cèsareá chi sacú-ni nduu cuyaa-í iha te dàtnùní núhú-í yàcáⁿ.

⁵ Te yáchí-gá quíhíⁿ ndihì-í cue tée cùnùu-gá, te yàcáⁿ cuu cáháⁿ-ndó nǔu ndáá ndècuéchi-dé àdi cáháⁿ méé-dě nǔu ndáá ndècuéchi-dé àdi ñáhá, te cutnùní iní-ndó —càchí-dé xǎhaⁿ-dě.

⁶ Te ní xíndecu té Fèstú úná úxí nduu ñuú Jerusàlén, te dàtnùní cuánuhú-dé ñuú Cèsareá. Te nduu tnéé cuáháⁿ-dé vechiùⁿ, te òré ní quexìo-dé, te ní xáhaⁿ-dě xii cue sandàdú xínú cuèchi sá quíhíⁿ-güedé queñuhu-güedé té Pǎblú vecaá te candeca ñaha-güedě quíhíⁿ vechiùⁿ.

⁷ Te òré ní quexìo té Pǎblú vechiùⁿ, te sa ndècu cue tée isràél cue tée ní quee ñuú Jerusàlén, te cuánguihu-güedé ndéé dìñi té Pǎblú ní ngúnutnǐ-güedé, te xǎhaⁿ-güedě xii cue tée cùchiuⁿ sá ndècuéchi vìhi-dé, dico ñá túú ní cùndee tnúhu-güedé.

8 Te té Păblú ní xáhaⁿ-dě xii té Fèstú:

—Ñá túú ndècuéchi-í, ñá túú nă ní quide-í, chi ñá túú tnàhá iní-í cada-í ìⁿ sá cächí lèi sá vă cúú cāda-o. Te ni xiti veñúhu cāhnu sá ìo cūnuu ñá túú nă quidè-í, te ni té Cèsár tée yindaha cuéhé nacióⁿ ñá túú cāháⁿ cuéhé-í cuendá-dé —cächí té Păblú xāhaⁿ-dě xii-dé.

9 Te té Fèstú ní cuiní-dé cada-dé nācuāa cudìu-dé núú cuè tée isràél ní cūu, núu xiǎⁿ ní xáhaⁿ-dě xii té Păblú:

—¿Cundee iní-n quihíⁿ-n ñùú Jerusàlén-ǎⁿ? Te yacáⁿ cundáá cuéchi sá sàá díquí-n —cächí té Fèstú xāhaⁿ-dě xii té Păblú.

10 Te xāhaⁿ tē Păblú:

—Dìu-ni ìⁿ vechiⁿ tée cūchiⁿ Cèsár ndécù-í iha, te dīu-ni iha cada ndáá-n nūu cuiní-n ní cūu. ¿Te ná cuendá candeca ñaha-n quihíⁿ ingá xichi? Yòhó tnàhá-n xini-n sǎ ñá túú nă quidè-í ñáyiⁿ isràél.

11 Chi núu dícó yúhú ní quide-í ìⁿ cuéchi cāhnu, te ñá túú nă cada-xi cuèi na cāhni ñaha-ndo xii-í ní cūu. Te sa ní cutnùnⁿ iní-n sǎ ñá ndáá, chi mee-ni tnúhu ndehnde xicáháⁿ-güedé, te ñá túú ndūu váha-xi ducaⁿ cāda-n cúñaha-n sǎ quihíⁿ-í ndihⁿ-güedé ingá xichi. Te xiǎⁿ cuiní-í quihíⁿ-í núú tē Cèsár tée yindaha cuéhé nacióⁿ, te yacáⁿ cāháⁿ méé-dē nūu ndáá ndècuéchi-í —cächí té Păblú xāhaⁿ-dě xii té Fèstú.

12 Te ní ndatnúhu té Fèstú ndihⁿ cue tée chindee tnúhu ñaha xii-dé, te dātⁿnùnⁿ ní xáhaⁿ-dě xii té Păblú:

—Te sa ní cāháⁿ-n sǎ quihíⁿ-n quītnahá-n tē Cèsár te dīu-ni quihíⁿ-n, te quiní-n nāsa cāháⁿ tē-ǎⁿ yacáⁿ —cächí-dé xāhaⁿ-dě xii té Păblú.

Té Păblú càháⁿ ndihí-dé té Àgripá té yìndaha nacióⁿ Isràél

¹³ Te sátá nǐ cuu cuéhé nduu, te ní quee té Àgripá té yìndaha nacióⁿ Isràél cuáháⁿ-dé ñúú Cèsareá ndihí ñadìhí-dé, te ñaha-áⁿ nání-áⁿ Berènicé te òré ní quexìó-yu, te ní cáháⁿ ndihí-yu té Fèstú.

¹⁴ Te sátá nǐ cuu titní nduu, te ní cáháⁿ té Fèstú cuèndá té Păblú ní xii-dé té Àgripá:

—Ndècu ìⁿ té ní dándõo té Juèlí vecaá nání-dě Păblú.

¹⁵ Te cútnàhá ní sáháⁿ-í ñúú Jerusàlén ní nanítnáhà-í ndihí cue dútú cúnùu ndihí cue tée cùu sacuéhé nùú ñăyiu isràél. Te ní dácáá díquí-güedé té Păblú cuéchi, te ní cachí-güedé sá táúchìuⁿ-í cahni ñaha-güedé xii-dé ní cùu.

¹⁶ Te ní xáhaⁿ-í xii-güedé sá vǎ cúú, chi ñá túú dùcaⁿ quide nchúhú cue tée ròmá cùtexínu cada castiú-ndí ñăyiu, chi díhna-gá ndúcú tnùhu-ndí nùú ñăyiu sàá cuéchi díquí-xi cuèndá quini-ndí nùu nása cáháⁿ méè-yu ndihí ñăyiu sàcáⁿ cuéchi cuèndá-yu, te òré-áⁿ cútnùní iní-ndí nùu ndáá ndècuéchi-yu àdi ñáhá, te ducaⁿ te nihí-ndí nàcuáa quide ndáá-ndí cuèndá-yu, duha ní xáhaⁿ-í xii-güedé —càchí té Fèstú xǎhaⁿ-dě xii té Àgripá.

¹⁷ Te ní xáhaⁿ tùcu té Fèstú:

—Te sátá nǐ quexìo-güedé ndéé ndíha, te nduu tnéé ní sáháⁿ-ni-ndí vechìuⁿ. Te ní xáhaⁿ-í sá quingueñuhu-güedé té Păblú candeca ñaha-güedé quixi, te òré ní quexìo-dé,

¹⁸ te ní ngüíta-güedé xǎhaⁿ-güedé sá ndècuéchi-dé. Te ní sani iní-í sá ìⁿ cuéchi càhnu

tee ñaha-güedé dico ñáhá, chi dícó-ni sá ííⁿ tnũhu ní cáháⁿ-dé, xíáⁿ ducaⁿ ñi quide-güedé.

19 Te ní tenáá ñáhá-güedě xii-dé, chi cächí-güedé sá ñà túú cáháⁿ váha-dé cuendá ndiõxí-güedě. Te tnàhá-ni cuendá ííⁿ téé nàni Jesús cáháⁿ-dé, chi cächí-dé sá ñi xíhí téé-áⁿ te ní ndoto-dé cächí-dé xáhaⁿ-dě xii-güedé, cächí-güedé.

20 Te ñá ní cùnuni iní-í nása cúñaha-í xii-güedé cuendá téhndé cuéchi-dé. Te xíáⁿ ní xicáⁿ tnũhu-í núú tẽ Páblú nõu cundee ìní-dé quíhíⁿ-dé ñúú Jerusálén, te ndéé ndíácăⁿ cada ndáá-ndí cuendá-dé, te núu ndáá ndècuéchi-dé nàcuáa cáháⁿ-güedé àdi ñáhá ní cùu.

21 Te dătnùní té Páblú ní cachí-dé sá cündècu tnaa-dé vecaá te dătnùní quíhíⁿ-dé núú tẽ Cèsár, te téé-áⁿ cada ndáá-dé cuendá-dé. Te cuendá sá dúcáⁿ ñi cáháⁿ té Páblú, xíáⁿ nõu ní xáhaⁿ-í sá cündéé ñáhá cuè sandadú xii-dé, ñini na còto-í nása cada-í quíhíⁿ-dé núú tẽ Cèsár, duha ní xáhaⁿ-í xii-güedé — cächí té Fèstú xáhaⁿ-dě xii té Àgripá.

22 Te té Àgripá ní xáhaⁿ-dě xii té Fèstú:

—Te tnàhá yúhú ío cudíí ìní-í cundedóho-í tnũhu cáháⁿ-dé —cächí-dé xáhaⁿ-dě.

Te ní xáhaⁿ tẽ Fèstú:

—Tneé cana-í-dé te cundedóho-n năsa cáháⁿ-dé —cächí-dé xáhaⁿ-dě.

23 Te nduu tněé ní quexìo té Àgripá ndihí ñadìhí-dé tá Berènicé vechiunⁿ, te ío ní quide càhnu ñaha-güedé xií-yu. Te cuánguihú-yu vechiunⁿ ndihí cue téé cùu capitáⁿ cùnũu-gá ndihí cue téé cùnũu ñúú Cèsareá. Te té Fèstú ní xáhaⁿ-dě sá quíngueñuhu-güedé té Páblú vecaá, te òré ní quexìo-dé,

24 te ní xáhaⁿ tẽ Fèstú xii té Àgripá ndihì nchaa ñáyiú xĩndecu-áⁿ:

—Chí cùndèhe tée iha chi tée-a cächí cue tée is-ràél sá ndècuéchi-dé, te cùtnáhá ní xĩndecu-í ñuú Jerusàlén ní cachí-güedé sá ndáá ndècuéchi-dé, te ñu-ni ducaⁿ cáháⁿ-güedé iha. Te nchaa-güedé ní cuáá-güedé te cächí-güedé sá táuchìuⁿ-í cahni ñaha-güedě xii-dé ní cùu.

25 Te sáta ñi ndihì cuèndú ní cáháⁿ-güedé, te ní cutnùnì iní-í sá ñà túú ñi ñⁿ cuéchi cahnú ñi quide-dé, núu ñà túú ní tàuchiuⁿ-í cahni ñaha-güedé xii-dé. Te mee-dě ní cachí-dé sá quíhìⁿ-dé núú tẽ Cèsár tée yìndaha cuéhé nacióⁿ, te ní xáhaⁿ-í sá cúu quíhìⁿ-dé.

26 Te ñà túú ní xìnì váha-í nása ní quide-dé, núu xíãⁿ ñà ní ñhì-í nàcuáa cadúha-í tutú quíhìⁿ ndaha té Cèsár, te xíãⁿ ní cana-í-dé véxi-dé iha cuèndá nchaa-ndo cáháⁿ ndihì-ndo-dě. Te ducaⁿ cànuu cadíhna-gá yòhó tãtá Àgripá cácaⁿ tnúhú-n núú-dě núu nása cáháⁿ-dé, te òré-áⁿ cutnùnì iní-í nása cada-í cadúha-í tutú quíhìⁿ ndaha té Cèsár.

27 Chi sàni iní-í sá ñà túú ndùu váha-xi sá quíhìⁿ ñⁿ tée tàú cuéchi te núu vá códó tnùnì núú ñⁿ tutú nàcuáa càa cuéchi tàú-dé —cächí té Fèstú xáhaⁿ-dě xii-güedé.

26

Te Păblú cáháⁿ ndihì-dé té Àgripá

¹ Te dătnùnì ní xáhaⁿ tẽ Àgripá tée yìndaha nacióⁿ Isràél xii té Păblú:

—Te vitna cáháⁿ-n núu nása ní cuu cuèndá-n —cächí-dé xáhaⁿ-dě.

Te té Păblú ní ndacani-dé ndaha-dé sá cùndedóho-güedé, te ní xáhaⁿ-dě xii té Àgripá té yìndaha nacióⁿ Isràél:

2-3—Tătá Àgripá, ío cùdí iní-í sá nǐ naníhí tnáhá-ó vitna, chi yòhó ío váha xìní-n nchàa nacuáa quide ñáyiú isràél quidé càhnú-yu Yá Ndiöxí, te ío váha xìní-n nchàa tnúhu xǐtnáhá-yu. Te vitna cundee iní-n cùndedóho-n ìⁿ úú tnúhu na càháⁿ-í. Na càchí tnúhu-í sá ñă ndáá ní quide-í nchaa sá càháⁿ cue tée isràél.

Té Păblú càháⁿ-dé nàcuáa ní quide-dé cútnáhá vátá túhá-gă-dé ichi Yá Ndiöxí

4 Te sa nàha nchaa cue tée cùnnuu núú ñáyiú isràél nàcuáa ní quide-í ñuú-í ndihí ñuú Jerusàlén cútnáhá ní cuu landú-í.

5 Te mee-güedě náhá-güedě sá ndèè lǐhli-í ní chitnahá-í cue tée cùu fariséú. Te núu cuíní-güedé cáháⁿ-güedé sá tēe fariséú cùu-í àdi ñáhá dico nchaa-güedé sa nàha-güedé sá cuè tée-áⁿ nǐ chitnahá-í. Te cue tée cùu fariséú-áⁿ ío cuíní-güedé cada-güedé nchaa nàcuáa nchìcúⁿ nihnu ñáyiú quidé-yu. Te yúhú nchaa sá nchìcúⁿ nihnú-yu quidé-yu-áⁿ nǐ quide-í.

6 Te vitna ndècu-í iha, te cáháⁿ-n nùu váha-ni quide-í àdi ñáhá, chi cue tée-àⁿ téé ñàha-güedé cuéchi xii-í cuendá sá sàndáá iní-í sá ndótó nchàa ñáyiú ní xihí. Te ñu-ni ducaⁿ ní xáhaⁿ Yá Ndiöxí xii nchaa ñaní tnáhá-ó nǐ xǐndecu ndéé sanaha.

7 Te nchaa ñáyiú-áⁿ xǐndetú-yu nduu ndòto ñáyiú ní xihí ní cùu. Te ñu-ni ducaⁿ ndètu nchaa ñaní tnáhá-ó ndècu ñuyíú-a ndéé vitna, te xíⁿ nùu cuèi nduu cuèi niú càháⁿ ndihí-yu Yá Ndiöxí. Te sá

sàndáá iní-í nõu xíǎⁿ ní cáháⁿ-í, te tèe ñaha cue téé isràél cuéchi xii-í.

⁸ ¿Te ná cuèndá nchòhó cue téé isràél ñá túú cuíní-ndó quìndáá iní-ndó sǎ dándòto Yá Ndiǒxí nchaa ñáyiú ní xíhí? —càchí té Pǎblú xǎhaⁿ-dě.

Té Pǎblú cání-dě cuèndú sá nǐ xóo chihi-dé ñáyiú sàndáá iní tnúhu Jèsús vecaá

⁹ Te ní xáhaⁿ tùcu té Pǎblú:

—Ndéé dàvá-án nǐ quide úhú-í ñáyiú sàndáá iní-xi tnúhu Jèsús Yaá ní quee ñuú Nazàrét, te ní cáhàⁿ-í sá vǎha-ni ní quide-í sá dúcáⁿ nǐ quide-í.

¹⁰ Te d̄i-u-ni ducaⁿ nǐ quide-í ñuú Jerusàlén. Te cue dútú cúnùu ní taxi-güedé ìⁿ tutú cuèndá tn̄-í ñáyiú ní sàndáá iní tnúhu Jèsús, te vǎi-yu ní chihi-í vecaá. Te òré ní cáháⁿ-güedé sá cáhni-güedé ñáyiú-án, te tnàhá-í ní cáháⁿ-í sá cúú càhni ñaha-güedé xií-yu.

¹¹ Te titní xito ní sáháⁿ-í nchaa veñúhu ñáyiú isràél, te ní caní-í-yu te ní xáhaⁿ-í sá dáñǎ-yu ichi Jèsús. Te cuèndá ío ní cudéèⁿ-í núǎ-yu, xíǎⁿ ní sáháⁿ-í nchaa ñuú xícá nǐ sánúndúcù-í dava-gá ñáyiú sàndáá iní tnúhu-gá cuèndá dandòho ñaha-güedé xií-yu.

Té Pǎblú càháⁿ tucu-dé nása ní cuu ní tuha-dé ichi Yá Ndiǒxí

(Hch. 9:1-19; 22:6-16)

¹² Te cuèndá xíǎⁿ ní xica tucu-í cuáháⁿ-í ñuú Dàmascú, néhè-í tutú ní taxi cue dútú cúnùu cuáháⁿ, cuèndá sá ndácù-í tn̄-í nchaa ñáyiú sàndáá iní tnúhu Jèsús ní cùu.

¹³ Te òré caúxúú nduu ñùhu-í ichi cuáháⁿ-í, te uuⁿni ní quee ñuhú and̄iú nǐ dáyèhé-xi ndéé núú

nútnĩ-í ndĩhi cue té ndèca tnaha ndĩhi-í, te níhi-gá ní dáyèhé-xi dàcúúxí nchĩcanchii.

14 Te nchaa-ndí ní nduá-ndí ndéé ñuhu, te ní tecú dóho-í càháⁿ ìⁿ sá càháⁿ tnúhu ñáyiú isràél, te càchí-xi: “Yòhó Sàulú, ¿Ná cuendá cúú ùhú iní ñáhá-n xì-í dándòho ñaha-n? Te ío dándòho-n mee-n, chi dàtná cuìní-n quide ndicutu quide-n chi quitì-áⁿ òré cǔxi-güedé-dì pùyá te sǎha-dì patadá núú-xi, te sá dúcáⁿ quide-dì te quide úhú-dì mee-dì. Te ducaⁿ sǎtnahá-xi cùu yohó chi ñá túú sàndáá iní ñáhá-n xì-í”, càchí sá ñí càháⁿ-áⁿ.

15 Te ní xáhaⁿ-ĩ: “¿Ná cúú yòhó sá ñí càháⁿ-áⁿ?”, xǎhaⁿ-ĩ. Te càchí sá càháⁿ-áⁿ: “Yúhú cúú-í Jèsús Yaá cúú ùhú iní-n”, duha ní cachí sá càháⁿ-áⁿ. Te xiáⁿ ní cutnùní iní-í sá Jèsús càháⁿ.

16 Te ní cachí-gá: “Ndacuíñí-n chi yúhú càháⁿ-í chi cuìní-í quíhíⁿ-n càda-n chiuⁿ-í, chi quíhíⁿ-n cǎháⁿ-n núú ñáyiú nàcuáa ní cuu ní xiní ñáhá-n xì-í vitna, te quixi tucu-í càháⁿ ndĩhi ñaha-ĩ xii-n, te cúñaha-n xì-í-yu nàcuáa càháⁿ-í.

17 Chi cuìní-í quíhíⁿ-n cǎháⁿ-n tnúhu-í núú ñáyiú isràél ndĩhi núú ñáyiú ñá túú cùu ñáyiú isràél, te coto ñaha-ĩ xii-n cuendá vá cáhni ñáhá-yu xii-n.

18 Te cuìní-í quíhíⁿ-n cǔñaha-n xì-í-yu sá dáñá-yu nchaa ichi cuèhé ichi duha ndècú-yu, te tuhá-yu ichi váha cuendá vá quindáá iní-yu cadá-yu sá càháⁿ yucu ñávaha, te quindáá iní-yu cadá-yu nchaa nàcuáa càháⁿ Yǎ Ndiõxí. Te núu na quindáá iní-yu tnúhu càháⁿ-í, te cada càhnu iní-í nchaa cuéchi-yu, te naníhí tàhú-yu ndĩhi dava-gá ñáyiú sa ní xócuñí nchaa sá cuèhé sá dúhá ñí xíndecu iní-yu”, duha ní cachí-gá xii-í —càchí té Pǎblú

xáhaⁿ-dě xii té Àgripá tée yìndaha nacióⁿ Isràél.

Té Păblú quidé-dě nchaa nàcuáa ní xáhaⁿ Jèsús cada-dé

¹⁹ Te ní xáhaⁿ tùcu té Păblú xii té Àgripá:

—Ñá túú dàña ndeé-í quidè-í nchaa nàcuáa ní cáháⁿ Jèsús òré ní cáháⁿ-gá andiù.

²⁰ Te díhna-gá ñáyiu ñuú Dàmascú ní cáháⁿ-í tnúhu-gá núù-yu, te ní xáhaⁿ-í xií-yu sá dáñă-yu nchaa sá cuèhé sá dúhá quidé-yu, te cáháⁿ ndihí-yu Yá Ndiõxí, te cadá-yu mee-ni sã vâha cuendá cutnùní iní dava-gá-yu sá ñí dáñă-yu nchaa sá ñà túú vâha ní xóo cadá-yu. Te ducaⁿ-ni nì xáhaⁿ-í xii ñáyiu ñuú Jerusàlén ndihí ñáyiu ñihí nacióⁿ Isràél ndihí nchaa ñáyiu ñá túú cùu ñáyiu isràél.

²¹ Te cuendá sá dúcáⁿ ñí cáháⁿ-í nùu ní tñi ñaha cuè tée isràél xii-í cùtnàhá ní sáháⁿ-í veñúhu càhnu sá ìo cùnnu cahni ñaha-güedé ní cùu.

²² Te ñu-ni mee Yá Ndiõxí ní chindee ñàha-gá xii-í nùu ndècu-í iha tnàví cáháⁿ-í tnúhu-gá, te mee-ni tnúhu-gá cáháⁿ ndihí-í ncháá-yu, cuèi ñáyiu cuica, te cuèi ñáyiu ndàhú. Te ndí Moisés ndihí dava-gá cue tée ní xóo cáháⁿ tnúhu Yá Ndiõxí ndéé sanaha ñí cáháⁿ-güedé nàcuáa cada-xi vitna, te ñu-ni ducaⁿ cáháⁿ-í nchaa-ni nduu.

²³ Te cue tée-áⁿ ñí cachí-güedé sá Crìstú Yaá tendaha Yá Ndiõxí quixi ñuyíú-a ndoho tnahá-gá, te cuú-gá, te dàtnùní ndoto-gá. Te ducaⁿ càda-xi nchaa ñáyiu ní xíhí ndotó-yu núu na sàá nduu chi ducaⁿ càda-xi ní cachí méé Yá Ndiõxí. Te cuendá sá dúcáⁿ ñí ndoto-gá, xiáⁿ cùtnùní sá cúú nàníhí tàhú ñáyiu, cuèi ñáyiu isràél, te cuèi ñáyiu ñá túú cùu ñáyiu isràél. Te dàtná-ni ndùu tnúhu ní cáháⁿ cue

tée ní xóo cáháⁿ tnúhu-gá ndéé sanaha-ǎⁿ, te diu-ni ducaⁿ càháⁿ yúhú tucu —càchí té Pǎblú xǎhaⁿ-dě.

Té Pǎblú xǎhaⁿ-dě xii té Àgripá sá quìndáá iní-dé tnúhu Jèsús

²⁴ Te sá dúcáⁿ nǐ cáháⁿ té Pǎblú, te ní cáháⁿ níhi té Fèstú, te xǎhaⁿ-dě:

—Pǎblú, jíó lùcú càháⁿ-n! Cuendá ío vài ní dácúáháⁿ, núu xǎⁿ ndádá lùcú ñáhá-xí xì-n —cachí-dé xǎhaⁿ-dě.

²⁵ Te ní xáhaⁿ tǎ Pǎblú:

—Ñáhá, vá dúcáⁿ cǎháⁿ-n chi ñá díú sǎ lùcú-í duha càháⁿ-í, chi tnúhu ndáá càháⁿ-í.

²⁶ Te té Àgripá-a sa nàha-dé ndìhi nchaa ñáyíu isràél nàcuáa ní cuu, chi sa ní níhí-dé tnúhu ndìhi dava-gá-yu nàcuáa ní cáháⁿ-í, núu xǎⁿ cùyì-í càháⁿ ndìhi-í-dé —càchí-dé xǎhaⁿ-dě xii té Fèstú.

²⁷ Te ní xáhaⁿ-dě xii té Àgripá:

—Yúhú sa xìní-í sá sàndáá iní-n tnúhu ní chídó tnùnì cue tée ní xóo cáháⁿ tnúhu Yá Ndiǒxí ndéé sanaha —càchí-dé xǎhaⁿ-dě.

²⁸ Te ní xáhaⁿ tǎ Àgripá:

—¿Quìde-n cuendá sá ííⁿ ǔú tnúhu ní cáháⁿ-n te quìndáá iní-í tnúhu Jèsús cáháⁿ-n-ǎⁿ? —càchí-dé xǎhaⁿ-dě.

²⁹ Te ní xáhaⁿ tucu té Pǎblú:

—Cuèi vitna te cuèi ndéé cuèé-gá dico cuìní-í sá dàcuítí sǎ quìndáá iní-n tnúhu Jèsús. Te diu-ni ducaⁿ xìcáⁿ táhù-í núú Yá Ndiǒxí sá ncháá ñáyíu ndècu ndìhi-o iha quìndáá iní-yu tnúhu-gá dàtná cuìní-n nǐ quide yúhú, ducaⁿ càdá-yu. Dìcò-ni sá nùu vá quìhíⁿ-ni-yu vecaá dàtná cuìní-n ndòho yúhú —càchí-dé xǎhaⁿ-dě xii té Àgripá.

30 Te sátá dúcáⁿ ñĩ cáháⁿ-dé, te ní ngúnutnîĩ té Àgripá téé yíndaha nacióⁿ Isràél, ndihĩ té Fèstú téé cùu gobiernú, ndihĩ tá Berènicé ndihĩ dava-gá ñáyiu xĩnucóo yatni.

31 Te ní tnahá-yu ndèca tnahá-yu cuáháⁿ ìⁿ xio. Te ní xítñàhá-yu:

—Tée-ãⁿ ñã túú ñã cuéchi ni quide-dé nõu chihi ñaha-güedě vecaá àdi cahni ñaha-güedé —càchí-yu xítñàhá-yu.

32 Te té Àgripá ní xáhaⁿ-dě xii té Fèstú:

—Cuéchi mee-dě chi ní cachí-dé sá quítñahá-dé té Cèsár, xíãⁿ nõu ndíhu tucu-dé vecaá, te núu ñã túú dùcaⁿ ni cáháⁿ-dé, te cácu-dé ní cùu —cachí-dé xãhaⁿ-dě xii té Fèstú.

27

Té Păblú cuáháⁿ-dé ñuú Rómá

1-2 Te ní ndatnúhu-güedé sá quihĩⁿ té Păblú ndihĩ bàrcú nacióⁿ Itàliá, te tñàhá yúhú quihĩⁿ-í ndihĩ-dé. Te tñàhá ìⁿ téé nàni Aristarcú cùnĩ-dé quihĩⁿ ndihĩ-ndĩ-dé, te cùu-dé téé ñuú Tesalónicá, te ñuú-áⁿ yíndèhu-xi distritú Macèdoniá. Te ní sáha cuèndá-güedé té Păblú ndihĩ ìⁿ úú-gá cue téé xixihĩ vecaá ní queheⁿ cuèndá ñãhá tě Jülüú téé cùu capitáⁿ, téé yíndaha nchaa sandadú nání Àugustú, te ní quée-ndĩ nchaa-ndĩ bàrcú ñuú Adràmitiú. Te ní xica bàrcú-áⁿ cuáháⁿ-ndĩ ndihĩ-xi te cuita yáha-ndĩ ìⁿ úú ñuú yíndèhu distritú Àsiá quihĩⁿ.

3 Te nduu tnéé ní quexìo-ndĩ ñuú Sidón. Te ío váha ní quide té Jülüú, chi ní dáñá-dě ní quene té Păblú ní sáháⁿ-dé ní cáháⁿ ndihĩ-dé cue téé ío

váha tnàhá tnúhu ndìhi-dé nũu cudana cundàhú iní ñáhá-güedé cuáñaha-güedé nchaa sá xíní ñũhu-dé.

4 Te dătnùní ní ndée tucu-dé bàrcú cuáháⁿ-ndí. Te ío níhi táchí te ñá ní dăña-xi caca ndáá bàrcú, te ní sáháⁿ bàrcú ndée yatni yuhu dîstrítú Chìpré, te dîstrítú-áⁿ cáá cuádava xítí làmár, te xíaⁿ ñà túú cuéhé táchí ni yăha-ndí.

5 Te ta yăha-ndí cuáháⁿ, te ní yáha-ndí ìⁿ xio yuhu dîstrítú Ciliciá ndìhi yuhu dîstrítú Pànfiliá, te ní sáá-ndí ndée ñuú Mírá ìⁿ ñuú yíndèhu dîstrítú Lìciá.

6 Te ní quene téé cùu capitáⁿ cuándúcú-dě ìngá bàrcú, te ní níhí-dě ìⁿ bàrcú téé ñuú Alejàndriá, ñúhú ìchi-xi quíhíⁿ-xi nàcióⁿ Italiá. Te ní ndìcuaca ñaha-dě xii-ndí cuáháⁿ-ndí ní quée-ndí bàrcú-áⁿ, te ní xica-xi cuáháⁿ-xi.

7 Te ío cuée cuáháⁿ bàrcú-áⁿ, cuéhé nduu ní xúhuⁿ-xi ichi, te yica-ni ñí quexìo-ndí yuhu ñuú Nidú, te ñá ní dăña-gá táchí quíhíⁿ ndáá bàrcú nũu ní xícó ndùú-xi. Te ní yáha-ndí ìⁿ xio yuhu dîstrítú Crětá núú ñà túú quène vihi táchí, te dîu-ni cuádava tucu làmár cáá dîstrítú-áⁿ. Te ní yáha-ndí yuhu ñuú Sàlmón, te dîu-ni Crětá yíndàha-xi ñuú-áⁿ.

8 Te ní yáha-ndí cuáháⁿ-ndí mee-ñă núú ràyá dîstrítú Crětá, te ío ní ndoho-ndí ní sáá-ndí ìⁿ xichi núú nání Puèrtú Váha, yatni víi-ni-gá ñuú Làséá.

9 Te ní cuyaa vîhi-ndí ichi, ducaⁿ-ni cùu-ndí ní tnahá yóó cúúⁿ dăú táchí, te ío úhú yăha bàrcú nũu na quíhíⁿ-ni-xi.

10 Te ní xáhaⁿ tĕ Păblú xii-güedé:

—Nchaa-ndo cùndedóho-ndo tnũhu na càháⁿ-í-a. Ío úhú núú na càda yica-o quíhíⁿ-ó ndìhì barcú chi cuíta càrgá te cuíta bàrcú, te cuu-ni iní-xi tnàhá-ni mee-o cùú-ó chi cáhá-ó nũu na ngàunihnu-o xití ndute —càchí-dé xǎhaⁿ-dě xii-güedé.

¹¹ Te tée cùu capitáⁿ ñá ní sàndáá iní-dé tnúhu ní cáháⁿ té Pǎblú. Dico tnúhu ní cáháⁿ tée dàcaca barcú ndìhì xítóhó-xi chi ní sàndáá iní-dé.

¹² Te ñá ní tnàhá iní-güedé Puèrtú Váha cuendá sá ñí tnahá yóó cúúⁿ dǎú táchí, te ñá túú dǎhu váha táchí xǎáⁿ, núu vài-güedé ní cuiní-güedé yáha-güedé quíhíⁿ-güedé sáa-güedé ndéé ñuú Fènicé ní cùu. Te yàcáⁿ cundecu-güedé yóó cúúⁿ dǎú táchí cuèi ñá túú càváha vihi, chi nchìi nàcuáa yáha bàrcú, te yàcáⁿ quíhu táchí, dico dǎhu-gá. Núu xǎáⁿ ndéé ndíacǎⁿ nátacá bàrcú yóó cúúⁿ dǎú táchí, te diu-ni Crètá yíndàha-xi ñuú-áⁿ.

Nitùhú làmár cúúⁿ dǎú táchí

¹³ Te duha ní quene nuu luha táchí, xǎáⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètnì ndéé bàrcú, te ní xica-xi cuáháⁿ-xi ní yáha-ndí yatni víi yuhu dìstrítú Crètá.

¹⁴ Te tnaa-ni ní cuu sá ñí xica bàrcú, te duha ní cunuu dǎú táchí ñⁿ xio yuhu ñuú-áⁿ

¹⁵ te nchìta ichi cuáháⁿ bàrcú. Te ñá ní ndàcu-gá-xi quíhíⁿ ndáá-xi nàcuáa cuáháⁿ-xi ni cùu, núu ní dáñá-ndí cuáháⁿ méé-nǎ bàrcú.

¹⁶ Te ní yáha-ndí ñⁿ ñuú nání Clàudá, te ñuú-áⁿ caá cuǎdava xití làmár. Te ñⁿ xio yuhu ñuú núú ñá túú quène vihi táchí ñí yáha-ndí, te bàrcú líhli sá nchìcúⁿ

sátá bàrcú cáhnú, chi ní ndacu-ndí ní taxúha-ndí xití bàrcú cáhnú.

17 Te sátá nǐ ndacu-ndí ní taxúha-ndí bàrcú lǐhli, te ní ducuⁿ nuu-güedé yoho bàrcú cáhnú. Te ío ní yùhú-güedé sá yǎha bàrcú ndéé núú ñúhú cǔchí yuhu ñùú Sǐrté, núu xǐǎⁿ ní ndihí dóó nchítá dǐquí bàrcú ní nuu nehe-güedé, chi dóó-ǎⁿ ío níhi chǐndaha táchí, núu xǐǎⁿ cuáháⁿ bàrcú ìⁿ xio. Te ní dáñá-güedé ñá túú-gǎ ní dácaca-güedé, núu cuáháⁿ méé-nǎ-xi ta chǐndaha táchí cuáháⁿ.

18 Te ío níhi dáú táchí, te ñá ní cuìní tnàhí-xi yáha. Te nduu úú sá dúcáⁿ ñà túú-gǎ ní dácaca-güedé bàrcú te ní ngüíta-güedé ní dǎngöyo-güedé sá nchídó-xí cuèndá cuìní-güedé nduu ñamá-xi.

19 Te nduu úní ní dǎngoyo-güedé nchaa ndachìuⁿ cánehe chìuⁿ-güedé xití bàrcú.

20 Te cuéhé nduu ñá túú ní xìní-ndí ní chòdíní ní nchǐcanchii, chi ío níhi ní cuuⁿ dáú táchí, núu ní cáháⁿ-ndí sá vǎ cǎcu-ndí, chi ndihí-ndí cáhá ní cáháⁿ-ndí.

21 Te ní cuu tǐtní nduu ñá túú-gǎ xéxí-ndí, núu xǐǎⁿ ní ngúnutnǐ té Pǎblú núú-güedé, te xǎhaⁿ-dě:

—Quíndáá iní-ndó tnǔhu ní cáháⁿ-í, te cundecu nahi-o Crétá ní cùu. Te núu ní tnǐ-ndo tnúhu-í, te vǎ dácuíta-o càrgá ndihí dava-gǎ ndàchìuⁿ ní cuu.

22 Te vǎ yùhú-ndó chi vǎ cùú ní ìⁿ-ndo dico bàrcú chi cuíta.

23 Te nàha-ndo sá yùhú càháⁿ ndihí-í Yǎ Ndiòxí te quìde-í nàcuáa càháⁿ-gǎ. Te dǐu-ni mee-gǎ ní techìuⁿ-gǎ ìⁿ espíritú xínú cuèchi núú-gǎ ní quixi,

24 te ní cachí-xi xii-í: “Vǎ yùhú-n chi vǎ cùú-n, dico dacuítí quǐhíⁿ-n cǎháⁿ ndihí-n tǎ Cèsár. Te ní

iiⁿ téé ndi^{hi}-n vǎ cùú, chi ío cùdíí iní ñáhá Yǎ Ndiǒxí xii-n”, duha ní cáháⁿ espíritú xínú cuèchi núú-gǎ ní cachí tnúhu-xi xii-í.

25 Núu xiǎⁿ càchí tnúhu-í sá vǎ yùhú-ndó, chi sa cùtnuní iní-í sá cádá Yǎ Ndiǒxí nàcuáa ní cáháⁿ espíritú xínú cuèchi núú-gǎ.

26 Te mee táchí chindaha-xi bàrcú daqu^{hí}-xi ndéé yuhu ndùte —cachí té Pǎblú xǎhaⁿ-dě xii-güedé.

27 Te sa ní cuu sáhúⁿ nduu sáhúⁿ niú sá ñí ngüíta-xi cùuⁿ dáú táchí, te ñá túú-gǎ dácàca-güedé bàrcú, chi mee-ñǎ táchí tá chindaha-xi barcú cuáháⁿ núú ndute làmár Àdriá. Te sátá ñí cuu dava niú, te ní quide cuendá cue téé dácaca barcú sá tá cùyatni-güedé ñuhu yìchí.

28 Te ní chicuàhá-güedé ná daha-gá mètrú néhé-xí sǎ cùnú xití ndute cuendá cutnùní iní-güedé sá tá cùyatni-xi ndéé yuhu làmár, te nèhe-xi ócó sáhúⁿ iiⁿ-ni-gá mètrú. Te ní xica tucu bàrcú luha-gá, te dàtnùní ní chicuàhá tucu-güedé, te xíaⁿ néhé-xí ócó úsá-ni-gá mètrú.

29 Te ní yùhú-güedé sá candaundeé-xi cava, te ní queheⁿ-güedé cúmí caá náhnú sǎ nchìcúⁿ yoho, te ní dáquëe-güedé xití ndute ndàa sátá bàrcú, te dàtnùní ní ngüíñí-xi ñá ní xìca-gá-xi, te ní cuini-güedé sá òré-ni túndaá ní cùu.

30 Te cue téé dácaca barcú ní natava-güedé bàrcú lìhli dándéé-güedé núú ndute ni cùu, te ní cachí-güedé sá qu^{hí}-güedé ndàa núú bàrcú dàquée-güedé úú-gǎ caá cuendá cuita candeé-xi bàrcú cáhnú cuendá sá vǎ cáca-xí. Te cuini-güedé dandàhú-güedé dava-gá nchúhú cue téé ñuhu

ndih-güedé bàrcú, chi ní ndatnúhu-güedé sá cúnú-güedé ní cùu.

³¹ Te té Páblú ní xáhaⁿ-dě xii téé cùu capitáⁿ ndih dava-gá sandàdú:

—Te núu na dándóo ñaha cuè téé dàcaca barcú cunu-güedé, te vá cãcu-o —càchí-dé xáhaⁿ-dě.

³² Te sá dúcáⁿ ñí xáhaⁿ-dě núu ní sáháⁿ sandàdú ní xehndé-güedé yoho nchícúⁿ bàrcú lĩhli dãngáúnhnu-güedé xití ndute cuáháⁿ-xi.

³³ Te váha váha-ni ta tũndaá cuáháⁿ, te ní xáhaⁿ tẽ Páblú:

—Sa ní cuu sáhúⁿ nduu ñá túú tnahí xèxi-ndo sá ndìhú iní-ndó.

³⁴ Te vitna yáchí-ndó, chi caxi-ndo cuendá naníhí ndéé-ndó, te vá yùhú-ndó chi ñá túú nã tnahá ni ìⁿ-ndo —cachí-dé xáhaⁿ-dě xii-güedé.

³⁵ Te sátá dúcáⁿ ñí cáháⁿ-dé, te ní queheⁿ-dé ìⁿ pàá, te ní ndacáⁿ táhú-dé núú Yã Ndiõxí, te núú-güedé nchaa-güedé ducaⁿ ñí quide-dé, te dãtnùní ní táhú-dé luha ní xexi-dé.

³⁶ Te ducaⁿ te dãtnùní ní cuyì-güedé ní xexi-güedé nchaa-güedé.

³⁷ Te úú ciendú únídico sáhúⁿ ìⁿ-ndí ñúhú bàrcú núú tnahá té Páblú, te nchaa-ndí ní xexi ndih-ndí-dé.

³⁸ Te ní xexi-ndí ní ndahá xití-ndí. Te dãtnùní ní ngũita-güedé ní tava-güedé nchaa ngohnchi triú ní dãngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

³⁹ Te sátá ñí tũndaá, te ñá ní cùtnuní-gá iní-güedé ndèè cúú-xí núú ñí sáá-güedé, te ní xiní-güedé ìⁿ xichi núú ñí xícó ndùú luha yuhu làmár, te vãi

vihi cúchí dándáá-xí yùhu ndute, te xíáⁿ ñà túú dàcandá víhí táchí ndute. Te ní ndatnúhu-güedé sá ndácú-güedě dacàca-güedé bàrcú quíhíⁿ-xi ndéé núú ñúhú cùchí.

⁴⁰ Te xíáⁿ núu ní sáháⁿ-güedé ní xehndé-güedé nchaa yoho nchìcúⁿ caá tácàndeé bàrcú ní ndóo xítí làmár, te ní nadatàya-güedé vítú sã dácui-co-xi bàrcú, te ní nacata caa-güedé ìⁿ dóó dǐquí bàrcú, te ta chìndaha táchí cuáháⁿ yuhu làmár tá cùyatni-xi ñuhu yichí cuáháⁿ.

⁴¹ Te ndècu ìⁿ xichi ní nataká víhí cùchí xítí ndute, te xíáⁿ ñí nguindǔxi nihnu bàrcú-güedé, te ní cuti-xi xítí cúchí, te ñá ní ñíhí-gã-güedé nàcuáa cada-güedé nene-xi. Te ío níhi ní dácandá táchí ndute, te ní chúcú ndèé-xi ndàa sátá bàrcú, te ní ndihí ní táhú-xí.

⁴² Te cue sandàdú ní xítñaha-güedé sá cáhni-güedě nchaa cue téé ní xíhi vecaá cuendá sá vǎ quíhíⁿ-güedé núú ndute te cunu-güedé.

⁴³ Te téé cùu capitáⁿ ñá ní dàña-dé cahni-güedé cue téé ní xíhi vecaá, chi ñá ní cùndee iní-dé cahni-güedé tñahá té Pǎblú. Te ní xáhaⁿ-dě xii-güedé sá cuè téé xǐcuu cada quíhíⁿ núú ndute te na yáha-güedé ndute quene-güedé yuhu làmár.

⁴⁴ Te dava cue téé ñá cúú càda, ní xáhaⁿ-dě nanducu-güedě vítú ñí àdi vítú ñí táhú sã ñí xíhi bàrcú, te núú xíáⁿ caundodo-güedé yáha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

Té Pǎblú ndécú-dě űuú Mǎltá cáá cuǎdava làmár

¹ Te sátá nǐ cácu-ndǐ ní nene-ndǐ űuhu yìchí, te ní níhí-ndǐ tnúhu nàcuáa nàni űuú núú nǐ sáá-ndǐ, te űuú-áⁿ nání-xí Mǎltá, te càa-xi cuádava làmár.

² Te ío quìde víxiⁿ-xi cuèndá ío cùuⁿ dáú. Te űáyiu űuú-áⁿ nǐ cundàhú iní ñáhǎ-yu xii-ndǐ, ní dátànàhá-yu űuhú te ní cana ñàhá-yu ní sáháⁿ-ndǐ ní nacuídí-ndǐ.

³ Te té Pǎblú dátacá-dé nducú, te tnàhá-ni ñⁿ cóo děéⁿ nǐ tnǐ nihnu-dé-di, te òré cuáháⁿ ndaha-dé chucu-dě núú ñùhú, te ní ñáni-di cahni, te ní ndee-di xítí nducú ní sánduú-di ndaha-dé, te ní xexihaⁿ-di xì-dé.

⁴ Te nchaa űáyiu ndèhé-yu sá tácàndeé-di ndaha-dé, te ní ngüíta-yu ní xítñàhá-yu:

—Váa ndíyǐ ní sahani téa-a, te ñá ní xǐhí-dé làmár, te dacuítí sǎ cùú-dé vitna, chi sa nàha Yá Ndiöxí ná ní quide-dé űuyúú-a —càchí-yu xítñàhá-yu.

⁵ Te té Pǎblú ní quidi-dé ndaha-dé ní ngauni-hnu-di núú ñùhú, te ñá túú tnàhí ná ní cùu núú nǐ xexi-di.

⁶ Te űáyiu űuú-áⁿ xǐndéhě-yu núu daquìhíⁿ-xi chùhúⁿ àdi nduá-dé cuú-dé. Te naha nǐ xǐndéhé ñàhá-yu núu nása cada ñaha-xi xì-dé, te ñá túú tnàhí ná ní quide ñaha-xi, te ní xítñàhá-yu:

—Váa ndiöxí cúú tǎe-a núu dàcáⁿ ñá túú tnàhí ná ní quide-xi ndaha-dé núú nǐ xexi cóo —càchí-yu xítñàhá-yu.

⁷ Te yatni núú dúcáⁿ nǐ xexihaⁿ cǒó-ǎⁿ cáá ñuhu xitu téa nàni Publiú, te téa-áⁿ táxí tnùnǐ-dé ñihí űuú cáá cuádava xítí làmár núú ndécú-ndǐ nduu-ǎⁿ. Te ío váha iní-dé chi ní cana ñaha-dě ní sáháⁿ-ndǐ ní xíndecu-ndǐ úní nduu vehe-dé.

8 Te tătă tĕ Pùbliú-áⁿ cáá-dĕ cùhú-dé ñúhú-dĕ cahni, te tnáhá-dé daxi. Te tĕ Păblú ní sáháⁿ-dé núú cáá-dĕ, te ní cáháⁿ ndihĭ-dé Yă Ndiöxí, te ní sacáⁿ ndodo-dé ndaha-dé díquí tĕe cùhú-áⁿ, te ducaⁿ-ni nĭ quide-dé, te ní ndúha tĕe cùhú-áⁿ.

9 Te sátá dúcáⁿ nĭ quide tĕ Păblú, te ní quixi nchaa ñáyiu cùhú núú ndécú-ndĭ, te ní quide tátna ñaha tĕ Păblú xií-yu te ní ndúha-yu.

10 Te òré ndécú-ndĭ xíáⁿ, te vâi sá nĭ taxi táhú-güedĕ, te òré ní xica-ndĭ ní taxi tucu-güedé nchaa sá xíní ñùhu-ndĭ ichi.

Té Păblú ní quexìo-dé ñuú Ròmá

11 Te yàcáⁿ ní xindecu-ndĭ únĭ yóó, te sa ndècu ñ^h barcú tĕe ñuú Alejândriá òré ní quexìo-ndĭ, te ní xindecu-xi nihĭí yóó cúúⁿ dăú táchĭ. Te núú-xi cándodo sandú sá dánàni-güedé Căstór ndihĭ sàndú sá dánàni-güedé Pölúx, te xitĭ bàrcú-áⁿ nĭ quée-ndĭ cuáháⁿ-ndĭ.

12 Te ní quexìo-ndĭ ñuú Siràcusá, te yàcáⁿ ní xindecu-ndĭ únĭ nduu.

13 Te ní xica tucu bàrcú cuáháⁿ-xi, te ní quexìo-ndĭ ñuú Règiú. Te nduu tnĕé duha ní quene nuu táchĭ. Te ní xica bàrcú cuáháⁿ-xi, te ndéé nduu úú ní quexìo-ndĭ ñuú Pùteolí.

14 Te yàcáⁿ ní nanĭhĭ tnáhá-ndĭ ndihĭ ñáyiu sàndáá inĭ tnúhu Jĕsús, te ní cachĭ-yu sá cündècu-ndĭ úná nduu, núu xĭáⁿ ní xindecu-ndĭ úná nduu ndihĭ-yu. Te ní xica tucu bàrcú cuáháⁿ-xi, te ní quexìo-ndĭ ñuú Ròmá.

15 Te ñáyiú ròmá ñáyiú sàndáá iní tnúhu Jèsús, ní níhí-yu tnúhu sá cuàháⁿ-ndí, te ní quixí-yu ní quixi tnahá ñáhă-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òré ní xiní té Păblú nchaa ñáyiú véxi tnahá ñáhá xì-ndí, te ndee ndèe ní cuu iní-dé, te ní ndacáⁿ táhú-dě núú Yă Ndiöxí sá dúcáⁿ ní quidé-yu.

16 Te sátá ñí quexìo-ndí ñuú Ròmá, te cue tée cùchiuⁿ ní xáhaⁿ-güedě xii té Păblú sá cùndècu dîⁿ-dé, te ní xindeé ñáhá cuàa sandadú xii-dé.

Té Păblú càháⁿ-dé tnúhu Yá Ndiöxí ñuú Ròmá

17 Nduu úní sá ñí quexìo té Păblú, te ní cana-dé cue tée cùnuu núú ñáyiú isràél ndécú ñuú Ròmá, te ní sáháⁿ-güedé núú ndécú-dě, te ní xáhaⁿ-dě:

—Nchòhó cue tée isràél, càchí tnúhu-í sá ñă túú ñă ní quide-í ní ñⁿ ñáyiú cútnáhá ní xindecu-í ñuú Jerusàlén. Te ñă túú ní cǎháⁿ cuèhé-í sá quidě-yu nchaa ñàcuáa ní xóo cada cue ñaní tnáhá-ó ñí xindecu ndéé sanaha, te ñă túú ñă ní quide-í te ní tñî ñaha-güedě ní sáha cuèndá ñáhá-güedě xii-í núú cuè tée ròmá, cue tée ndècu yacáⁿ.

18 Te cue tée-án ñí ndúcú tnúhu-güedé ñuú ndáá ndècuéchi-í, te ní cutnùní iní-güedé sá ñă túú ñă ní quide-í, te xíăⁿ cuñí-güedé queñuhu ñaha-güedě xii-í vecaá ní cùu.

19 Te diu-ñí cue tée isràél ñă ní dàña-güedé cácu-í, chí cuñí-güedé sá cáhñí ñàha cue tée ròmá, cue tée xindecu yacáⁿ xii-í ní cùu, te xíăⁿ ñuú ní xáhaⁿ-í sá quixì-í cǎháⁿ ndihí-í té Cèsár cuèndá iha cada ndáá méé-dě cuèndá-í, te vá yôo ñⁿ tee-í cuéchi.

20 Núu xiǎⁿ ní cana ñaha-ĩ xii-ndo cuendá cu-naha-ndo nàcuáa ní cuu. Te ní xáhaⁿ-ĩ sá sàndáa iní-í sá ndótó ñǎyiu ní xíhí, te diu-ni ducaⁿ càháⁿ dava-gá ñáyiu isràél, te sá dúcáⁿ ñí cáháⁿ-í, te ní chihi ñaha-güedě vecaá, te xĩndeé ñáhá-güedě ndéé vitna —càchí té Pǎblú xǎhaⁿ-dě xii-güedě.

21 Te ní xáhaⁿ-güedě xii-dé:

—Ñá túú tnahí tutú ní tëndaha cue téé distritú Jüdeá quixi cuendá-n. Te ní cuè téé isràél ñá túú ní quixi-güedé cáháⁿ cuèhé-güedé cuendá-n.

22 Te cuiní-ndí cundedóho-ndí nása cunduu tnúhu cáháⁿ-n, chi sa ní níhí-ndí tnúhu sá ncháá xìchi ío xícáháⁿ cuèhé-yu cuendá nchaa ñáyiu sàndáa iní tnúhu Jèsús —càchí-güedé xǎhaⁿ-güedě xii té Pǎblú.

23 Te ní xáhaⁿ-güedě nduu cùyáchí-güedé te quixi-güedé cundedóho-güedé dava-gá cuendú cáháⁿ té Pǎblú. Te ní tnahá nduu ñí ndatnúhu-güedé quíhíⁿ-güedé núú quidé vèhe-dé, te vái-yu ní sáháⁿ-yu ní xíndedóho-yu tnúhu ní cáháⁿ-dé, te nchàca nchaa ní cáháⁿ ndihí-dé-yu. Te ní xáhaⁿ-dě xií-yu sá ndí Moisés ndihí dava-gá cue téé ní xóo cáháⁿ tnúhu Yá Ndiöxí ndéé sanaha ñí chídó tnùní-güedé núú tütú-güedé sá díú-gǎ tendaha-gǎ Crìstú quixi-gá ñuyíú-a. Te ní chídó tnùní-güedé nchaa nàcuáa cada-gá, te diu-ni nàcuáa càháⁿ tutú-güedé cada Crìstú, te ducaⁿ ñí quide-gá cùtnhá ní xica cuu-gá ñuyíú-a, núu xiǎⁿ ní cutnùní sá díú Jèsús cúú-gǎ Crìstú Yaá ní tendaha Yǎ Ndiöxí ní quixi ñuyíú-a. Te núu quíndáa iní-yu, te ndíhu ndaha ñaha Yá Ndiöxí xií-yu.

24 Te davá-yu ní sándáá iní-yu tnúhu ní cáháⁿ-dé, te davá-yu ñá túú ní sándáá iní-yu.

25 Te cuendá sá ñă ĩⁿ-ní tnúhu ni cáháⁿ-yu, núu xíăⁿ cuení-yu núhú-yu ni cùu. Te ní xáhaⁿ tĕ Păblú sá cùndètu tnaá-yu cáháⁿ-dé ingá tnúhu, te xăhaⁿ-dě:

—Ní xáhaⁿ Espíritú Yă Ndiöxí xii ndíi Chàíá nàcuáa cáháⁿ ndíi núú nchàa ñaní tnáhá-ó nĭ xíndecu ndéé sanaha. Te ní cáháⁿ Espíritú-gá ĩⁿ sá ndàá ní xáhaⁿ-xi xii ndíi, te duha ní xáhaⁿ-xi:

26 Quíhíⁿ-n te cúñaha-n xii ñáyiu:

Nchòhó mee-ni cùndedóho-ndo tnúhu càháⁿ Yă Ndiöxí, dico ni vă tĕcú tnùnĭ-ndó.

Te cada-gá tĭtnĭ núú să vă yōo tnàhĭ ndàcu cada, dico ni vă cútnùnĭ inĭ-ndó nàcuáa ndùu sá cádá-gă,

27 chi cuendá sá ĩo sàá inĭ-ndó,

xíăⁿ ducaⁿ ñà túú săha-ndo cuendá nása cuáháⁿ tnúhu càháⁿ-gá,

chi ñă cuení-ndó cùndedóho-ndo, te ni ñă sándáá inĭ-ndó.

Te ni ñă cuení-ndó dàña-ndo nchaa sá cuèhé sá dúhá quĕde-ndo

cuendá xocàni-gá nchaa xíăⁿ inĭ-ndó,

duha cúñaha-n xii-yu.

Càchĭ Espíritú-gá xăhaⁿ-xi xii ndíi.

28 Te na càchĭ tnúhu-í sá quĕhĭⁿ cue tĕe càháⁿ tnúhu Yă Ndiöxí cáháⁿ-güedé tnúhu-gá núú ñáyiu ñă túú cùu ñáyiu isràél, chi ñáyiu isràél ñă túú cuení-yu cùndedóho-yu. Dico ñáyiu ñă túú cùu ñáyiu isràél chi cùdĕí inĭ-yu cùndedóho-yu, núu xíăⁿ nanĭhĭ tàhú-yu —càchĭ tĕ Păblú xăhaⁿ-dě xii-yu.

29 Te sátá nĭ ndĭhi cuendú ní xáhaⁿ-dě, te ní ndéé-yu cuánuhú-yu ta ndàtnúhu-yu cuáháⁿ.

³⁰ Te úú cuíá ñǎ xínu ní xíndecu té Pǎblú ñⁿ vehe ní cháhu-dé. Te ní xóo cáháⁿ váha-dé ndíhi nchaa ñáyiu ní xóo quiñⁿ vehe-dé.

³¹ Te ní xáhaⁿ-dě sá ndíhu ndaha ñàha Yá Ndiǒxí xií-yu núu quíndáá iní-yu tnúhu-gá, te vá yóo ñⁿ ní sàdí yuhu-dé. Te mee-ni tnúhu Xítohó Jesucristú ní cáháⁿ-dé núu-yu.

Tnúhu ní cáháⁿ yǎ ndiǒxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

872f7754-0986-5ecd-a059-925a708a6939